

# WANTOK

NIUSPEPA BILONG YUMI OL PAFUA NIUGINI STRETI - 27 YIA NAU

32 pes

Namba 1,189

Wik i stat long Fonde, Epril 10, 1997

50 toea

## Singirok kot, Spicer tekov

### WENCESLAUS MAGUN i raitim

OLPELA bos bilong Papua Niugini ami, Mista Jerry Singirok, Stet Solisita, Mista Zaccharia Gelu, Sekreteri bilong ol ami, Mista James Melegepa, Namba tu Sekreteri bilong Fainens, Mista Vele Iamo, Minista bilong Viles Sevis na Lokol Level Gavman, Mista Peter Barter, na Minista bilong Foren Afes na Tred, Mista Kilroy Genia i no amamas long kontrak bilong Sandlines long go pait long Bogenvil. Mista Singirok i tokim Komisina Warwick insait long Nesenel Kot long Mas 9 long Mosbi.

Mista Singirok i tok pasin em i bin wokim long Mas 17 i soim olsem kontrak PNG gavman i sainim bilong larim ol Sandline long kam na go pait long Bogenvil em i no stret. Em i go het na mekim ol dispela tok:

Long Januari 30, 1997 Mista Singirok, Mista Gelu, Mista Melegepa, na Mista i bin kibung na paitim toktok bilong skelim tingting sapos i gutpela long baim ol Sandlines long kam pait long Bogenvil. Insait long dispela kibung, ol dispela bikman i ting olsem pasin bilong sainim kontrak bilong kisim ol Sandlines na kam pait long Bogenvil em i no stret. Ol i ting olsem Mista Haiveta i no gat rait long sainim dispela kontrak taim Nesenel Eksekutiv Kaunsel (NEC) i no glasim na givim tok orait long en. Moa yet, sampela memba bilong Nesenel Sekyuriti Kaunsel (NSC) wantaim Gavana Generel, Sir Wiwa Korowi tu i no glasim dispela pepa o givim tok orait bilong ol. Ol i paitim tu sampela moa hevi insait long dispela kontrak. Dispela tripela bikman i pasim tok na askim Seketeri bilong Fainens, Mista James Loko long kisim askim bilong ol i go na givim long Praim Minista, Sir Julius Chan, namba tu bilong em Mista Chris Haiveta, Minista bilong Ami, Mista Mathias Ijape na ol arapela memba long stapim kontrak bilong ol Sandlines. Tasol askim bilong ol i go nating.

Mista Singirok i tokim Komisn

olsem pasin em i mekim i gutpela long wanem em i gat tripela gutpela tingting. "Namba wan as tingting mipela i gat long stapim kontrak bilong baim ol praiwet ami, Sandline em i bikos mipela no ting mama lo bilong PNG i givim tok orait long yusim wanpela praiwet ami wantaim olgeta strongpela ami, masin bilong pait - olsem ol balus, helikopta, mota, na sip na ol arapela samting bilong go long Bogenvil na kilim ol pipel long ailan. Planti ol pipel long ailan i no pait na sapos yumi yusim dispela kain stail bilong pait, yumi inap kilim planti ol man nating.

Namba tu em i olsem, aninit long dispela kontrak ol Sandlines i laik go banisim tasol Bogenvil kopa main. Sandlines i tingting long lukautim wanem kampani i laik go kirapim gen wok bilong kopa main long Bogenvil. Na sapos ol BRA i laik pait orait ol i ken go pait wantaim ol Sandlines long eria bilong main tasol. Wanpela bikpela hevi we inap kamap long dispela em i olsem, taim olgeta dispela hevi i pinis, Sandlines bai askim PNG gavman long baim ol. Yumi ken lukluk long samting olsem US\$120 milien (dola) long wanpela yia. Mi pret olsem PNG i no gat dispela mani. Olsem na wanem samting inap kamap taim gavman i nogat mani bilong baim ol Sandlines? Ol Sandlines bai askim long kisim mani long wok bilong Bogenvil Kopa main i go inap ol i kisim bek olgeta dispela mani. Namba tri as tingting mipela i no wanbel wantaim kontrak bilong Sandlines em i olsem, mipela i no amamas long prais bilong ol balus, helikopta, mota, gan, katres, na ol arapela samting bilong pait, ol Sandlines i askim PNG gavman bilong baim, Mista Singirok i tok. I luk olsem ol dispela masin bilong pait Sandlines i askim PNG gavman bilong baim bai ol i ken yusim bilong pait long Bogenvil em ol arapela ami i yusim pinis samting olsem foa o faipela taim long Rasia na long Angola, Kenya na Sierra Leone. Mi givim tok piksa long MIL-17, we ol i laikim mipela long baim ol dispela helikopta long K1.5 milien bihain long ol i yusim moa long foa o 5-pela aim. Mipela inap baim want in helikopta long wankain prais ve i moa gutpela long dispela ol helikopta ol Sandlines i laikim mipela i baim."

Wanpela samting we Mista Singirok i no amamas tu long dispela kontrak em i olsem kontrak i no tok klia husat tru bai karim toktok o hevi taim olgeta pait na hevi long Bogenvil i pinis. "Sampela lain i mas kisim wok bilong sanap na tokaut long ol hevi i kamap long Bogenvil tasol i luk olsem proposal ol Sandlines i wokim i no tok klia long dispela," Mista Singirok i tok

Tupela memba bilong sekyuriti Kaunsel, Mista Barter na Mista Genia i no bin save tu long kontrak PNG Gavman i mekim bilong baim Sandlines. Mista Singirok i tokim Komisn olsem Mista Barter i bin ringim em na autim tingting bilong em olsem em (Mista Barter) i no bilip long ol Sandlines na wanem samting ol i laik mekim. Mista

Barter i tokim Mista Singirok olsem sapos Gavman i kisim ol Sandlines i kam na go pait long Bogenvil olgeta wok em i statim wantaim ol arapela lida long Bogenvil, ol NGO, na gavman bai lus nating na bagarap. Mista Singirok i tok tu olsem Mista Genia i tokim em olsem em (Mista Genia) i no save long wanem samting i wok long kamap tu wantaim tingting bilong baim ol Sandlines.

Mista Singirok i go het na tokim Komisn olsem em i no save tu long PNG gavman i kisim mani long wanem hap bilong baim ol Sandlines. Inap tude em i ritim long nius pepa, harim long redio na lukim long televisen. Tasol em i nogat save sapos dispela em i tru o nogat.

Narapela samting Mista Singirok i no amamas em taim Mista Haiveta

i laik yusim balus bilong ol PNG ami bilong karim sampela ol kendidet na sapota bilong Pangu i go daun long Wewak bilong kempen. Mista Singirok i tok, ol politisen i nogat rait long givim oda long ol bos bilong ami long mekim politikel wok bilong ol bilong amamasim ol yet na husat ol sapota bilong ol. Dispela samting i bin kamap long wankain taim, taim Mista Spicer tu i laik go daun long Wewak long sekim ol lain bilong em. Mista Singirok i tok tu olsem long tingting bilong em Mista Spicer i laik bosim tu ol bos bilong PNG ami na mekim samting long laik bilong em wantaim ol bikpela politisen. "Na dispela i no stret na i no bihainim mama lo bilong PNG," Mista Singirok i tok.



Stailim wantaim bilas... Ol sarolik eusa long Enga provins i redi long stingsing long Hailens Kaitim. Tut redi long Per Enga provins iae wik Sarere. Foto: Peter Maima

OLPELA  
MUTRUS  
IKAM  
BEN  
MUTRUS

# MUTRUS

MAJOR SPONSA BILONG RUGBY LEAGUE INSAIT LONG PAFUA NIUGINI

GOVERNMENT WARNING SMOKING IS DANGEROUS TO HEALTH



**PLIS RIPO**

**HAGEN:**

Plis ripot i tok sampela man nogut i bin holim ol gan, naif na tamiok i rausim klos bilong sampela sumatin na bihain stil long ol.

Dispela amting i bin kamap long Tari Gap insait long Sauten Hailens long las Fraide. Plis long Sauten Hailens i tok 12-pela raskel lain i bin wokim pipia pasin ya long ol sumatin na ranawe.

Long wankain taim tu, wanpela meri i bin dai long las wiken bihain long tupela marit i pait nros na man bilong em i paitim em nogut. Tupela marit i no stap wantaim wanpela arapela insait long 5-pela yia. Plis i holim pasim pinis man bilong em.

**HAGEN:**

Plis long Hagen i wok long painim wanpela grup i gat 19-pela man long en bikos ol i stap insait long 2-pela birua bilong bagarapim meri.

Wanpela meri em ol i bin bagarapim em long taim em Pope John Paul 2 ples bilong malolo long taun. Meri ya wantaim man bilong en i laik wok-about i go long haus bihain long ol i visitim sampela frens bilong ol taim 15-pela man i kalap go long tupela long tudak. Ol i ranim man bilong em na bagarapim em. Ples ya i nogat lait na em i no seif bilong wokabout long nait. Narapela tupela bilong Dei distrik em ol i bagarapim ol long haus bilong ol yet long Mandé nait. Provinsal plis komanda Tirus Pamben i tok plis i mekim ol wok painimaut long kism ol lain trabel man ya. Tasol long wankain taim tu em i autim strongpela toktok olsem em i no seif long ol meri i raun long taun long nait.

**KOKOPO, Is Nu Briten:**

Plis long Is Nu Briten i bin sutim wanpela raskel man long taim ol i go insait long ples Kurait long Not Kos eria. Long ol plis ripot ol raskel lain i karimaut tripela stil pasin long biksan yet na olsem ol plis i save lukluk was istap. Long Fonde las wik, sampela raskel lain i bin go insait long ANZ beng na Sao Treding na karimaut stilpasin.

Plis i bilip olsem wanpela meri i stap insait long stilpasin long ANZ beng we long en, ol i bin stilim moa long K47,000.

Plis divisonel komanda John ToGuata i tokaut olsem ol i saspending wanpela plisman bikos ol i ting olsem em i bin stap insait long dispela stilpasin. Mista ToGuata i tok plisman ya i bin stap long lukautim paimasta bilong PNG CCRI husat i bin mas go long kolektim pe tasol taim ol raskel i wokim holap, plisman ya i no holim gan i stap na tu em bin sanap longwe long ka.

Mista ToGuata i tok plis i bin kism bek K200 long wanpela bilong ol raskel. Plis i bin sutim na kamapim bagarap long narapela raskel bihain long em i laik sutim plisman wantaim naip, maski ol (plis) i paiarim 3-pela woning sut wantaim gan.

**MOSBI:**

Sikspela pipel i bin dai long Mosbi las wiken, Sief Asisten plis komisina, Sam Inguba i tok.

Tripela bilong dispela i bin dai long ka aksiden. Wanpela i bin kamap long Sir John Guise Draiv long Waigani we 2-pela ka i bam na pasenja long wanpela ka i bin dai. Long narapela, 2-pela ka i bin bam klostu long ples Kuriva long Bereina rot taim ol i wok long kam olsem long Mosbi. Tupela meri pasindia i bin dai na 3-pela i kism bagarap. Ol dispela birua i bin kamap long las wiken.

Narapela 2-pela man moa i bin dai long Mosbi Jenerel hospitel bihainim pait namel long ol raskel grup. Wanpela i bin kamap long Tokarara na narapela, klostu long Gateway Hotel.

**Nominesen bilong ileksen stat tude**

NOMINESEN bilong 1997 nesenele ileksen i op long tude Fonde Epril 10 1997 long olgeta hap bilong Papua Niugini. Nau em taim bilong olgeta kandidate husat i laik sanap long 1997 nesenele ileksen i mas baim K1,000 nominesen fi bilong ol i go long opis bilong Ilektolet Komisin long provins bilong ol.

Opis bilong Gavana Jenerel i saininim pinis olgeta pepa bilong ileksen na wok bilong em i redi nau long go het stat long Fonde tude.

Nominesen bai pas long neks wik Fonde Epril 17.

Dispela em wanpela wik tasol long olgeta kandidate insait long olgeta provins long go baim nominesen fi bilong ol na Komisin i ken luksave ol i opisel kandidate bilong resis long 1997 ileksen.

Bihain long nominesen i pinis long neks wik Fonde, bai ol kandidate i go het long karimaut ol wok bilong kempen insait long ilektolet bilong ol long mun Epril na Me na tu long mun Jun.

Long Jun 14, bai olgeta wok bilong kempen i stap na ol manmeri bilong Papua Niugini i go long balot bokis na makim

balot pepa. Dispela em taim ol i makim nem bilong ol kandidate bilong ol. Dispela wok bilong vot o makim kandidate bai go het inap tupela wik olgeta. Vot bai stap long Sarere Jun 28 1997. Na ol wokmanmeri bilong Ilektolet Komisin bai i go sindaun na kaunim nem vot.

Long Tunde Julai 15, bai olgeta nem bilong ol kandidate husat i win long ileksen bai go long opis bilong Ilektolet Komisin na Gavana Jenerel bai redi long makim de bilong palamen i sindaun na makim nupela gavman bilong Papua Niugini.

**Lida gat rekot nogut noken resis long 1997 ileksen**

**RAPHAEL SEMEL i raitim**

OL LIDA husat i lusim opis long wokim pasin nogut o nem nogut long gavman opis o stilim publik mani bai i no sanap long 1997 nesenele ileksen. Ilektolet Komisin Reuben Kaiulo i tokaut kliia long ol ileksen lo long Mosbi las wik olsem husat man o meri husat i laik resis i mas nogat dispela kain rekot.

Na tu ol lain husat i laik resis bai i no ken gat dispela kain rabis mak long rekot bilong ol olsem go long kalabus samting. Sapos ol i go long kalabus 9-pela mun pinis o kot i painim ol i asua long mekim stil pasin o brukim lo, ol i no ken resis moa long nesenele ileksen.

Ol lain husat i gat gupela rekot tasol i ken rejistam nem long vot. Olsem na Mista Kaiulo i tok ol kandidate i mas go na givim nem nau na noken stap inap las minit.

Long dispela wik yet bai Gavana Jenerel i givim aut ileksen oda pepa (writ) long toksave long olgeta publik olsem nominesen bilong nesenele ileksen i open. Taim bilong nominesen bai open long namba 10 Epril na stop long 15 Epril long 4 kilok apinun.

Em i tok K1000 fi bilong nominesen bai ol i baim long kes mani o benk sek bilong PNGBC pasbuk bilong Ilektolet Komisin o baim long provinsal tresara opis. Ol ino nap larim o amamas long kism sek bilong wanwan man o meri yet (personal Cheque).

Ol kandidate i mas givim pepa risit bilong nominesen fi i go long ritening opis taim ol givim nominesen fom bilong ol. Mista Kaiulo i laik lusim Mosbi long las wik long go long Bogenvil na lukluk raun na tok amamas long ilektolet opisal wantaim sekuriti fos long redim ol wok samting bilong ileksen. Tasol em i no go long wanem em i laik mekim gut na pinisim olgeta wok bilong "writ" nau namba 10 Epril.

**Ol savemeri mas skulim arapela**

SINGAUT i go nau long ol savemeri long kantri long serim save bilong ol na lainim arapela meri long ol samting.

Singaut i kam long Ledi Stella Chan, meri bilong olpela praim minista Sir Juluis Chan long dispela wik long taim bilong opim "Rol Model" projek bilong Yunaitet Nesens Populesen Fan (UNDP).

Astingting long kirapim dispela projek em long autim long ples kliia ol biknem meri insait long komyuniti, wok na kantri we ol yangpela meri i ken luksave long ol na kism skul long ol. Na tu long skulim ol yangpela man long ol hevi we ol meri i save bungim long taim bilong wok.

Projek ya i laik givim skul long ol meri olsem ol meri i ken kamap ol biknem meri na long wankain taim tu stap olsem ol gupela mama long ol wan wan famili bilong ol. Long dispela rot, ol i bungim long developmen bilong kantri.

Long mekim dispela projek i go het, UNFPA wantaim ol meri long Nesenele Kaunsil bilong ol Meri (NCW) i bin wok bung wantaim long kamapim wanpela buk ol i kolim long "PNG Role Models - Successful in their own Right". Long dispela buk, sampela ol biknem meri long kantri husat i holim ol bikpela wok long komyuniti, gavman na praivet sekta insait long kantri. Sampela bilong ol em bisnis meri Winnie Abaijah, Edita, niusmeri na pablisa wantaim Wod Pablising kampani Anna Solomon, Stella Miria Yumen Risos menesa na narapela 15 biknem meri long Mosbi. Dispela ol meri ya i bin go raun na givim tok-tok long ol skul na ol arapela bikpela institusen insait long Nesenele Kapitel Distrik las yia. Buk ya i givim stori long laip, wok na famili bilong ol na ol hatwok we ol i putim long

**VERONICA HATUTASI i raitim**

kamap olsem ol biknem meri we i kism luksave long komyuniti na ol atoriti long kantri.

Wanpela 30 minit video piksa tu em ol i bin lonsim long dispela taim. Em i soim ol dispela meri, wok na laip bilong ol.

Ledi Stella i bin tok dispela rol modol projek bai i bungim planti meri long wok strong olsem patna long ol wok mani, politiks na ol arapela wok developmen long kantri.

Moa yet, em i bin strongim ol yangpela meri husat i laik go moa long wok bilong ol long kism skul long ol dispela rol modol meri.

Ledi Chan i bin tok ol meri long dispela kantri i noken sindaun bek na sutim tok long ol man. Ol i mas wok strong moa yet na dispela em bai i karim kaikai.

Em i tok maski pasin tumbuna bilong PNG i putim ol meri olsem ol mama bilong stap long ples na lukautim famili na ol pikinini, ol i mas wok hat long brukim dispela hevi na stap insait long ol wok developmen long kantri. Em i tok olgeta pasin kastom i no nogut na olsem i moabeta long miksim ol pasin kastam we i gupela wantaim ol nupela senis na larim nupela wok developmen long kantri i go het.

"Wok olsem skul meri, mama, hausmama em ol bikpela wok. Yumi i mas mekim ol wok bilong yumi olsem ol hausmama, ol mama na ol savemeri wantaim strong, gupela tingting na rispek. Yumi i mas tingim long planti taim pasin bilong yumi i save skruim posisen bilong yumi long sosaiti. Mi bilip olsem sapos ol meri i bihainim gupela rot na wanem samting ol i laik mekim, ol bai i kism luksave long ol man na komyuniti," Ledi Stella i tok.

**Wewak distrik bai stapim maket long Mandé**

OPIS BILONG Wewak Distrik insait long Is Sepik provinsal edministresen i kamapim pinis wanpela bikpela disisen long pasim olgeta maket insait long Wewak Distrik long olgeta Mandé.

Kaikai bilong dispela disisen bai stat long arapela wik Mandé, 14 Epril, 1997. Dispela nau i min olsem olgeta maket, bikpela na liklik, insait long ol ruel na eben eria insait long Wewak Distrik bai pas long olgeta Mandé.

Edministreta bilong Wewak Distrik John Kigase i tokaut long dispela disisen long las wik Fraide, 4 Epril, 1997 taim em i holim wanpela miting wantaim ol viles kot na ol kaunsel opisel bilong Wewak Distrik program menesa bilong Lokol Gavman Martim

Maingu na bosman bilong Infomesen Opis Godfried tu i bin stap insait long dispela miting.

Mista Kigase i tokaut long ol viles kot na kaunsel opisel bilong Wewak Distrik olsem astingting na opis bilong em i kamapim dispela disisen em long mekim ol pipel long distrik i luksave long Mandé olsem de bilong kaunsel long painimaut ol wok bilong kaunsel. Arapela astingting, Mista Kigase i tok long kamapim na mekim lo na oda i mas stap strong insait long ol ples na komyuniti.

Edministreta Kigase i tok kliia long ol viles kot na kaunsel opisel bilong em olsem long ol yia i go pinis gat gupela na bikpela luksave i stap olsem Mandé i de bilong

mekim wanem ol wok kaunsel i makim olsem klinim set, wok long skul na klinik et pos, klinim ples o mekim ol arapela kain wok long komyuniti.

Em i tokaut olsem nau long dispela taim ol pipel i no moa luksave long Mandé olsem de bilong kaunsel. Na ol i save lusim tingting o bikhet long karimaut ol wok we kaunsel i askim o makim.

Em i tok arapea astingting na opis bilong em i kamapim disisen bilong pasim ol maket em long soim ol pipel olsem kaunsel em gavman atoriti insait long ples na komyuniti. Na ol pipel i mas givim luksave na sispek long wok bilong kaunsel.

Mista Kigase i tokaut olsem opis bilong em nau bai mekim wok long lukim olsem ol wok

bilong kaunsel na viles kot i mas kamap gut na strong long ol ruel na eben eria insait long Wewak Distrik.

Disisen bilong pasim ol maket long Mandé i kism planti sapat na toktok i kam long planti viles kot na kaunsel opisal husat i kamap na stap long miting. Planti i tok-tok na givim tingting na luksave bilong ol long watpo na wok bilong kaunsel i no moa strong insait long ples.

Planti viles kot na kaunsel opisel i tokaut long miting olsem ol wok i mas kamap long mekim wok bilong kaunsel i go hef gut na strong gen olsem bipo Long wanem nau yet ol pipel i no moa givim luksave long lo na oda na ol arapela gavman atoriti insait long ples.

**WANTOK**

All departments. Phone: 325 2500 - Fax: 325 2579 P.O. Box 1982, Boroko, NCD, Papua New Guinea

Published Weekly, Thursday, for Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola for Word Publishing Co. Pty Ltd.

Acting General Manager and Group Editor in Chief: Anna Solomon	Papers distributed by air throughout PNG
Advertising Manager: James DeLisle	Available by airmail subscription within Papua New Guinea and overseas
Editor of Wantok: Leo Waliwa	
Advertising Deadlines: Display Bookings and Camera ready copy: Tuesday midday. Classified Advertising: Wednesday 2pm	

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.



# WANTOK

NIUSPEPA BILONG OL PNG STRET

## Ileksen noken hariapim kot

BOS BILONG Sandline ovasis ami Tim Spicer i pinisim las wok bilong em long bekim ol askim bilong kot na go pinis long kantri bilong em. Nau bikpela wok i stap yet em long yumi yet long laitim paia long yumi yet i go i kam long painimaut husat tru bai asua long bikpela hevi bilong baim moa long K30 milien long Sandline Kontrak.

Nem bilong planti bikman i wok long kamap insait long taim bilong kot. Taim kot i askim olupela bos bilong ami, Jerry Singirok long dispela wik, em i kolim nem bilong planti arapela man moa. Olsem na dispela kot; Komisyon ov Enkwari i mas gat inap taim long askim na sekim gut olgeta man we nem bilong ol i kamap long kot. Gutpela na stret-pela na klipela disisen bilong kot inap kamap taim olgeta wanwan man husat nem bilong ol i kamap i mas autim stori bilong ol.

Ekting praim minista John Giheno i no oraitim long pulim kot ya i go longpela. Tasol nau em i mas skelim olsem planti nem bilong ol man i kamap na ol i mas autim bel na tingting bilong ol. Ol nem olsem, Koiari Tarata, Noel Levi, Rupa Mulina, James Loko, Nicos Violaris na ol arapela tu. Olsem na kot i mas gat sans long askim na sekim tu save bilong ol dispela lain long dispela bikpela hevi.

Maski taim i sot, kot i mas skruim moa taim long dispela wok i mas karim tru kaikai bilong em.

Sapos Mista Giheno i tingim taim bilong ileksen na em i laik stapim ol rot bilong pulim kot ya i go longpela, dispela bai i no inap tru long makim laik na interes bilong ol pipel bilong PNG. Bikos kra i bilong pipel dispela kot i kamap, olsem na ol lida bilong kantri i mas pilim tru pawa bilong lo na pawa bilong pipel. Dispela inap mekim ol lida long bihain i ken pret moa long pawa bilong pipel na pawa bilong lo.

# WANTOK

NIUSPEPA BILONG OL PNG STRET

P O Box 1982 BOROKO  
Telepon namba: 3252500  
Feks namba: 3252579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

# Ol politikel pati mas gat gutpela polisi - ICRAFT

## YAKAM KELO i raitim

OL POLITIKEL pati i mas gat gutpela polisi na taim ol i fomim gavman, ol i mas wok stret long karimaut ol polisi na plen bilong ol. Dispela em tok-tok bilong Dairekta bilong ICRAFT Powes Parkop long Trinde aste.

Mista Parkop i putimaut klia olsem olgeta politikel pati i mas gat gutpela polisi bilong sevim pipel na ol risos bilong ol. Na tu ol manmeri i mas save long ritim polisi bilong ol politikel pati na ol lida bai ol i save long husat lida na pati ol i ken votim long ileksen long sevim ol.

Mista Parkop i tok long dispela taim, ol manmeri i save votim ol lida husat i wantok o wanlain bilong ol. Na ol i no save klia long save na plen bilong dispela lida. Wankain tu ol pipel i votim pati tasol ol i no save long polisi na plen bilong pati long sevim ol, Mista Parkop i tok.

Mista Parkop i mekim dispela toktok long opim na putimaut wanpela polisi pepa long **Freedom na Jastis** we ICRAFT

i bin kamapim insait long 4-pela krismas olgeta. Planti savemanmeri long lo, wokmanmeri bilong ICRAFT, NGO na arapela helpim bodi i bin bungim olgeta dispela tingting na wok wantaim long kamapim dispela pepa.

Insait long dispela Fridom na Jastis polisi pepa, ol i sanap long tripela bikpela poin. Dispela tripela poin em: • Yumen Fridom na Raitis, • Jenda Ikwaliiti na • Lend Raitis na Nesenel Risosis.

Dispela em tripela astingting we ol arapela polisi i raunim. Ol polisi olsem; karimaut gut wok bilong mama lo, gutpela Edukesen, rausim Intenel Sekyuriti Ekt, lo bilong kilim man na ovasis lo, Bogenvil hevi, wok bilong ol meri long developmen bilong kantri, gutpela lo bilong graun, gutpela lo bilong Fores, Minerel na Petroleum Risosis, Marin Risosis na ol samting long bus na graun.

Mista Parkop i tok dispela buk i ken helpim ol politikel pati na ol arapela olsem NGO grup olsem sios, provinsal gavman, Lokol Level Gavman

na arapela liklik grup tu long wokim gutpela polisi bilong ol.

Mista Parkop i tok ol i putim aut dispela polisi buk bilong Fridom na Jastis long dispela taim bilong nominesen i op long statim 1997 nesenel ileksen. Bikos ol i laikim bai ol politikel pati i mas skelim gut ol polisi na plen bilong ol na sut stret long karimaut polisi taim ol i fomim gavman. Na tu ol i laikim bai ol pipel i mas save gut long glasim, skelim na save long wanem kain man ol bai makim long ileksen.

Em i tok tu olsem planti samting insait long lo na polisi bilong gavman long tude i no wok gut. Planti samting olsem hevi bilong ol manmeri long graun bilong ol. Ol i mas kisim sampela helpim i go bek bikos gavman i bagarapim graun bilong ol pinis, em i tok. "Ol pipel i mas kisim bek taitel bilong graun".

Ol meri tu i mas stap insait long pasin bilong toktok long ol risosis long bus na graun o solwara. Lokol Lend Kot na Provinsal Len Kot i mas gat inap wokman na mani bilong mekim gut wok bilong stretim gut hevi bilong graun long

ples. Mausman bilong Intanesenel Grin Pis Brian Brunton tu i tokaut olsem lo bilong PNG long Fores i no gutpela tumas. Bikos ol papa-graun o asples bilong timba i no kisim gutpela helpim long diwai bilong ol.

Mista Brunton i tok maski kantri i salim bikpela namba bilong ol diwai, tasol bikpela mani bilong dispela i no helpim ol pipel. Olsem na gavman i mas senisim dispela lo bilong Fores na kirapim ol liklik smol skel loging. Dispela em rot we ol pipel yet i ken katim diwai na salim na kisim mani stret long helpim ol na sindaun bilong ol.

Mista Brunton i tok tu olsem planti politikel pati nau i gat ol polisi bilong ol yet we i no strong tru long sanap bilong en. Na tu ol polisi bilong ol i wanwan tasol. Tasol dispela buk bilong ol nau i gat ol strongpela na bikpela polisi we ol politikel pati i ken kisim piksa o luksave long en na stretim polisi plen bilong ol gen.


Dispela polisi buk tu bai helpim wok bilong ICRAFT yet long strongim ol wok na program bilong ol.

# Tupela loya tok salens long muv bilong Chan

TUPELA biknem loya i wok long salensim tupela yet ausait long kot haus long posisen bilong praim minista nau we memba bilong Henganofi John Giheno i kisim olsem Ekting praim minista.

Tupela loya ya em Rimbink Pato na Loani Henao. Tupela wantaim i gat praivet bisnis olsem praivet loya na tupela wantaim i biknem loya insait long PNG. Na tupela wantaim bai sanap long ileksen long dispela yia. Rimbink Pato bai sanap long Enga rijenol na Loani Henao bai sanap long NCD rijenol.


Long las wik, Rimbink Pato i bin salim pas las wik i go long opis bilong Spika bilong palamen Sir Rabbie Namaliu long askim em long kolim bek palamen long bung gen na makim nupela praim minista stret. Bikos olupela praim minista Sir Julius Chan i no bihainim stret sampela han bilong lo long lusim sia bilong em.



• Rimbink Pato.

Mista Pato i tok pasin Sir Julius Chan i mekim long go sanap sait tasol na wetim kot i no bihainim lo. Em i mas risain stret long sia bilong em na palamen i mas makim nupela praim minista.

Mista Pato i tok dispela i soim olsem Sir Julius Chan i no risain yet. Em i giman tasol ol pipel bilong Papua Niugini. Samting tru em, em i stap yet long pawa bilong em.



• Loani Henao.

Long dispela f r , Mista Pato i askim Spika Sir Rabbie Namaliu long kolim palamen i kam bung gen na makim nupela gut Ekting praim minista bihainim lo stret we inap rausim nem bilong olupela praim minista i stap aut olgeta.

Tasol narapela loya gen, Loani Henao i salensim gen Rimbink Pato long niuspepa na tok Sir Julius Chan i bihainim lo long mekim dispela. Sapos praim minista i go long sam-

pela hap o em i gat sampela hevi long em, namba tu praim minista inap kisim ples. Na sapos namba tu praim minista tu i gat sampela kain hevi olsem praim minista, kabinet i ken makim wanpela was o Ekting praim minista, Mista Henao i tok.

EKTING praim minista na memba bilong Henganofi John Giheno i tokaut olsem posisen bilong praim minista i no bikpela samting. Bikpela samting em long mekim wok long sevim ol pipel bilong Papua Niugini.

Mista Giheno i mekim dispela toktok long bekim ol dispela toktok bilong tupela biknem loya.

Mista Giheno i tok dispela kain toktok salens long posisen bilong praim minista i no inap helpim tru dispela kantri na ol pipel bilong em. Nau olsem kot i kamap pinis long mekim klia ol samting, bai wok bilong praim minista tu i go stret gen long bihain.




OL STORI BILONG BOGENVIL

# Pasin spak bikpela hevi long Bogenvil



CATHOLIC COMMISSION FOR JUSTICE, PEACE & DEVELOPMENT PO BOX 6576 BOROKO, NCD. PAPUA NEW GUINEA.



## Redi long 1997 nesenel ileksen

- 11. Yumi ol vota is mas putim kantri i go pas long taim yumi votim ol mida.
- 12. Yumi mas skelim gut pasin bilong ol kendidet. Yumi mas skelim ilaip bilong ol kendidet na i ken skelim tasol ol mauswara bilong em.
- 13. Yumi mas skelim ol promis bilong kendidet na lukim sapos dispela promis bai inap karim kaikai o nogat.
- 14. Yumi mas lukim sapos kendidet i yusim mani long baim ol vot. No ken harim gris na salim vot bilong yu.
- 15. Yumi mas strong na tok nogat long kendidet husat i raun long baim vot.

HOMBRU, strongpela dring we ol i wokim long ples i kamapim moa hevi long not Bogenvil. Ol i save wokim hombru wantaim ol mau frut samting olsem painapel, banana, faiv kona frut na ol arapela frut moa na miksim wantaim suga na yis.

Long ol ripot i kam long Buka long dispela wik, hevi long hombru i go bikpela long Buka na nau Bogenvil trensisenel gavman (BTG) i givim bikpela tingting long bung bilong ol we i bin stat long dis-

pela wik na ol i holim long Haku. Ol memba bilong BTG i wari tru nau bikos long ol meknais na trabel we ol man i wokim bihain long ol i dringim hombru.

Long ol ripot sampela gavman opisa, siefs, pablik sevan na tu sampela memba bilong ol sekyuriti fos i dringim hombru na kamapim trabel bilong bagarapim gutpela sindaun insait long komyuniti.

Bogenvil Primia Gerard Sinato i tok ol atoriti i traim long stapim wok long kamapim

homburu, salim na dringim tasol nogat. Ol interim atoriti memba wantaim ol plis i bin rausim ol ges botol na ol arapela samting we ol yangpela man i save yusim long mekim hombru tasol dispela i no wok tu.

Nau Primia Sinato i askim strong ol BTG memba long kamap wantaim sampela gutpela rot long stapim wok bilong wokim hombru long provins.

Bihainim hevi bilong hombru, i gat ol toktok long BTG i rausim dispela lo we ol i bin putim long 1990 long tambuim

strongpela dring olsem bia na ol strongpela dring i go bek long Bogenvil. Planti BTG memba i egensim tingting long larim bia na ol arapela strongpela dring i kam insait long Bogenvil bikos em bai i no inap long stretim hevi long ailan.

Planti grup long Bogenvil olsem ol grup bilong ol meri, sios na pablik i wari long ol hevi we hombru i save kamapim insait long ol komyuniti, ples na provins Bung bilong BTG i go het yet.

## Bogenvil redi long nesenel ileksen

WANPELA Nesenel ileksens Monitoring komiti i kamap pinis long stiarim ol wok bilong nesenel ileksen long Bogenvil.

Provinsal Ritening opisa Mathias Pihei i bin tok grup bai i gat long em Edministrativ Seketeri Francis Kabano, Provinsal Plis Komanda Joel Kean, Taktikel fos komanda Kenel Tokam Kanene, wanpela opisa i makim opis bilong Praim Minista na narapela i makim PNG Difens Fos. Grup ya bai i skelim na glasim ol ples we ol man bai i vot long en, ol

opisa husat bai i wok long taim bilong ileksen bilong lukim olsem ol wok ol i mekim long ilkesen em ol i wokim long ples klia. Na nogat man i haitim wanpela samting bilong bagarapim ileksen.

Mista Pihei i tok opis bilong em i amamas long ol wok redi bilong ileksen long provins i go gut bihainim ol hevi i save kamap long planti hap bilong bikaialan Bogenvil.

Em i tok i gat tripela opisa nau i makim saut, sentrel na not Bogenvil long helpim em long dis-

pela wok long ilkesen i go gut tasol. Distrik menesa long Buin, Peter Siabake i makim saut, Tony Kuusa distrik menesa bilong Wakunai i makim sentrel na George Manu bilong Distrik Sevis i makim not Bogenvil.

Mista Pihei i tok dispela ileksen i lukim olsem planti man moa i sanap long resis long foapela sia bilong provins wantaim moa long 30 kendidet olgeta. Taim bilong kisim nem bilong ol man long sanap resis bai i stat long tude Epril 10 na Mista Pihei i bin tok i kam inap long nau opis bilong em i kisim nem bilong 10-pela man i sanap

resis long sia bilong not Bogenvil, 9-pela long resis long sentrel, 11-pela long saut na 12-pela long rijenol sia. Long ol yia bipo, namel long tupela na 4-pela man i save makim tripela sia na tupela i save sanap resis long rijenol sia.

Mista Pihei i tok tu olsem em i bin putim toktok i go long ol pipel husat i stap long ol eria we BRA i lukautim long rejistaim nem bilong ol long vot tasol i kam inap nau, nogat man i go long rejistaim nem long ol eria we ol opisa i bin raun long kisim nem long Komon Rol pepa. Ol pablik sevan bai i helpim long wok long taim bilong ileksen

bikos ol i gat save long dispela wok. Tasol ol bai i glasim gut tu ol opisa husat bai i helpim ol long lukim olsem ol i no wokim sampela paul wok.

Long wankain taim tu, Mista Pihei i tok ol lain bilong Bogenvil husat i stap ausait long ailan bikos ol i lusim ailan long taim bilong trabel bai i mekim vot long ol long postel voting. Tasol pastaim long dispela ol i mas putim nem bilong ol long ilekrel opis klostu long ol. Ol arapela pipel bilong Bogenvil husat i stap longpela taim ausait long ailan i ken vot long ol kendidet long provins sapos ol i laik.

## Primia laikim Bogenvil pipel yet mas bung

BOGENVIL Primia Gerard Sinato singautim nesenel gavman long larim ol Bogenvil lida yet i kirapim bek gen ol toktok kwiktaim bilong pinisim ol trabel long ailan. Long wankain taim tu em i welkamim salens we Foren Afeas Minista Kilroy Genia i mekim long singautim ol lida bilong Bogenvil Revoluseneri Ami (BRA) na Bogenvil Interim Gavman (BIG)

long stap insait long toktok bilong pinisim ol trabel long ailan.

Tasol long wankain taim tu, Mista Sinato i putim wanpela askim i go long nesenel gavman long larim BTG i go pas long ol toktok wantaim ol BRA na BIG lida. "Mipela i bin wokim dispela long Kens Australia we tupela grup i bin kamapim wanpela tok

orait tasol ol i no bin bihainim ol dispela toktok taim ol trabel i kamap gen namel long ol BRA na sekyuriti fos. Dispela em bihain tasol long dispela bung. Mipela i laik kirapim ol toktok long tupela sait i ken pilim gut long toktok na rausim ol pasin bilong pret long wanpela arapela", Mista Sinato i bin tok.

## Glasim gen operesen long Bogenvil

### VERONICA HATUTASI i raitim

STRONGPELA singaut i go nau long glasim gut ol wok na operesen long Bogenvil. Dispela em long lukim olsem ol wok i kamap tru na tu long lukim olsem ol i no westim nating mani, we ol i ken yusim long ol helt na edukesen progrem long ailan.

Bos bilong Fowod Taktikel fos koman beis long Loloho, Kenel Tokam Kanene i bin autim tingting bilong em bihainim ol wok i kamap long Bogenvil long dispela taim. Long wankain taim tu, em bin singaut long ol grup we i stap insait long wok bilong kamapim bek gutpela sindaun long ol pipel na ples long bung wantaim na glasim gut ol wok kamap bilong ol progrem na tu wanem samting i go rong o no gutpela tumas.

Kenel Kanene i bin tok planti kain toktok i kamap long dispela tripela progrem long ailan we i karamapim ol wok long stretim ples na sindaun bilong ol pipel, bung wantaim na pasin biong kamapim bel isi na sekan pasin long stretim ol samting i bagarap. Ol samting olsem ol rot, bris, ol haus na ol arapela samting bilong gavman na praivet bisnis. Tasol long planti hap, nogat gutpela wok i kamap long wanem nogat wok bung na kontrol i stap long kodinetim ol dispela wok.

Kenel Kanene i singautim olgeta lain long putim het wantaim na stretim ol wok long Bogenvil long gutpela pasin bihain long trabel we ol bel nogut long Sandline Intenesenel i bin

kamapim na klostu kantri i bungim bikpela taim nogut.

Em bin poinim aut olsem i gat yet rot i stap long pinisim trabel long ailan wantaim bel gut pasin. Tasol i moabeta nau sapos ol i glasim gut ol wok we i kamap na go het insait long laspela 6-pela yia bihain long ol restoremen progrem long Bogenvil i bin stat. Dispela wok glasim tu bai i painaut hamas mani i lus long ol progrem na sapos ol i yusim gut planti ol mani ya we gavman na ol arapela helpim grup i givim long stretim Bogenvil.

Kenel Kanene i singaut long ol grup olsem sekyuriti fos, nesenel gavman, Bogenvil trensisenel gavman, ol lida long ailan na ol arapela lain husat i laik lukim trabel long Bogenvil i pinis na ol pipel i sindaun gut long wok bung gut wantaim.

Em i bin tok long lukim olsem ol wok long ol progrem long ailan i go gut, ol kliapela politikel daireksen i mas kam long gavman na ol atoriti wantaim sapot i kam long ol gutpela woklain husat i no kisim sait long ol trabel long ailan.

Kenel Kanene i bin autim wari tu long ol sata we gavman i save mekim long ol helikopta na sip. Dispela ol sata em ol i mas skelim gut long lukim olsem i gat inap ol samting na pipel bilong sip long karim na i no lusim mani nating bilong sataiam ol.

Em i tok long nau, gavman i no gat kliapela rot bilong skelim ol restoremen wok na ol arapela progrem long ailan na em i taim nau long glasim dispela.





## SANDLAIN

## RIPOT

## Sandlines tingting long salim 70 praivet ami i go pait long Bogenvil wantaim ol strongpela masin

SANDLINES i tingting long salim 70 praivet ami i kam long helpim ol Papua Niugini ami na go pait long Bogenvil insait long operesen "Oyster", Mista Spicer i tokim Komisina Warwick insait long Nesenel Kot haus long Mas 7 long Mosbi.

Insait long kontrak bilong Sandlines, Mista Spicer i tok ol i tingting long salim 70 praivet ami. Long dispela, i gat 42 ami na sampela bilong ol dispela bai skulim ol PNG ami long pait long graun. Sampela bilong ol dispela ami, em ol lain bilong spesel fos. Ol lain insait long spesel fos em ol dokta, na ol lain bilong givim signal o toksave long ol ami long taim ol i go long pait. Insait long dispela 42, i gat 16pela praivet ami husat bai i go pas long pait. Na i gat ol lain ami bilong pait long helikopta, na balus. Ol arapela 38 praivet ami em ol komanda o bos, administreta, ol paillet o ol draiva bilong balus na helikopta na ol teknisen o ol lain bilong stretim ol masin bilong pait i taim ol dispela masin i bagarap.

Mista Spicer i tok tu olsem long ronim ol dispela helikopta na balus oltaim, yu mas sevisim ol oltaim. "Na long mekim dispela, yu mas i gat inap wokman long graun bilong sevisim ol balus na helikopta na inap paillet o draiva bilong ronim ol. I luk olsem yu bai i mas i gat tupela man bilong ronim balus na tupela bilong stretim balus. Long dispeal as yu mas i gat inap wokman," em i tok. Mista Spicer i tok, pait long Bogenvil em ol i kolim "low intensity operation," na dispela i min olsem ol paillet i mas kism helikopta o balus i go daunbilong stret long pait. Dispela kain pait em wanpela bilong ol strongpela kain pait ol draiva bilong helikopta na balus i mas mekim. Bikos dispela kain wok em i hat wok, i mas i gat inap wokman o ami bilong senis olsem bai ol i no ken painim bikpela hevi.

Mista Spicer i go het na tok olsem long stat bilong operesen "Oyster", Sandlines i bin salim samting olsem 40pela memba bilong SFU. Insait long 60 SFU praivet ami, 40pela bilong ol em ol ami husat i save go pas long pait na 20pela i save stap long opis long etkwata olsem ol administretiv wokman. "Mi bilip olsem i bin gat samting olsem 30pela memba bilong SFU praivet ami i stap long Wewak," Mista Spicer i tok. Em i tok ol dispela 30pela ami i bin skulim tu sampela ami long Moem Bareks long hapim level bilong ol long pait. "Tasol dispela em i narapela sait bilong kontrak, na mipela i no mekim nating," Mista Spicer i tok.

"Mipela i skulim dispela batalion long yusim ol mota o ol gan olsem bom. Mi no klia long namba tru bilong ol, tasol mi ting olsem i gat 24 o 25 PNG ami. Na ol i kolim ol long samting olsem ol Sekyuriti Yunit, wanpela nem Siv Instrukta bilong mipela na Komanda long Yunit long Wewak i kolim," Mista Spicer i tok. Em i tok dispela em i no ol SFU tasol ol wankain batalion bilong PNGDF long Wewak, husat i ken helpim ol SFU bilong ol long go pait long Bogenvil sapos ol i laikim ol. "I luk olsem i bin i gat samting olsem 70 PNGDF i kism skul long dispela taim.

Mista Spicer i tok em i no klia long tingting bilong bos bilong ami long PNG long salim amas PNG ami long helpim ol praivet ami bilong Sandlines long go pait long Bogenvil. Tasol Mista Spicer i ting ol bai i gat 60pela praivet ami bilong Sandlines, ol SFU, ol lain bilong yusim ol mota na sampela ol lain ami bilong PNGDF. Mista Spicer i ting ol PNGDF husat bai go pait long Bogenvil i luk olsem bai ol lain ami i stap long Bogenvil na ol as ples lain long Bogenvil husat i kolim ol yet long 'Resistance Fighters'. Mista Spicer i tok tu olsem bai i gat liklik bot yunit, na wan wan taim ol plis i ken go long helpim ol.

# Watpo Spicer i karim raun sampela "blank end user certificates" Donigi

WENCESLAUS MAGUN  
i raitim

LOYA Peter Donigi man husat i makim olpela bos bilong ol ami, Mista Jerry Singirok, i askim Tim Spicer bos bilong ol Sandlines long Papua Niugini long tokaut klia watpo Mista Spicer i karim raun sampela "blank end user certificates" (BEUC). BEUC em ol setifiket o pepa ol ami i save yusim long baim ol samting bilong pait na ol arapela masin. Mista Donigi i askim Spicer long tokaut klia em i holim amaspela bilong ol dispela pepa na husat tru i givim ol dispela pepa insait long Mas 7 Nesenel Kot long Mosbi.

Mista Donigi i askim tu Mista Spicer long tok aut klia watpo em i karim bikpela mani olsem US\$400,000 long han na i no putim long benk. Mista Donigi i go het na askim Spicer we em i putim narapela US\$100,000. Mista Donigi i suvim ol dispela askim long Mista Spicer long painim aut sapos ol pasin Mista Spicer i wokim i no stret na i brukim sampela lo bilong PNG gavman.

Long bekim ol dispela askim, Mista Spicer i tok em i karim raun US\$400,000 long wanem nogut bai em i mas yusim sampela bilong ol dispela mani long mekim sampela wok kwik taim. Mista Spicer i tok long laip na save bilong em, em i painim aut olsem, sampela taim i hat long mekim wok kwik sapos yu laik mekim taim yu nogat mani long han. Em i tok wok em i kam long mekim i bikpela na i mas kamap kwik na em i mas i gat inap mani bilong baim husat o wanem samting na yusim long wanem taim em i laik. Mista Spicer i tok tu olsem insait long ol sampela bikpela wok bilong em, em i painim olsem em i no inap kism kwik mani long

benk o long ol kredit kat long wanem dispela ol rot i save kism planti taim. Wanpela bilong ol eria Mista Spicer i ting em bai yusim dispela mani em long baim marasin na ol haus sik long taim ol praivet ami bilong em i kism bagarap na i go i stap long ol. Mista Spicer i tok tu olsem em i putim hap bilong dispela mani olsem US\$100,000 long wanpela akaun long Hong Kong tasol em i tok em i no inap tokaut long nem bilong dispela akaun.

Yumi go bek ken long ol BEUC. Mista Spicer i tok em i no inap tingim amaspela BEUC em i karim raun. Em i tok ating em i gat 10pela tasol em i no save na bai em i mas sekim ol pepa bilong em long dispela. Mista Spicer i tok em i karim sampela bilong ol dispela i kam long Mosbi na sampela i stap long sev long opis bilong em - Plaza 107, long London. Mista Spicer i tok em i no suvim Mista Singirok long kism ol dispela BEUC. "Mitupela i toktok i go na Mista Singirok yet i givim ol dispela BEUC long mi," em i strongim tok bilong em yet.

"Mi ting i gat tupela as bilong wanem na Mista Singirok i givim mi ol dispela BEUC. Namba wan as em i olsem, no gut bai i sampela bilong ol BEUC mipela i pulimapim pinis long baim ol samting bilong pait i bagarap. Na namba tu as em i olsem no gut mipela i mas baim ken sampela moa samting bilong pait. Mipela i paitim tok long dispela na Mista Singirok i ting dispela em i wanpela gutpela tingting, olsem na em i givim mi ol dispela BEUC," Mista Spicer i tok. Ol dispela BEUC i gat han mak bilong nem bilong Mista Singirok tasol. Mista Donigi i tok, ol BEUC pepa i mas i gat tupela han mak. Mista Spicer i no inap tokaut sapos ol BEUC em i gat i bihainim lo bilong PNG. Tasol em i tok long tingting bilong em em inap yusim ol long wanem i gat han mak bilong Mista Singirok.

## Sandlines baim balus bilong salim waris long graun

INSAIT long Nesenel Kot long Mas 7, Mista Spicer i tokaut olsem wanpela balus Sandline i tingting long baim na yusim long Bogenvil bai i gat laud spika. Em i tok ol ami bai yusim dispela long toktok long ol lain long graun taim balus i plai antap.

Mista Spicer i tok ol i kolim dispela balus wanpela "spotter" balus na em i gat spiksa sistem. Ol i kolim dispela sistem "sky shout" o singaut long skai. Dispela sistem i gat tep rekoda na sistem bilong toktok. Ol i tingting long yusim dispela balus long pait wantaim ol lain long Bogenvil long daunim strong insait long tingting bilong ol pipel.

Moa yet, Mista Spicer i tok olsem, ol samting Sandlines i baim bilong yusim long pait long Bogenvil i sapos long kam long Papua Niugini long nait bilong 16 o 17 (1996 o 1997?). "Mi bilip ol PNG ami i redi long kism ol dispela samting," em i tok. Tasol taim dispela hevi i stat, kwik taim ol i stapim ol dispela samting.

Sampela bilong ol dispela samting em long helikopta, wanpela moa balus na wanpela kontena i gat ol spea pat bilong balus na ol arapela samting bilong pait antap long solwara.

Nau yet Mista Spicer i tok, i gat tupela MI-21/24 helikopta na tupela MIL-17 helikopta na wanpela balus i stap long Tindal ples balus long Australia. Mista Spicer i tok em i ting ol dispela helikopta em bilong pait. "Ol dispela balus na helikopta i stap long Tindal bihainim tok orait i kam long mipela, taim dispela hevi i kamap. Mipela i luksave long dispela, taim PNG gavman i askim gavman bilong Australia long lukautim ol dispela samting inap ol i stretim dispela hevi," Mista Spicer i tok.

Mista Spicer i tok: "Em bai kosim mipela samting olsem \$100,000 long larim dispela balus i plai o sindaun long haus bilong ples balus long wanpela de." Em i go het na tok olsem bihain long PNG gavman i saspandim o stapim dispela kontrak. Sandlines tu i stapim wok bilong baim ol nupela samting ol i bin tingting long baim. Mista Spicer i tok ol samting Sandlines i baim namba tu taim bilong kism i kam long PNG i no kam yet long PNG na tu ol i no mekim pe bilong ol dispela samting yet. Nau yet Mista Spicer i tok em i no klia long wanem ol samting stret Sandlines i tingting long baim bilong dispela pait long Bogenvil.

## Spicer i givim setelait telipon long Haiveta na Singirok

MISTA Spicer i tokim Komisina Warwick long Mas 7 insait long Nesenel Kot haus long Mosbi olsem i tru em i bringim tupela setelait telepon i kam insait long Papua Niugini bipo long ol i wokim kontrak bilong Sandlines. Dispela i bin kamap namel long Novemba na Disemba long las ya. Wanpela bilong ol dispela setelait telepon em i bin givim long Mista Singirok na narapela em i givim long Mista Haiveta.

Mista Spicer i tok tu olsem insait long kontrak, Sandlines i tingting tu long givim wanpela setelait telepon long Sir Julius Chan na narapela long Mista Mathias Ijape. Tasol dispela i no bin kamap long wanem ol i stapim dispela kontrak.

"As tingting bilong givim telepon long Mista Singirok long dispela taim em long strongim na kamapim gutpela toktok na gutpela wok bung wantaim namel long PNG ami na Sandlines long London," Mista Spicer i tok. Em i tok mipela i no bin gat arapela tingting nogut long taim mi givim telepon long Mista Singirok. "Na Mista Haiveta olsem namba tu Praim Minista i bin askim mi long raitim wanpela konsaltensi pepa, na olsem mi yet i ting em tu i mas gat narapela setelait telepon olsem bai mitupela i ken toktok i go i kam long stretim dispela wok," Mista Spicer i tok. Tasol dispela em i no wanpela paul samting. Insait long kontrak bilong mipela (Sandlines) mipela i tok tu olsem bai mipela i givim sampela setelait telepon long sampela lain.

Mista Spicer i tok, PNG gavman i no baim dispela ol setelait telepon na nogat wanpela man long PNG tu bai putim mani long baim dispela ol telepon. "Dispela em laik bilong mipela na mipela yet bai baim na givim long husat mipela i ting i gat wok long en," Mista Spicer i tok. Em i tok ol i tingting long givim sampela bilong dispela ol setelait telepon long ol Spesel Fos Yunit (SFU), na sampela ol i tingting long givim long ol praivet ami bilong ol long taim ol i go mekim wok long wanem hap gavman i salim ol long en," em i tok.



TOKSAVE

Man i go pas long 1997 Nesenel Ilekse, Mista Reuben Kaiulo i givim toklukaut long ol kandidate na sapota bilong ol. Em i tok ol i mas lukaut gut long wanem kain toktok na pasin ol i mekim long taim bilong kempein.

"No ken mekim ol pasin nogut na brukim lo. Nogut narapela man i kotim yu na bai yu lusim ileksen," Mista Kaiulo i tok.

"Lo i stap ples klia.

"Sapos yu abrusim lo long taim bilong kempein, bai yu kism taim tru.

"Maski sapos yu win, kot bai givim bikpela mekimsave long yu sapos yu brukim ol lo bilong ileksen."

Mista Kaiulo i givim dispela toklukaut long taim Gavana General i sainim ol pepa bilong 1997 Nesenel Ilekse long Gavman Haus long Tunde.

Gavana General i sainim 545 pepa bilong olgeta 109 ilektoret.

Gavana General bai givim tokorait long statim 1997 ileksen long 4 klok apinun tude, Fonde Epril 10. Em nau bai ol kandidate i ken nominet na stat kempein.

Nominesen bai pas long Fonde Epril 17 na kempein mas pinis long Jun 13, wanpela de bipo ol pipel i stat vot.

Ol pipel long Mosbi, Lae na ol provins long Hailans bai i vot long wanpela de tasol. Olgeta narapela ples bai vot i go inap long Jun 28.

Olgeta wok bilong ileksen bai pinis long Julai 15.

Pebilong nominesen em K1,000 na aninit long nupela senis Palamen i bin mekim, dispela mani bai i stap long han bilong ilektoral Komisina long peim wok bilong 1997 Nesenel Ilekse.

Mista Kaiulo i tok olgeta kandidate mas peim nominesen fi bilong ol long K1,000 mani obeng sek. Dispela mani o beng sek olgeta kandidate mas peim i go long ilektoral Komisina Tras Akaun long olgeta PNGBC beng. Ol kandidate i ken givim dispela nominesen mani tu long kes opis bilong ol Provinsal Treseri (olpela BMS opis).

Mista Kaiulo i tok ol kandidate i mas givim PNGBC o Provinsal Treseri risit bilong nominesen fi bilong ol long ol ritening opisa taim ol i go long nominet.

"Mipela i no inap kism ol pesonol sek," em i tok.

"Na tu, mipela i no inap larim ol politikel pati long peim nominesen fi bilong olgeta kandidate bilong olgeta wanpela bikpela sek sapos ol politikel pati i no raitim gut nem belong ol kandidate bilong ol."

VOT I GAT PAWA  
ENROL NA VOT



LONG Gutnius bilong Mak yumi ritim stori we Jisas i go kaikai long haus bilong wanpela bikman. Na long taim em i wok long kaikai, wanpela yangpela meri i kam insait na i kapsaitim antap long het bilong Jisas sampela sanda i kosim planti mani. Planti man i lukim dispela na ol i komplem long meri ya i westim mani nating. Tasol Jisas i krosim ol na i tok olsem: "Yupela larim dispela meri. Watpo yupela i givim hevi long em? Em i bin mekim gutpela pasin tru long mi. . . . Mi tok tru long yupela, long olgeta hap graun we ol i go long autim gutnius, ol bai toktok tu long samting dispela meri i bin mekim na ol bai tingting long em." (Mak 14: 3-11).

Na tok bilong Jisas i kamap tu olgeta. Tude bihain long tu tausen ya samting, yumi bin autim dispela sem stori gen. Meri ya i no bin mekim wanpela bikipela samting long Jisas. Nogat. Em i bilasim em tasol, em i belgut long Jisas tasol. Na Jisas i laikim.

Ol i stori long wanpela liklik meri i nildaun na wokim nait prea bilong em na em i prea olsem, "God Papa, mekim bai olgeta pipel i


kamap gutpela, na mekim bai ol gutpela pipel i kamap naispela." Ating meri ya i bin painim sampela gutpela pipel i no naispela. Dispela i min ol i no belgut long ol arapela pipel.

Pasin belgut em i min olsem yumi helpim ol arapela pipel long taim ol i no askim yumi yet. Em i min olsem yumi mekim kain kain samting ol arapela i laikim. Em i min olsem yumi tenkyu long ol arapela. Em i min yumi litimapim nem bilong man o meri long taim em i no stap. Em i min olsem yumi smail long taim yumi mas stretim wanpela man o meri. Em i min olsem yumi haitim na karamapim ol asua na mistek ol arapela i bin mekim.

Ol dispela kain pasin belgut i save win oltaim. Olgeta pipel i save laikim ol. Pasin belgut i bin winim moa pipel olsem olgeta hap tok yumi kisim long Baibel. Long taim Santu Augustin i tanim bel na i kamap Kristen, em i bin tok

## TU MINIT ITNGTING

### Wantaim moa: Pasin belgut



FRANK MIHALIC i raitim

olsem, "I no bikipela save bilong Santu Ambros i bin winim mi. Nogat. Pasin belgut bilong em i winim mi."

Long taim yumi belgut long narapela, yumi givim namba long em na yumi soim em yumi laikim em. Long taim yumi belgut na mekim gut long narapela, i olsem

yumi tokim em: "Mi mekim dispela long yu bikos yu spesel samting." Man o meri husat i pilim olsem, em i no inap lus tingting kwiktaim. Ating em bai go nau na mekim pasin belgut long narapela man o meri gen. Em i lo bilong pasin belgut. Em i no ken stap nating. Nogat. Em i mas i go i go.

Pasin belgut em i otametik samting. Yumi no inap lainim long wanpela buk. Nogat. Bilong yumi yet yumi mas belgut na pasin belgut i mas kamaul long lewa bilong yumi. Pasin belgut em i wanpela prut bilong Holi Spirit. Lukim Galesia 5:22.

Em i wok bilong yumi long mekim pasin belgut i otametik samting long laip bilong yumi. Yumi no yangpela tumas, na yumi no olpela tumas long stat. Yumi inap stat nau tasol.

Ol pipel i belgut ol i welkam long olgeta hap bilong graun. Olgeta kantri i laikim ol i kam insait.

Pasin bel gut em i wanpela sot kat bilong winim heven. Em i no save popaia. Maski yu no gat planti arapela kain gutpela pasin, tasol sapos yu bel gut, bai yu win na bai i gat ples na spes bilong yu long olgeta taun na ples na siti na kantri.

Sampela taim sampela gutpela pipel i givim baksait long pasin belgut. Ol i tok em i samting nating. Tasol dispela i no tru. Yu tingim tasol dispela stilman i bin hangamap long diwai kros wantaim Jisas. Em i sambai helpim tok bilong Jisas long taim ol manmeri nabaut i bin krungutim em. Jisas i bin laikim dispela pasin bilong stilman na em i promis olsem long em: "Tude yet bai yu stap wantaim mi long heveh." (L23:43).

Yu lukim, em i winim heven long pasin belgut na marimari bilong em. Sampela taim ol i save givim nem "gutpela stilman" long dispela man. Na ol i tok tru olsem long wanem stilman ya i stilim heven yet long las minit bilong laip bilong em. Na em i mekim olsem wanem? Em i belgut tasol long Jisas.

# Martin Luther priskul lusim tisa bilong ol



• Sampela pikinini i redi long putim ol pilai, danis na singsing bilong ples. Ol papamama tu i sindaun i stap lukim ol pilai samting.

### Kevin Bana i raitim

OL PIKININI long Martin Luther Seminari (MLS) Priskul i lusim tisa na mama bilong ol long dispela mun bihain long em i go bek long asples bilong em long Amerika.

Nem bilong tisa em long Misis Felde. Em i bin kirapim namba wan priskul long MLS we nau planti pikinini i skul long em. Em i meri bilong wanpela Evanjelikal Lutheran Sios misinari, Dokta Felde, husat i bin wok long sampela yia insait long MLS koles insait long Morobe provins olsem din o bosman bilong koles. Pastaim long em i go wok long MLS em bin wok insait long Kaintiba eria long Morobe provins yet olsem wanpela misinari.

Orait, long taim em i go Misis Felde i bin lusim skul long han bilong tupela tisa, Misis Priscilla Bana, Mista John na prinsipol bilong koles long lukim olsem wok long priskul i go het gut tasol.

Bihain long em i kirapim skul long 1990, em i lukim olsem ol wok bilong em i karim kaikai na em i amamas na go. Insait long wan wan yia, skul i gro wantaim mak o namba bilong ol sumatin tu we i surik i go antap.

Stori bilong skul i kamap i go olsem long taim Misis Felde wantaim man bilong em i kam long MLS, planti pikinini i stap tasol i nogat priskul.

Misis Felde i stap, lukluk na skelim pasin we ol papamama i wok long pusim tasol ol pikinini bilong go stret long Gret 1 na em i no amamas tumas long en. Olsem na em i mekim ol wok redi isi isi i stap. Pastaim em i salim wanpela meri, Haga Apolo, bilong kisim trening long sios ejensi priskul trening senta long Malahang. Long wankain taim tu, em i wokim ol buk, liklik blakbod na ol arapela samting bilong ol skul pikinini. Inap long 1993 em i kamapim long ples klia plen bilong em. Long dispela taim nau em i opim skul wantaim namba wan lain 49 sumatin.

Long namba tu yia, namba bilong ol skul pikinini i surik i go antap liklik moa long 52 pikinini. Ol i putim ol i go long tupela klasrum. Wanpela klas i kisim ol prep na narapela i kisim ol pikinini i wokim Kindagaten. Ol i kisim gen narapela tisa, Ruth Baital olsem namba tu tisa. Misis Felde yet i stap olsem prinsipol. Skul i wok long groa isi isi na long 1995, mak bilong ol pikinini i go antap long 68. Olsem na Misis Felde i kisim tupela waspapa na wasmama.

Bikos man bilong em i pinisim taim bilong em long PNG, Misis

Felde i go bek long Amerika long pinis bilong las mun. Tasol em i amamas olsem em i mekim wok long helpim ol pikinini taim em i kirapim dispela priskul long MLS.

Ol pikinini na papamama i bin bung na wokim sindaun kaikai na putim ol singsing danis bilong ples long las wik bilong tok gutbai long tisa na mama bilong ol.

### Yunitek kisim helpim long wokim haus lotu

SPIRITSUEL developmen em i wanpela bikipela samting long laip bilong ol sumatin na yunivesiti i lukim olsem dispela i stap insait long progrem bilong ol. Bos bilong Yunivesiti bilong Teknoloji long Lae Misty Baloiloi i bin tokaut long dispela samting long taim em i kisim K1000 sek mani i kam long PNGBC beng, Lae brens long tupela wok i go pinis.

Mista Baloiloi i bilip strong olsem gutpela kristen pasin, senisim pasin na kamapim gutpela tingting na pasin bilong soim rispek em ol bikipela samting we bai i stiaim gut manmeri long laip, wok na stap bilong ol. Na i no ol bikipela save tasol ol i kisim bihain long ol i pinisim digri skul bilong ol.

Em bin tok yumi ken givim trening na helpim long ol sumatin na long pinis bilong em, ol bai i kisim digri setifiket bilong ol tasol sapos yumi i no helpim ol long senisim laip, pasin na tingting bilong ol yumi i no givim gutpela helpim long ol. Man i bosim Kastoma Sevis wantaim Lae PNGBC

brens Brian Hutchinson i bin givim sek mani long han bilong Mista Baloiloi bilong helpim sanapim wanpela haus lotu o sapel bilong yunivesiti. Olgeta wan wan sios long yunivesiti bai yusim dispela haus lotu long wokim sios sevis bilong ol.

Kos bilong haus lotu bai inap long K150,000. Ol i kisim pinis sampela mani long Australia na Vanuatu bihainim singaut long helpim we yunivesiti i bin putim long Septemba las yia. Mista Baloiloi i tok wanpela polisi bilong yunivesiti em long sanapim wanpela haus lotu we bai ol wan wan sios i makim ol sumatin bai i save wokim ol sevis na sios ektiviti long en bilong stiaim gut ol lida bilong kantri long bihain taim.

Yunivesiti i wok long karimaut ol fan resing bilong kamapim dispela taget mak bilong K150,000 long sanapim haus lotu. Mak long mani we ol i kisim olsem donesen long ol kampani na ol wan wan man na tu long ol fan resing i kamap long K20,000.

### Haus lotu bilong Isip kwin bai sanap gen

WANPELA save grup bilong bikkantri Isip na Frans i stat pinis long sanapim bek retpela haus lotu bilong Kwin Hatchepsut bilong kantri Isip. Isip em wanpela long ol kantri bilong bipo bipo taim Kwin ya i bin stap bipo tru long yia namel long 1504-1584 BC pastaim long Jisas Krai i kamap we i moa long 3,500 krismas i go pinis.

Dispela haus lotu bilong kwin ya em ol i wokim long retpela simen brik na i gat naispela stail bilong em yet. Haus lotu ya i gat bikipela nem tru long stail bilong wokim ol haus long Isip. Ol saveman bilong Isip na Frans husat i mekim wok long stretim na sanapim bek gen haus lotu i tok dispela haus lotu em i wanpela long dispela kain stail ol i wokim long retpela ston long wol. Wok bilong sanapim bek dispela haus lotu bai i pinis long dispela yia.

Insait long dispela retpela haus lotu ya wanpela bot o sip i stap insait long en. I gat bilip olsem dispela sip em ol i bin yusim long karim ol daiman i go long narapela laip bilong ol bihain long ol i dai. Na ol i bin wokim bilong Kwin Hatchepsut. Ol lain i nogat klia save long wanem hap tru dispela haus lotu i sanap nau tasol long ol ripot, King Tutmosis 11 husat i bin kisim ples bilong Kwin Hatchepsut i bin rausim haus lotu ya bikos em i no bin laikim memori bilong kwin long stap.

### Memba pusim lo bilong strongim sios wok

PALAMEN long las wik Fonde i bin oraitim wanpela bil o lo long sanapim Nesenel Kausil bilong ol Sios long kantri. Memba bilong Komo-Magarima Alfred Kaiabe long taim em i mekim dispela singaut i tok dispela lo bai i helpim bod bilong Kausil bilong ol Sios long toktok wantaim nesenel gavman. Na wanpela long ol bikipela samting we bai dispela lo i strongim bod long en em long promotim namba wan samting we i tap aninit long mamalo bilong kantri. Em long wok gut wantaim long promotim integral humen developmen. Dispela i min olsem man i mas gro na develop long olgeta sait we i karamapim fisikel, spirituel, politikel, sosel na long sait bilong tingting.

Kausil ya i gat long en ol memba i makim ol wanwan bikipela sios long kantri we i karamapim Yunaitet, Katolik, Angliken, Lutheran na Baptist Yunien Sios.

Wanpela mosen we ol nesenel palamen memba i bin toktok long en em long gavman bilong katim hap mani we bai em i yusim long ol projek na institusen we ol sios i sanapim. Narapela samting tu em long gavman bilong toktok wantaim kausil bod long faipela yia plen bilong go hetim ol sosel na spirituel developmen progrem.



# Maketu bai salens long Aitape Lumi sit

SEKETERI bilong Difens long bipo, Balthasar Tas Maketu i risain long wok bilong em olsem Fes Seketeri bilong Minista bilong Provinsal na Lokol Gavman Afes, Hon Peter Barter. Em i laik resis long 1997 jenerel ileksen. Mista Maketu em i wanpela bilong ol planti bikman husat i bin lusim gavman wok bilong ol long resis long 1997 ileksen.

Mista Maketu bilong klik ples long Sissano long Aitape distrik long Sandaun provins i bin wok wantaim Minista Peter Barter long 1993 i kam inap nau. Bipo long dispela, em i bin stap olsem Seketeri bilong Madang provins na pastaim long dispela tu em i bin winim taim olsem Seketeri bilong Difens long yia 1982 inap long 1987.

"Long planti yia, mi wok long gavman, mi lukim, harim na ritim planti samting long wok bilong olgeta level bilong gavman. Tasol mi sori tru olsem planti bilong ol dispela samting mi lukim, harim na ritim i no ol gutpela saming long helpim sindaun bilong ol bilong yumi.

Mista Maketu i tok i luk olsem planti lida tru ol i laik helpim ol yet na lus ting olgeta long ol pipel em pipel bilong ol i stap long ol rurel eria long ples. Long stretim dispela pasin nogut bilong ol planti lida, yumi ol manmeri husat bai vot i mas makim o votim ol gutpela lida olsem Sir Michael Somare, Bart Philemon, John Momis, Steven Pokawin,

Bernard Narokobi na Peter Barter. Mista Maketu i tok olsem em i amamas long save olsem planti manmeri long kantri bilong yumi nau i gat gutpela tingting olsem ol i no ken seksek long ol kendidet husat i wok long raun na givim aut ol gris toktok, promis, mani, bia na ol planti arapela samting. Em ol dispela kain kendidet tasol, yumi lukim long planti yia nau, i save bagarapim kantri na ol pipel bilong yumi. Mista Maketu i singaut long olgeta manmeri husat bai i vot long vot wantaim gutpela na stretpela tingting tasol na noken vot wantaim seksek long ol gris toktok o samting.

Planti toktok i kamap pinis olsem dispela 1997 ileksen em i wanpela bikpela na impoten ileksen tru bilong wanem kantri bilong yumi i wok long painim ol kain kain hevi long dispela taim. Na dispela em i no rong bilong ol pipel. Rong i stap long ol lida. Olsem na Mista Maketu i singaut long ol pipel long tingting gut long taim bilong ileksen na autim tiket bilong planti bilong ol lida i stap nau long palamen na makim o votim ol nupela lain i go insait long palamen. Na traim na senisim ol samting long kamapim gut kantri na ol pipel bilong yumi.

Opis bilong Sir Michael Somare husat em lida bilong nupela pati, Nesenel Alaens i tokaut aste olsem Mista Balthasar Maketu em opisel kendidet bilong ol husat bai resis long Aitape Lumi sit long dispela 1997 nesenel ileksen.

## Ol ami wanbel wantaim Haiveta na ljape




• Chris Haiveta.

MAN i go pas long ol ami long rausim ol ovasis Sandline ami, Meja Walter Enuma i tokaut olsem nau bai ol ami i stap isi na redim ol yet long wok bilong karimaut 1997 nesenel ileksen. Meja Enuma i mekim dispela toktok bihain long ol ripot long sampela hevi em ol ami i bin kamapim long ol sampela lain man Kerema na wanpela plisman long las wik.

Meja Enuma i tok ol ami bilong em i kisim toksave pinis long stap isi bihain long bikpela wok ol i bin mekim las mun long askim praim minista, namba tu praim minista na Minista bilong Difens long risain long wok bilong ol. Meja Enuma i tok bai ol ami i no inap pretim ol manmeri o husat memba bilong komyuniti nau. Bikos olgeta samting em ol i lusim i go long han bilong plis fos long karimaut wok bilong ol long lo na oda.

Long las wik, ol ami i bungim ol lain husat em ripot i tok ol ami i bin holim ol na pretim ol las wik. Na ol i bung na sikan long pinisim dispela hevi ol i gat. Olpela Minista bilong Difens Fos, Mathias ljape i tok tu olsem ol i bung pinis wantaim ol ami na ol i sikan pinis. Dispela em pasin bilong Papua Niugini we maski kros na hevi i kamap, tupela lain i save sindaun na sikan na pinisim hevi hariap tasol, Mista ljape i tok.

Mista ljape tu i gat hevi wantaim bodi gad bilong em we ol ami i bin paitim em long Tunde nait long Is Boroko. Tasol Mista ljape i no mekim



• Mathias ljape.

wanpela toktok long dispela bikos bikpela toktok ol i tromoi pinis olsem ami na ol dispela lain i wanbel pinis.

Meja Walter Enuma i tokaut olsem nau ol i nogat wanpela samting long mekim wantaim olpela bos bilong ami Bridegia Jenerel Singirok. Bikos olgeta samting nau i go long han bilong Komisyon ov Enkwari olsem na wok bilong ol tu i stop. Wok ol ami i lukluk nau long en em long redim ol yet long strongim ol plis fos long mekim kamap gutpela wok bilong 1997 nesenel ileksen.

Em i tok tu olsem Operesen Rausim Kwik tu i bin stop pinis. Dispela em operesen ol ami aninit long lidasip bilong Meja Walter Enuma i bin kamapim long rausim ol ovasis soldia bilong Sandline International long las mun.

Nupela Ekting Sief ov Staf bilong PNG Difens Fos, Reg Renagi i tokaut tu olsem pasin ol ami i bin mekim long ol dispela memba bilong pablik na bodi gad bilong Mista ljape i kamap bikos long sampela paul toktok. Tasol ol i stretim dispela pinis olsem na em i askim ol pablik manmeri long Mosbi na olgeta hap long PNG na tu ol niusmanmeri long i no ken pusim hevi o toktok tumas i go long ol ami. Bikos ol ami i luksave pinis long dispela asua bilong ol na ol i stretim pinis wantaim ol lain hevi i kisim ol.

# "Hap mani Lae i kamapim bai stap long Lae," Nalau

## WENCESLAUS MAGUN i raitim

GAVENA bilong Morobe provins, Mista Gerry Nalau wantaim nambu tu bilong em Mista Titi Kristen i tok, Gavman bilong ol i pasim tingting olsem, hap mani i kam long takis bilong ol bisnis long Lae na i go insait long Morobe Provinsal Gavman (MPG) bai i go bek long strongim ol wok bilong kamapim Lae siti.

Mista Nalau i tok long taim bilong Mista Utula Samana, em i save yusim olgeta takis mani MPG i save kisim long ol bisnis insait long Lae na putim i go long ol distrik long developim ol. Tasol Mista Nalau i tok dispela pasin i no kamapim sampela bikpela wok long provins. Em i tok aninit long lukaut bilong em, MPG i bilip, sapos ol i strongim ol wok bisnis insait long Lae na kamapim mao bisnis na ol arapela gutpela wok bilong kisim mani MPG bai i gat moa mani long bihain taim. Wantaim dispela mani MPG i ken go het na givim moa sevis i go long ol wan wan distrik insait long provins.

"Lae siti em i olsem mama kakaruk i save putim kiau. Sapos yumi nogat mama kakaruk bai yumi nogat kiau. Olsem na yumi mas lukautim Lae siti bai em i ken lukautim yumi," Mista Nalau i tok.

Mista Nalau i tok long 1997 MPG i kisim olsem K18 milien long baset bilong em. Insait long

dispela baset, MPG i yusim K9 milien kina bilong kamapim strong ol wok insait long Lae. Mista Nalau i tok tu olsem long ol yia i kam bihain, wanem mani MPG i kisim long takis, hap bilong dispela mani bai i go insait long kamapim ol wok long Lae.

Moa yet, em i tok, gavman bilong em i rausim wok bilong kisim takis bilong graun na i givim dispela wok i go long Lae siti atoriti. Dispela i no min olsem Lae siti atoriti bai wok em yet. Nogat. MPG i gat wok yet bilong lukautim Lae siti atoriti. Mista Nalau i tok, MPG i save kisim samting olsem K4-5 milien olgeta yia long takis bilong graun. "Long April 1, MPG i pasim tok olsem ol Lokol Level Gavman (LLG) tu bai i mas kisim takis long olgeta graun bilong gavman," Mista Nalau i tok. Em i tok olgeta dispela samting MPG i wokim i bihainim stret polisi bilong Rifom Nesenel Gavman i mekim. Nau olgeta 28 LLG long MP i gat pawa bilong kisim takis bilong graun.

Wanpela bikpela as tingting MPG i sanap long strongim wok developmen insait long Morobe wantaim mani ol yet i kamapim em i bikos, nau long dispela taim, planti wok insait long provins i stap long wanem Nesenel Gavman i no bihainim promis bilong ol long givim mani ol i makim pinis long Morobe. "Mipela i les pinis long go askim Nesenel Gavman long ol projek

mani. Olgeta taim mipela i go nok na askim, ol bai tok nogat mani," Mista Nalau i tok. "Olsem na gavman bilong mi long 1997 na i go 2000 bai traim yusim ol mani mipela i kisim long ol takis insait long provins bilong strongim wok kamap long Morobe," em i tok. Mista Nalau i tok, MPG bai i no inap kamapim ol nupela projek long dispela yia na long ol yia i kam long wanem ol i gat bikpela laik long stretim ol sevis gavman i i givim pinis. Mista Nalau i tok ol sevis ol i lukluk long ol i olsem, skul, haus sik, rot, bris, ples balus, na ol arapela.

Wanpela bikpela eria bilong statim wok developmen long Morobe, Mista Nalau i tok, em bilong stretim olgeta rot insait long Lae siti. "Mipela i askim Nesenel Gavman long givim mipela mani bilong stretim ol nesenel rot insait long provins planti taim, tasol askim bilong mipela i luk olsem i go insait long ia bilong ol ia pas man," em i tok. "Olsem na nau mipela i kisim pinis samting olsem \$43 milien Australian dola aninit long AUSAID projek bilong dispela wok taim mipela i go askim ol," Mista Nalau i tok. Em i tok, ol bai yusim K4 milien bilong dispela mani long stretim rot long Malaghan Industriyel senta na Intanesenel Fud Kooperesen. MPG bai yusim arapela hap bilong dispela mani long stretim olgeta rot long Lae na long provins.



## FEDERATION OF SAVINGS AND LOAN SOCIETIES LIMITED

### MADANG SEVING NA LON SOSAITI

Madang seving na lon sosaiti i wanpela Kopreitiv ol i statim aninit long Mama Lo bilong Seving na Lon Sosaiti.

Gavana bilong Benk bilong Papua Niugini husat i Rejistra o Bosman bilong ol Sosaiti i oraitim wok bilong pinisim Sosaiti.

Long mun Mei 1992 Gavana i makim mi olsem "Liquidator" man bilong pinisim wok bilong dispela sosaiti.

Long statim dispela wok mi bin askim ol Menesa, Direkta ol i holim wok bipo wantaim ol memba long painim ol pepa, buk na ripot bilong wanwan memba na sosaiti na givim long mi. Mi no kisim gutpela helpim.

Nau mi laik singaut gen long Menesa, Direkta long bipo na memba long toksave long mi long we mi nap kisim ol buk, rekod na ripot bilong dispela sosaiti.

Plis toksave long mi long edres long dispela pepa.

**Luke Misa Polangou**  
**Liquidator**  
**C/- P.O. Box 6200, Boroko**  
**PH / FAX: 321 1918**



# Wanbel mas kamap

I NO gutpela tumas long toktok long belisi pasin o pis. Wanpela i mas bilip long en. Na ino gutpela tu long bilip long en nating. Tasol wanpela i mas soim long pasin bilong em yet long laip bilong em olgeta de. Insait long em yet, famili bilong em hauslain na wanem bung em i stap insait. Tingim, i no trupela piksa na bai i nogat kaikai long tokim narapela long belisi taim yu yet i nogat belisi insait long yu yet.

Sampela taim man o meri kran-gi pinis na bagarapim arapela na bai tok sori na bel isi. Sampela taim dispela ino trupela bel isi. Bikos dispela man o meri i mekim rong pinis i laik daunim tasol belhat o bel kaskas na sem bilong brata na susa em bagarapim pinis.

Tasol salens i stap long man na meri i kisim bagarap na sem tu long fogivim brata i bagarapim em. Mi bilip sapos yumi gat dispela belisi insait long yumi yet, bai God i blesim yumi, famili bilong yumi, komyuniti bilong yumi, hauslain na kantri bilong yumi wantaim bikpela belisi bilong em.

Las wik mi tok long holim pasim bilip bilong yu wanwan, famili, komyuniti na pipel. God i stap wantaim PNG. Bikos yumi soim long pasin na laipstail bilong yumi ol Melanesia pipel bilong Papua Niugini. Yumi pait kros tasol yumi ken stretim wantaim belisi.

Wantaim dispela het tok mi laik glasim sampela blesing bilong God long PNG. Ol kristen i amamas tru long marimari bilong God long Papua Niugini. Mi toktok wantaim planti kristen brata na susa long wiken na ol i tokim mi God i kapsaitim marimari na bel isi


bilong em pinis long ol hevi, ol pipel na lida bilong PNG.

Kaikai bilong dispela blesing yumi lukim pinis insait long trabel i bin kamap long las tupela wik i go pinis insait long kantri. I bin gat belhat na kros nambaut tasol nogat bikpela pait kirap na tu nogat man i dai. Long sampela kantri bilong wol, taim dispela kain hevi stap, kilim man dai kalabusim man na meri i bikhet i save kamap. Na pait i save go het yet. PNG mi bilip i win na wok long soim ol narapela kantri yumi ken stretim ol hevi bilong yumi yet long wet bilong yumi yet.

Ol kristen i bilip. Operesin Brukim Skru i karim kaikai. Em prea bung bilong olgeta Kristen sios insait long kantri i askim God long blesim PNG i mas gutpela na lleksin 97 i mas nogat trabel na pait. Na insait long Katolik Sios las Sande 6 Epril i bin pestude bilong Divain Mest (Holi Marimari bilong God i nogat pinis bilong en).

Dispela em nupela pestude insait long sios. Ol i save makim long namba wan Sande bihain long Ista. Dispela i bihainim dri-man (Visin) Jisas i bin soim wanpela Katolik Sista, Sista Faustina long Kantri Polen. Na ol Katolik i bilip na lukim tru kaikai bilong Divain Mesi. (Divine Mercy) insait long planti kantri insait long Wol.

Insait long Papua Niugini i gat tu ol Divain Mesi Crup. Na las wik ol i bilip ol i bin lukim marimari bilong bikpela i no gat pinis bilong em i



kapsaitim antap long Papua Niugini. Dispela soim olsem ol kristen wari long kantri bilong PNG na i prea strong i stap. Wanpela piksa em, Deputi Praim Minista i sanap long sari nau Chris Haiveta, wanpela Katolik na Difens Minista (SDA) husat sanap long sari nau, Mista Mathias Ijape i holim wanpela belisi kibung wantaim ol bik-man bilong ami na sikhian.

Na ol i promis long givim dispela belisi igo long ol pipel gen long stret long Mosbi siti na narapela hap bilong kantri. Glasim Lewa na tingting i amamas gen long Haiveta na Ijape, na olgeta ami na ol lain i advaisim ol. Ol i soim gen pasin bilong gutpela na trupela lida long bringim belisi na sikhian namel long ol yet na sapota bilong tupela lida na PNG Difens Fos.

Tupela bikman i mekim dispela bihain long ol sampela ami opisa na soldia i holim pasim na paitim ol opisa na sekyuriti gad bilong Haiveta na Ijape las wik. Yet tupela soim gen pasin bilong yumi

ol pipel bilong Melanesian pipel, na lidasip stail bilong yumi. I gat as kros na hevi save kamap namel long tupela man o meri, o tupela grup o pipel.

Gutpela lidaman i gat belisi insait long em yet, na husat i no laik hevi stap yet namel long ol pipel i mas sanap namel na bringim wanbel na sekhan. Lida i mas glasim gut hevi, as bilong hevi, na skelim na traim stretim hariap. Em we bilong yumi ol pipel bilong Papua Niugini. Yumi mas holim pasim dispela gutpela pasin tru, stail i win moa yet.

Sapos yumi wanwan i mekim disepla olgeta de taim yumi lukim hevi namel long tupela brata na susa na komyuniti. Bai i gat gutpela na bikpela senis i kamap long kantri bilong yumi. Na yumi mas kamap wanpela gutpela piksa long ol arapela kantri tu. Kisim hevi, tanim tanim, glasim gut na stretim wantu. Yumi mas kamap namel man tru tru na piksa tru bilong belisi pasin.

### Wanpela piksa tru bilong belisi i kamap

Glasim Lewa na Tingting i laik tok amamas long Sajan Jack Wek, bodi gad bilong Mathias Ijape. Sampela ol belhat i holim pasim em long Is Boroko long Mosbi karim i go PNGDF Het Kwata long Murray Barks long las wik Tunde nait 2 Epril, 1997.

Tasol em i fogivim ol soldia i paitim em. Em i tok belisi bilong

bikpela i stap wantaim ol. Ol i no save, husat ol i paitim, na bilong wanem ol mekim dispela. Bai ol i luksave long marimari bilong bikpela na tok sori Jack i tok.

Em i tok mi mekim wok bilong mi tasol olsem plisman long lukautim kantri bilong mi PNG na ol lida bilong kantri. Na ami tu i gat wok long seving dispela kantri olsem mi. Tasol ol kisim mi krangi. Yes PNG, belisi bilong Sajan Wek i mas kamap piksa tu long yumi olgeta.

### "Bogenvil" PNG i laikim yu olsem pikinini lewa

Liklik askim bilong mi long BRA insait long lewa na tingting. Aiwara bilong ol grasrut pipel bilong Papua Niugini, na wari long lewa bilong ol mama na pikinini long Bogenvil i mas min samting nau. Ol pipel bilong PNG i bin straik long las tupela wik bikos ol i no laikim moa laip i lus long Bogenvil.

Tausen, mama na pikinini bilong Bogenvil, aiwara i drai nau. Na wari bilong lewa i kamaut, 9-pela yia i longpela taim tumas long karim pen. Tingim. Em taim bilong tok sori long olgeta pikinini na mama na lapun long Bogenvil. Wanbel na stap belisi gen.

Belisi bilong bikpela i nogat pinis bilong em, i stap wantaim yupela olgeta. Yumi wan kantri, wan nesen na wan pipel, wan famili. Na yumi mas sanap olsem oltaim. Hevi kamap long yumi long sekim, glasim na skelim bel bilong yumi. Luksave long gutpela rot na wok-about wantaim gen olsem brata na susa bilong wanpela papa na mama. Inap yumi traim gen.

## Bai yumi tromoi ston long husat?

### GLASIM POLITIK wantaim WENCESLAUS MAGUN

Bai YUMI tromoi ston long husat? Long Baibel, ol Juda i kisim wanpela pamuk meri i go long Jisas na askim em long painim aut inap ol i kilim dispela meri. Long bilip bilong ol Juda, pamuk meri em i sin meri na olsem lo bilong ol i tok ol i mas tromoi ston long em i go inap em i dai. Tasol Jisas i bekim tok long ol i spik: "Sapos wanpela bilong yupela i nogat sin orait kisim ston na sutim dispela meri." Bihain liklik, Jisas i raitim sampela samting long wesana na isi isi, wan wan bilong ol dispela man i lusim dispela pamuk meri wantaim Jisas na i go. Jisas i lukim dispela na i tokim meri, "mi tu i no inap tromoi ston long yu, go na noken mekim sin gen."

Long 1989 Sam Kaona wantaim ol lain bilong em i askim Papua Niugini Gavman inap Bogenvil i kisim independens. Stat bilong dispela hevi i bin kamap, taim Kaona wantaim ol lain bilong em i luksave long bagarap Bogenvil Kopa main i mekim long naispela ailan bilong ol.

Hevi bilong Bogenvil long bruk lusim PNG em i no nupela samting? Bipu yet long Sev Gavman i kam inap long Independens na nau 8pela yia bihain long Independens, ol sampela lain long Bogenvil i laikim Independens.

Yumi ken lukim olsem, ol lain long Bogenvil i pait long lusim PNG na kisim Independens i bilip long ol yet. Ol i amamas long God i mekim ol spesel. I nogat rong long dispela. Yumi olgeta God i mekim yumi spesel na dispela em i rait bilong yumi. Nogat narapela man i gat rait long kam na bosim laip

bilong yumi. Tasol insait long dispela spesel rait bilong yumi wan wan, yumi i gat wok tu bilong respektim ol narapela. Yumi i gat wok kilim lukautim laip bilong yumi yet na laip bilong ol narapela. Taim yumi mekim dispela, yumi mas glasim wanem samting bai kamap long pasin yumi mekim. Olsem sapos yumi kilim narapela bikos yumi bilip long rait bilong yumi, bai ol lain bilong manmeri o pikinini yumi kilim i stap olsem wanem? Mi tromoi dispela wankain askim tu i go long PNG gavman. Sapos yumi go kilim ol lain long Bogenvil olsem i bin kamap pinis, bai sindaun bilong ol pipel long Bogenvil na famili bilong ol lain ami na plis husat i dai pinis bai stap olsem wanem? Olgeta samting yumi laik mekim o mekim i gat as. Na wanem samting yumi laik mekim o mekim pinis i gat bekim bilong en tu. Sampela taim as tingting bilong mekim samting em i no gutpela. Na tu sampela bekim bilong samting yumi mekim i gutpela. Tasol sampela bekim bilong samting yumi mekim i no gutpela. Mi les long lukim ol man i mekim gutpela pasin wantaim as tingting bilong kisim bekim we bai i bagarapim sindaun bilong ol narapela man.

Glasim pait long Bogenvil. PNG gavman i baim ol praivet ami olsem ol Sandlines long kam go pait long Bogenvil, tasol nau ol i go pinis. Glasim tu pasin Kaona wantaim ol lain bilong em i mekim bilong kisim Independens. Kaona i yusim gan. Na PNG gavman i yusim gan. I tru PNG Gavman na Kaona i wanbel long stretim dispela hevi long pasin Melanesia bilong sindaun na toktok na painim stretpela rot bilong stretim dispela hevi. Tasol bihain ol i lusim stretpela rot.

Taim ol i pulim taitim toktok i go na lukim olsem tupela sait wantaim i no inap kamap long wanbel na pasim wanpela tingting. Tupela sait wantaim i laik soim pawa na strong bilong tupela long pasin bilong pait. Insait long olgeta dispela hevi, Olpela Praim Minista Sir Julius

Chan, na gavman bilong em i laik yusim ol Sandlines long helpim PNG gavman na go pait long Bogenvil. Mi tok gen. Tingting bilong pinisim hevi long Bogenvil i gutpela, tasol pasin PNG gavman i mekim aninim long lukaut bilong sampela ol Praim Minista bilong yumi i no gutpela. Nau em i no taim bilong tok Chan yu asua. O Somare yu asua. O Momis yu asua. O Namaliu yu asua. O Wingti yu asua. O Kaona yu asua. Nogat. Wan wan bilong olgeta dispela lida i gat gutpela tingting. O i no man nogat. Bilip bilong wan wan bilong ol i strong long painim stretpela rot bai ol i ken bihainim long kisim wanem samting ol i dri-man long en. Bikos ol bilip strong long kisim dispela dri-man, nogat wanpela samting inap stapim ol. Na olsem ol i kamap wantaim kain kain rot bilong stretim dispela hevi. Sampela rot i bin gutpela. Tasol, rot nau Chan wantaim gavman bilong em i mekim, em i no stret. Dispela i bringim ol pipel bilong PNG long singautim Chan long pinis long Praim Minista. Mi no ting Chan i laikim ol Sandlines long go kilim ol pipel long Bogenvil. Nogat. Mi ting, long tingting bilong em, em i laik painim wanpela rot tu bilong stretim dispela hevi. Tasol i luk olsem em i go tumas.

Na olsem wanem long Kaona? Ating pasin Kaona i mekim em i gutpela? I gat wanpela tok bokis i tok "yu no inap bosim hos long dring wara." O "yu i no inap tokim man long plai olsem ol pisin." Moa yet, "yu i no inap tanim man i go kamap pik, na pik i go kamap man." Kaona em pes man bilong statim dispela 8 yia hevi long Bogenvil. Na Kaona bai las man long pinisim dispela hevi. Mi respektim Kaona na PNG gavman. Yumi olgeta i laikim bel isi. Yumi olgeta i laikim gutpela sindaun. Yumi olgeta i no laik pait. Yumi olgeta i no laik kilim narapela. Tasol yumi olgeta i no laik narapela man i bosim yumi tu. Na dispela em i as bilong hevi nau i kamap i go bikpela long Bogenvil. Sapos olsem, orait husat i mas givap? Kaona o PNG Gavman?

## Ol pipel i win o?

OL AMI i amamas. Ol NGO i amamas. Ol studen i amamas. Bikos ol i mekim Sir Julius, Mista Ijape na Mista Haiveta i lusim wok bilong ol long taim wok painimaut i kamap long pasin gavman i bin kisim ol paitman bilong ovasis i kam insait long kantri. Tasol olsem wanem long ol arapela lain long kantri? Olsem wanem long ol lain long ol setelmen long ol taun na ol asples long ol provins. Ol i amamas o?

Mi toktok wantaim sampela lain long ol setelmen long Mosbi. Planti i luksave long ol wari em ol ami i bin pait long en. Ol i amamas bikos ol i ken go painim kaikai na go bek long wok. Tasol planti i no klia sapos dispela hevi long las wik na pasin Sir Julius i mekim bai helpim long kamapim gut sindaun bilong ol o nogat. Sir Julius bikmaus tu olsem ol singaut long en long lusim wok i kam long liklik lain tasol long Mosbi. Na i no long biklain PNG. Em i tru o nogat? Mi tok em i no tru. Planti pipel long kantri i nogat bilip long en.

Mi tok olsem ol singaut em ol singaut bilong ol pipel bilong Papua Niugini husat i painim rot bilong daunim pe bilong rais na tinpis. Em singaut bilong ol asples husat i laikim pe bilong haus sik na skul fi i mas go daun. Sir Julius na Chris Haiveta i no bin inap long mekim dispela i kamap. John Giheno na Andrew Baing i no inap mekim dispela i kamap long liklik taim ol bai stap olsem namba wan na namba tu bilong kantri. Mi no ting ol i gat tingting long dispela tu. Tupela i bin stap olsem sinia memba bilong kabinet bilong Chan/Haiveta.

Yumi mas wet inap long pinis bihong neselent ileksen long Jun. Na sapos yumi inap long rausim olgeta memba i stap nau long palamen, ating bai yumi gat sans long lukim sampela hevi bilong mipela i go daun. Sapos nogat bai yumi wet 5-pela moa yia.

Olgeta wari bilong pasin gavman i bin kisim ol paitman bilong ovasis i



kam long Papua Niugini na helpim gavman long pinisim hevi long Bogenvil i stap nau long han bilong komisin i mekim wok painimaut. Ol yet bai tokaut sapos i bin gat rong long dispela o nogat. Mi askim gavman na ami na ol arapela long larim dispela wok painimaut i pinisim wok bilong ol. I gutpela long harim olsem Ombudsmen Komisin i askim long stap long dispea wok painimaut tu. Jeneral Singirok i bin askim tu sapos ol i ken senisim wok bilong komisin long karamapim ol arapela samting. Tasol Jas Warwick i no oraitim dispela tupela askim.

Ating em ol i gutpela askim na gavman i mas painim sampela rot long oraitim ol dispela askim sapos ol i laik rausim ol rong tingting i stap wantaim ol pipel.

Nau ol niuspepa i tokaut olsem Sir Julius na Chris Haiveta i kisim tupela loya bilong ovasis long makim ol long kot. Husat bai baim ol dispela loya? Gavman i nogat ol loya o? Inap sampela lain i toksave. Ol pipel i lusim planti mani pinis long Sandine. Nau ol i mas givim moa mani long ol loya.

Las wik Sir Julius i lusim wok olsem Praim Minista. Sir Julius i lus. Na palamen tu i lus. Sapos palamen i bin vot long rausim Sir Julius taim vot i kamap long 25th Mas, dispela bai soim olsem demokresi i stap yet long Papua Niugini. Mi laik bilip olsem pundaun bilong Sir Julius na ol wanwok bilong em bai mekim dispela kantri i kamap strongpela moa.



# Bisnis trening bilong ol meri

MOA LONG 90 meri i makim ol provins insait long kantri bai i stap insait long wanpela woksop long Mosbi bilong skruim save long ranim ol wok bisnis.

Kos bai i go het long wanpela wik. Em bai i stat long neks wik Mande Epril 14 na pinis long de 21. Bai ol i holim kos long Institut ov Pablik Edministresen long Waigani. Dispela em ples we ol meri bai i slip na kaikai long em tu.

Presiden bilong Nesenel Kaunsil bilong ol Wimen (NCW) Susan Setae i tok ogenaissen bilong em, NCW wantaim helpim bilong Smol Bisnis

Developmen Senta (SBDC) bai i lukautim dispela woksop. Wanpela saveman long bisnis, Sam Tammy bilong Enteprenereel Trening senta bai i kodinetim kos.

Misis Setae i tok bikpela lain bilong Provinsal Kaunsil bilong ol Meri i laik helpim ol meri i skruim save long ranim ol wok bisnis, bihain long ol i kisim sampela helpim aninit long distrik kredit skim.

Em i tok ol meri insait long ol provins i gat bikpela laik tru bilong kam stap na lainim ol samting bilong skruim save long ranim ol bisnis

progrem insait long ol provins na ples. Olsem na ol i peim tiket bilong balus ol yet bilong kam long Mosbi na tu ples bilong kaikai na slip long en insait long wanpela wik kos. Fi we wan wan meri i peim long karamapim kos em long K180 na pe long ples bilong slip em K35 long wanpela nait.



• Ol mama i kamap bung long bikpela woksop bilong ol.

## 1996 gutpela yia bilong BSP beng

BENG bilong Saut Pasifik (BSP) i bin mekim profit o winmani inap long K6.4 milien long las yia. Dispela em winmani beng i mekim bihain long takis. Olgeta profit beng i bin mekim bipo long rausim takis em long K8.2 milien. Mak ya em i K3.9 milien winim winmani we beng i bin mekim long 1995. Beng i bin tokaut long ol dispela samting insait long anuel jenerel miting bilong em las wik we ol i bin glasim ol wok kamap bilong beng long 1996. na wanem samting ol bai i mekim long 1997 long go hetim gut wok bilong beng insait long kantri.

Bihainim anuel ripot, manesing dairekta bilong BSP Noel Smith i bin tokaut olsem beng i wok long go strong na mekim gutpela wok long olgeta sait bilong operesens long kantri. Long sait bilong diposit, mak long 1996 i bin sanap long K284.5 milien, K53.8 milien moa winim winmani we em i bin mekim long 1995. Mak bilong lon o dinau mani i bin go antap long K160 milien, winim dispela bilong 1995 we i bin stap long K20.9 milien. Ekwiti bilong ol seaholda i bin go antap long K18.4 milien. Dispela i K3.3 milien winim mak bilong 1995.

Tupela bikman bilong beng, Mista Noel na Siaman Noreo Beangke i bin amamas long gutpela wok kamap beng i bin mekim long 1996 na ol i luksave long hatwok bilong ol wok manmeri long olgeta han bilong BSP long kantri. Ol i bin tokaut tu olsem beng i bi opim tupela nupela han long Niugini Ailans rijon we i bin kamapim ol gutpela wok long pulim moa bisnis na mani long BSP. Em long Lihir insait long Nu Ailan na Rabaul long is Nu britten provins. Kokopo i kamap olsem wanpela brans o han nau bihain long maunten paia i bin bagarapim Rabaul taun na olgeta wok bilong beng em ol i bin surukim long Kokopo. Tasol taim ol samting i bin kamap orait liklik las yia, ol i bin opim sab brens long Rabaul.

Beng i lukluk tu long opim wanpela brens long Madang. Mista Smith i tok beng i lukim olsem Madang em i wanpela ples long wok bisnis i kamap gut. Em i bin tok beng i save skelim pastaim benefit o ol gutpela samting long sait bilong kos bipo long em i mekim disisen long kirapim ol bisnis long wanpela hap na dispela em i skelim pinis long Madang.

Tupela bikman i bin tokaut olsem 1977 em i wanpela hatpela yia tasol beng bai i go het strong long givim sevis i go long ol kastoma bilong em long kantri. Mista Noel i bin tok beng i wok long kamapim strong ol wok bisnis insait long Nesnel Kapitel distrik wantaim opening bilong nupela bisnis opis bilong em long Gordens. Nupela opis ya i lukautim ol bisnis ektiviti, wok long dinau mani na ol arapela bisnis ektiviti bilong beng. Em i tok tu olsem klostu taim nupela brens bai i op long Waigani Draiv we i stap long narapela sait bilong Stop N Shop stua. Taim dispela nupela han bilong beng i op, han bilong BSP beng long Boroko na Waigani klostu long Vulupindi Haus bai i pas na ol bai i kam aninit long en.

Tupela Mista Noel na Beangke i tok beng long dispela taim i toktok wantaim ol ovasis bisnis lain long tokim ol olsem PNG em i wanpela gutpela ples bilong karimaut wok bisnis long en.

Mista Noel i tok Kundu Sevis akaun i wok gut tru long NCD na nau em i pulim moa long 1,500 kastoma long en. Anuel Generel bung ol i bin tokaut tu long moa long K3 milien mani we bai ol i peim i go long ol sea holda. Dispela em i makim 33 peaut i go long ol seaholda long wan wan sea.

Long dispela miting tu, ol i bin makim gen ol olupela bod dairekta memba long sanap bek long wok bilong ol.

Dispela em Mista Beangke i kisim bek wok olsem siaman, Tom Fox olsem deputi siaman, Mista Smith olsem manesing dairekta na ol arapela eksekutiv dairekta bilong bod ol i stap yet long ol posisen bilong ol, i nogat sens i kamap long ol.

# NISSAN URVAN

## Em PMV Bus Bilong Yumi



15 Seats, Bull Bar,  
Side Stripes,  
White Wheels  
and AM FM Radio

...all for only  
**K24,500.00**


Plus on road costs

AVAILABLE NOW AT...

**BOROKO MOTORS**  
THE GOOD GUYS FOR THE BEST BUYS

PORT MORESBY: 325 5255 LAE: 472 1144 RABAU: 982 8458 KIMBE: 983 5566 MADANG: 852 2433 MT. HAGEN: 542 1433 HIGATURU: 329 7175 TABUBIL: 548 9061






Rancho-Santa Fe, California: Amerika.


Marshall Applewhite em lida bilong wanpela rilijes kalt grup ol i kolim long Heavens Gate. Applewhite husat ol i save kolim em tu long "Do o Pater John" i bin dai wantaim 38 arapela kalt memba long lita wik bihain long ol i kilim ol yet. Applewhite yet i bin suvim ol arapela kalt memba long kilim ol yet bikos long strongpela bilip olsem wanpela spesip bai i kam long dispela taim na kisim ol i go long heven. Ol i bin bilip olsem dispela spesip i hait baksait long teil bilong wanpela bikpela sta ol i kolim long Hale-Bopp. Sta ya i save abrusim graun bihain long 4,000 na taim bilong em long mekim dispela em long las mun, bipo long dispela kalt lain ya i kilim ol yet. Applewhite i bin tok em i Krai. Bodi bilong olgeta 39 pipel em ol i bin painim long bikpela haus we ol i save stap long en long Santa Fe mense long San Diego, California. Long las ya Oktoba yet, grup i bin wok long redi long dispela dai bilong ol bihainim kamap bilong dispela sta Hale-Bopp long las mun.

Applewhite i bin tokim ol wanbilip bilong em olsem long go insait long dispela spesip bilong kisim ol i go long gutpela ples lusim graun, ol i mas lusim bodi bilong ol na lewa bilong ol tasol bai i go bungim spesip taim em i spit i go bihainim Hale-Bopp. Olsem na 21 meri na 18-pela man husat i gat krismas namel long 21 na 72 i bin kilim ol yet bihain long ol i dringim posin marasin. Taim ol plis na atoriti i painim ol bodi bilong ol, ol i bin painim ol beg bilong ol i pekim redi i stap wantaim paspot, draivas laisens, \$5 pepa mani na sampela koin mani long poket trausis bilong ol. Planti bilong ol i bilong ol i kam long ol ples olsem Nu Meksiko, California, Colorado, Texas, Utah na Washington. Wanpela i bilong Ohio na narapela i bin gat bet setifiket pepa bilong Kanada.

• RAITHAN: Kaikai i pulap kapsait! long Seoul, Saut Korea. Taim ol pipel bilong Saut Korea i gat gutpela sindaun na amamas wantaim ol samting i mekim laip na stap bilong ol i go gut, ol brata bilong ol long Not Korea i kisim taim long kaikai i sot. Ol strongpela kantri i bin brukim ol i go long 2-pela kantri tasol ol pipel i gat wanpela tokples, pasin kastom na ol i wanpela pipel. I gat toktok long 2-pela Korea bai i bung na kamap wanpela gen olsem Gemani tasol planti pipel long saut Korea i wari na pret bikos planti hevi i ken kamap long wanem laip na sindaun long Not Korea i no gutpela tumas olsem long saut.



• Hevi we pait na sindaun nogut i kamapim i mekim ol pipel i stap wantaim pret. Hia wanpela famili bilong kantri Albania i ranawe taim ol plis i paiarim ol gan long rausim planti man i bung long Duress bris. Papa i karim tupela pikinini na ron wantaim mama long hansut i bihainim na ron wantaim famili.



## STRONGPELA EMPLIFAIA bilong ka Kaset bilong Ileksen

Em i ileksen tul bilong yu long bikpela ka long 1997. Yu ken pilaim ol toktok yu rekotim long dispela bekpela na strongpela PA sistem.



### Characteristic

1. Em i ken strongpela na i ken stap longela taim.
2. I noken wari long pawa. Em i gat sot seket was bilong em.
3. Yu ken yusim 12 volts ka, bateri o AC 240v pawa poin long pilaim dispela emplifaia.
4. Em i gat tupela tupela spes bilong konektim tupela maikrofor.

### Specifications

TYPE: Mixer Power Amplifier  
 POWER OUTPUT: 15 watts, less then 3% THD at 1 kHz rated power.  
 REQUENCY RESPONSE 150Hz-15kHz ±3dB  
 INPUTS: MIC-1, MIC-2 (-42dB) 10k ohms/50k ohms  
 AUX (-20dB) 10k ohms/50k ohms

POWER SUPPLY: AC OR DC 12V  
 DIMENSIONS: 245X220X78mm  
 WEIGHT: 3.4KGS

- |                            |                     |
|----------------------------|---------------------|
| 1. Power switch            | 6. Cassette holder  |
| 2. MIC-1 volume control    | 7. Polit lamp       |
| 3. MIC-2 volume control    | 8. MIC-1 phone jack |
| 4. TAPE/AUX volume control | 9. MIC-2 phone jack |
| 5. Play polit lamp         | 10. AUX phone jack  |

**K550** i karamapim wanpela yunit PA ka emplifaia Kaset pilaia, wanpela maikrofon, wanpela bikpela spika yu ken pasim long ka. Ol lain i stap ausait long NCD i mas salim arapela K50 antap long baim balus long salim i go long yupela. Plis raitim Benk Sek or Salim Mani Kwik long:



KEYSTONE TRADERS PTY LTD  
 P.O. BOX 7904, BOROKO, NCD.  
 PHONE: 323 6618 FAX: 323 6648  
 Attn: THE MANAGER

(Price quoted excludes installations).

Available at  
**KEYSTONE SHOP ORI LAVI HAUS, UNIT 1, GROUND FLOOR**  
**TOLEC ELECTORICS, P O BOX 822, LAE**



# LAPSTAIL



□ Nek bilong Kanage i drai na em ron siksti i go long wanpela stua. Em holim 40 toea na subim i go long stua kipa na tok, "angol o, mi laikim wanpela loliwara". Stua kipa holim mani bilong Kanage na subim i go bek na tok, "ol loliwara i no kos 40 toea. Ol i kos 50 toea". Kanage strong na subim mani ya i go bek gen. Tasol stuakipa i pusim mani i go bek. Stua kipa kirap na tokim Kanage, "ol loliwara bilong 40 toea em pinis long aste. Sapos yu bin kam aste, bai yu ken baim long 40 toea". Kanage harim na bekim tok, "em orait, yu givim mi wanpela loliwara bilong aste i kam. Loliwara bilong nau em 50 toea tasol sapos bilong 40 toea long aste i stap, orait givim mi wanpela". Yu save Kanage i no man bilong painim toktok ya.

**John Solo  
Lae**

■ Kanage i raun long pmv bas long wiken. Insait long bas, wanpela yangpela meri i kam na sindaun klostu long sait bilong Kanage. Bas i ron i go na taim bas i saitim long kona, bai meri ya i muv i go pas long solda bilong Kanage. Na taim bas i tanim long sait gen, bai Kanage tu i muv i go pas long solda bilong meri ya. Mekim i go na i no longtaim, bas i laik saitim stret na Kanage i muv i go pas long meri ya na han bilong em laik giaman holim sait bilong sia na em abrus na tasim susu bilong meri ya. Meri ya pilim olsem na em tanim na tokim Kanage, "yu ting em hap kaukau bilong yu na yu holim ah?, yu ken holim tasol na mekim han bilong yu i amamas. Samting tru bai ai bilong yu i no inap lukim ya". Kanage harim na bek isi tasol, "olsem mi pilim sais bilong em tasol, em i liklik yet o nogat. Sapos em liklik yet, em soim olsem em i no gat save yet". Turangu meri ya i nogat toktok na i no moa bekim toktok bilong Kanage.

**Morgan Mack  
Kimbe**

□ Kanage kisim junia bilong em na tupela raun i go maket. Tupela raun i go na Kanage bungim wanpela olupela pren meri bilong em. Olsem na Kanage kirap na tokim junia bilong em olsem, "nau yu mas kolim sinia. Noken kolim mi daddy, harim ah". Kanage giaman baim kaikai i go na kamap klostu long prenmeri bilong em na tasim em long beksait bilong em. Taim meri ya tanim, em tokim Kanage, "yu tasim mi i go i go na mi les pinis. Traim na kolim nem ya, yu lusim tingting long nem bilong mi pinis o olsem wanem?". Na Kanage tok, "sori lewa, nem na pes bilong yu i lok tru long kru na lewa bilong mi ya". Liklik junia harim na em tokim Kanage, "sinia, na yu tok yu save laikim tru mami na olsem wanem gen?". Taim prenmeri bilong Kanage harim em askim junia, "na daddy bilong yu we?". Junia nogat toktok na lukluk i go long Kanage. Man turangu Kanage kisim bikpela sem tru bikos junia kamautim trik bilong em pinis.

**Conman Kanage  
Mosbi**

**Moa tok pilai long pes 13**

## Pasin bilong bung wantaim na waswas

INSAIT long Papua Niugini, yumi i gat pasin we ol man yet i save bung wantaim na i go waswas long wara. Na ol i save makim olsem em wara bilong ol man tasol long waswas. Wankain tu, ol meri i save i gat wara bilong ol yet long waswas long en. Olsem na ol meri tasol i save bung na i go waswas long dispela hap. Dispela em wanpela kain pasin yumi i gat long planti hap provins na ol liklik ples bilong yumi.

Sapos i nogat dispela kain wara bilong ol man stret o ol meri stret, orait yu ken lukim olsem sapos ol man i waswas long wanpela hap wara, ol meri bai wet inap ol man i waswas pinis orait ol bai i go waswas gen. Long arapela hap bilong Papua Niugini tu, i gat dispela kain pasin tu i stap.

Orait mi laik stori liklik long luksave bilong mi long ol Japan manmeri long dispela kain pasin bilong ol long waswas. Mi bin harim olsem ol Japan man i save bung na i go waswas long wanpela hap bilong ol yet. Bai ol i save rausim olgeta kolos bilong ol na ol i mas waswas wantaim. Pastaim mi ting bai ol meri i wasim ol man. Tasol taim mi yet i bin raun long hap, mi bin luksave long dispela pasin.

Mipela i bin pilai pinis na ol yangpela manki Japan i tokim mipela long go waswas. Na mi ting bai mipela i go long swim pul o long batrum. Na mipela i kisim ol tawel bilong mipela na wokabaut i go insait long waswas haus. I gat tupela dua na ol i hangamapim retpela na blupela laplap long dua na raitim tok ples Japan long en. Yumi no save long ritim tokples Japan na mi bai save olsem wanem. Tasol laki olsem mi go wantaim ol Japan man olsem na mi bihainim ol tasol. Retpela laplap i soim olsem em dua bilong ol man long go. Na blupela laplap i soim olsem em dua bilong ol meri long go insait na waswas.

Taim mipela i go insait long dua bilong ol man, ai bilong mi i op nogut tru long lukim olsem i gat planti man i stap pinis long dispela raun wara. Mi sem nogut tru long waswas long dispela kain hap we planti man bilong narapela hap i stap.

Poroman bilong mi long Japan em wanpela fani man tu na em i mekim tok pilai long mi na pusim mi long go na waswas wantaim ol. Mi lukim ol i rausim olgeta kolos bilong ol na wokabaut i go long dispela hap raun wara bilong waswas. Ol i sindaun nating na sevim mas gras bilong ol, brosim skin bilong ol na arapela i rabim sop long skin bilong narapela na wasim narapela.

Mi sanap tingting i go tasol bihain mi skelim olsem, em pasin kastom bilong ol olsem na mi no ken pilim nogut long en. Mi mas traime na bihainim tasol.



• Ol liklik pikinini i save amamas long bung na waswas wantaim.

Na tu sapos mi sem na mi no bihainim ol poroman bilong mi i go long waswas, bai ol i no inap amamas long mi. Narapela samting tu em mi tingim olsem, ol lain Japan ya i laik soim mi long pasin kastom bilong ol olsem na ol i kisim mi i go long dispela hap.

Pasin bilong ol em yu mas waswas long wanpela sait wara pastaim orait bihain yu ken go daun long raun wara bihain. Wara i save hot na nais tru. Taim mi go sindaun long raun wara, mi luksave olsem olgeta arapela lain Japan i no tingim olsem mi stap. Ol i tingim ol yet long waswas na stori o rausim mausgras bilong ol o brosim tit na rabim sop long ol i stap. Dispela i mekim mi pilim orait liklik bikos nogat man i lukluk long mi olsem narapela skin i kam sindaun wantaim ol.

Taim mi sindaun long dispela raun wara, mi lukim olsem olgeta lain i wokabaut nabaut i go i kam na nogat man i tingting long lukim narapela o tok pilai long narapela. Taim poroman bilong mi i lukim olsem mi sindaun isi tasol i stap long raun wara ya, em i kam na mitupela sindaun na stori. Nau mi askim em long dispela kain pasin bilong ol long waswas. Na em i tokim mi olsem, dispela em pasin bilong ol long bipo yet. Em i tok long bipo, i bin nogat planti wara bilong waswas. Olsem na taim ol i lukim wanpela raun wara i stap, olgeta man i go bung na waswas long en. Ol i mekim olsem long bipo i kam inap nau.

Tasol em i tok, long tude, dispela pasin i wok long dai isi isi. Planti haus i gat wara bilong famili long waswas na tu i gat

planti swim pul we ol manmeri i go waswas long ol. Olsem na dispela kain bung waswas i wok long pinis isi isi.

Ol Japan i save kolim dispela bung waswas em SENTO. Long tok Inglis ol i tok Common Bath. Olsem na sapos yu harim ol i tok Common Bath em yu mas save olsem em taim bilong yu bung wantaim ol arapela man na yupela bai i go waswas wantaim long wanpela raun wara. Poroman bilong mi i tokim mi olsem, yu no ken pret o sem. Bikos nogat wanpela man bai lukluk long yu o tingim yu. Yu ken i go sindaun long wara ya olsem yu ting yu yet i waswas i stap bikos narapela man i no inap lukluk strong long yu. Bikpela samting tu em, ol Japan lain i no save tingim arapela manmeri. Ol i save tingim ol yet na wanem bisnis ol i wokim.

Ating long sait bilong ol meri tu i olsem bikos ol meri tu i gat hap bilong ol long waswas. Ol tu i gat dispela kain raun wara. Tasol ol yet i save waswas bilong ol yet we ol man i no save long en. No ken ting ol man na meri bai waswas wantaim, nogat.

Long fran bilong dispela Common Bath haus i gat BANDAI, we ol man i save baim long go insait. Insait em floa bilong wokabaut em palang we ol man i save go na senis long en. I gat ol basket bilong yu putim ol kolos bilong yu long en. Yu mas rausim kolos bilong yu long longwe yet na bihain yu wokabaut nating i go long wara.

Long kain taim olsem 5 na 6 kilok apinun, bai nogat planti man tumas. Tasol taim i go olsem 8 kilok nait nau, bai yu

ken lukim olsem ples i pulap nogut tru long ol man i kam long waswas.

Tumbuna stori bilong dispela SENTO o bung waswas i go bek longpela taim tru long taim olsem 1603 na 1867. Insait long ol bikpela siti olsem Oksaka o Tokyo, ol bisnis lain tasol i save gat wara long haus bilong ol yet. Tasol planti arapela lain i save go long publik wara o Komon Bat. Olgeta man man i save go bung na waswas bikos long dispela kain hevi long wara i hat long pulim i go long haus bilong wanwan.

Tasol inap 30 krismas i kam nau, dispela tumbuna pasin bilong bung wantaim na waswas i wok long dai isi isi. Long biksiti Tokyo stret, i bin gat 2,690 SENTO o publik wara bilong bung na waswas. Tasol nau namba bilong ol dispela kain bung na waswas o SENTO i wok long go daun nau. Nau long Tokyo em namba i go daun olsem long 1,530. Bikpela as bilong en olsem planti haus nau i gat wara na ol i save waswas long haus bilong ol yet.

Planti Japan pikinini long tude i no save lukim SENTO long ai bilong ol yet. Long skul taim ol i laik waswas bung tu, ol i save werim pens bilong ol na waswas bikos ol i sem long soim skin bilong ol long arapela lain. Ol lain husat i save wokim dispela kain haus bilong bung na waswas i wok long traime kamapim sampela gutpela samting long pulim ol man i go bek na amamas long waswas bung wantaim gen. Olsem na ol i save putim ol londri mesin bilong wasim ol kolos, o ol i sanapim liklik ba bilong dring tu i stap klostu wantaim.





Nem: Virgo Bonnie

Krismas: 20

Adres: Sifu Trading, P.O. Box 101, Wau, Morobe Province.

Save Laikim: Lukim na pilai ragbi lig, pilai soka, na toktok wantaim ol pren. Na tu mi save long go long lotu na pre raun long haus bilong ol manmeri.

Nem: Sylvia Kerry (meri)

Kismas: 20

Adres: P.O. Box 68, Maprik, East Sepik Province.

Save Laikim: Ol spot mi laikim long pilai em volibal na basketbal. Ol arapela samting mi save laikim long mekim em harim ol ovasis musik wantaim reggae musik, lukim vidio, danis, go lukim ol nupela ples na raitim ol leta.

Nem: Willie Utok

Krismas: 15

Adres: Wangbult Store, P.O. Box 155, Tabubil, Western Province.

Save Laikim: Wapela spot tasol mi save laikim tru long pilai em basketbal. Narapela samting mi save laikim em tokpilai wantaim ol pren na raitim leta long ol penpren. Mi promis long bekim olgeta pas em mi kisim.

Nem: Enoch Sepilon (man)

Krismas: 20

Adres: Sorovi Blok No. 12-1646, Road 4, P.O. Box 147, Popondetta, Oro Province.

Save Laikim: Mi save laikim long harim ol lotu na kwaia singsing, go long lotu long olgeta ssabat, na harim gutnius bilong God. Mi bai bekim olgeta pas em mi kisim. Sapos mi kisim planti, bai mi givim sampela long ol pren bilong mi long bekim.

Nem: Lucy Joe

Krismas: 19

Adres: Scombo Brothers, P.O. Box 762, Kimbe, West New Britain Province.

Save Laikim: Pilai basketbal, volibal na sofbal. Ol arapela samting mi save laikim long mekim long fri taim bilong mi em waswas long bikipela wara, na tok halo long ol pipel.

Nem: Sukkay Luther (man)

Krismas: 19

Adres: Buana Village Tapen Community School, P.O. Box 16, Saidor, Madang Province.

Save Laikim: Mi save laikim long pilai ol spot olsem basketbal na voliba, tok pilai na raitim pas long ol penpren. Ol arapela samting mi save laikim long mekim em pilai gita, go long danis, harim FM PNG Top 20 program bilong Kalang Redio na harim kankain PNG musik.

Nem: Steven Nangas

Krismas: 20

Adres: Kummex Village, P.O. Box 161, Finchafen, Morobe Province.

Save Laikim: Go long otu, pilai gita, harim musik na raitim pas long ol penpren. Mi bai bekim olgeta pas em mi kisim.

#### TOKSAVE KAM LONG EDITA:

Wantok i prinim nau leta bilong ol manmeri wantaim poto we i soim klia pes bilong yupela. Olsem na yupela ken salim tu poto bilong yupela i kam long dispela adres: Painim Penpren, Wantok Niuspepa, P. O. Box 1982, Boroko, National Capital District.

# Bishop Gam blesim MV Gejamsao long Finsafen

## Wenceslaus Magun i raitim

TAIM mi kisim toksave long go long Finsafen na raitim stori bilong nupela sip bilong Lutheran shipping, MV Gejamsao, mi bin amamas stret. Watpo?

Nem Finsafen i save swit moa long ia bilong mi. Yes...Finsafen em i no nem nating. Nogat. Long taim bilong ol tumbuna i kam long ol namba wan waitman na misinari na i kam inap tude bihain long 21 yia bilong Papua Niugini i kisim Independens, nem Finsafen i save pairap yet. Planti ol lain husat i save laikim musik bilong Reks Ben na ol arapela singsing tumbuna na stringben o pawa gita bilong Morobe bai tok olsem musik bilong Finsafen i swit. Wanem dispela hap mi ting? Mi mas go lukim.

Finsafen, em i wanpela naispela liklik basis long poin bilong Huon long Morobe provins. Long Novemba 5, 1885 sampela waitman i go sindaun long Finsafen na statim plentesin bilong ol aninit long Niugini Kampani taim Jemen i lukautim Niugini. Finsafen em i wanpela bilong ol tripela ples long bikples Niugini we Jemen gavman i sanapim ol namba wan pilak bilong ol long graun long soim olsem Jemeni nau i bosim Niugini bikples na ol ailan long 1884. Taim Jemen gavman i sanapim pilak bilong ol, ol i givim tu nem bilong dispela hap 'Kaiser-Wilhelmsland'.

Ol namba wan misinari bilong Lutaren Sios husat i kam tu long Niugini o Kaiser Wilhelmsland long dispela taim em long Johann Flierl. Mama i karim Johann Flierl long Epril 16, 1858 long Buchhof, Bavaria na em i go long skul bilong kamap misinari long dispela hap yet. Flierl i bin gat bikipela laik tu long go autim tok bilong God long narapela kantri. Long ista Sande long 1858 bos bilong em i salim em i go long Bethesda, Australia bilong mekim wok wantaim ol bilak skin man ol i save kolim ol long ol Aborijines. Tasol bikipela laik tru bilong Flierl em long long kam long Niugini. Flierl i laik autim tok bilong God long ol pipel i no harim yet gutnius. Em i laik go autim tok bilong God long ol pipel ol waitman i givim baksait olgeta long ol na i ting olsem ol i wail man tasol. Long Novemba 8, 1885, Lutaran Imanuel Sinod long Saut Australia i bekim singaut bilong em long larim em i kam long Niugini. Olsem na Flierl i lusim Australia na i kam long Niugini. Meri bilong em Loise, nee Auricht tu i bihainim em bihain liklik long 1888 na i kam stap wantaim em na mekim wok. Flierl i lusim Australia long Julai 8, 1886 na i kam sua long Finsafen long Julai 12. Insait long dispela sotpela taim bipo long em i kam long Niugini, em i statim tu wanpela nupela stesin, Elim long Noten Kwinslen.



• Nupela sip bilong Lutheran Shipping MV Gejamsao. Poto: Wenceslaus Magun.

## Namba wan misin stesin: Simbang

Taim Flierl i kam statim wok, em i save wokim Sande lotu long ol wokman bilong Niugini Kampani. Tasol bihain long tripela mun Flierl i go long Simbang ples long maus bilong Bubi (Mape) wara insait long Langemak basis. Dispela ples em i olsem wan aua long Finsafen sapos yu wokabaut i go. Flierl i ting olsem dispela em i as tingting tru bilong em long kam long Niugini. Na olsem long Oktoba 8, 1886 Flierl i baim wanpela kampani bot bilong Niugini Kampani na i kisim olgeta kako bilong em na i go sindaun long Simbang, we em i statim tru wok misin bilong Lutheran Sios.

Tude dispela namba wan wok Flierl i statim i karim kaikai na i kamap strong moa long Mamose, Hailans, Niugini Ailan, na sampela hap bilong Papua. Planti bilong yumi long PNG i kisim save na holim kankain wok long wanem, kain man olsem Flierl i bin opim rot bilong yumi. Yes, antap long wanem kain wok yumi mekim o namba yumi gat, bikipela samting planti bilong yumi kristen i ken amamas em i olsem long ol dispela namba wan misinari, nau God i kisim bek yumi. Planti bilong ol namba wan misinari i dai na blut bilong ol i kapsait long graun bilong yumi. Bun bilong planti nau i slip long graun bilong yumi. Ol namba wan misinari olsem Flierl i brukim bus, wara, na solwara. Ol i kaikai liklik na i no slip gut long wanem ol i gat laik tru long autim tok bilong God long yumi.

I tru insait long wok misin bilong ol, ol misinari i kirapim tu wok bisnis. Tasol as tingting bilong

kirapim wok bisnis em bilong kamapim na strongim gutpela sindaun bilong yumi long PNG. Long taim bipo i kam inap tude i nogat wanpela gavman bilong PNG na planti arapela hap long wol i kamapim wanpela ministri bilong Sios stret we bai i lukautim wok misin. Nogat. Ol Gavman i larim ol Sios long lukautim ol yet. Wanem Sios i laik mekim wok bilong em, em i mas sanap long lek bilong em yet. Olsem na Sios i mas i gat we bilong lukautim em yet. Wanpela bilong dispela rot em long wokim sampela bisnis na yusim win mani bilong ol dispela bisnis long mekim wok. Wokim skul, haus sik, rot, bris, haus, baim ol wokman na olgeta arapela samting. Yumi stap liklik taim nau na givim bikipela rispek long Johann Flierl na olgeta ol arapela namba wan misinari maski bilong wanem lotu ol i kam long en, tasol ol lain husat i kam na telimautim gutnius bilong God long PNG long namba wan taim....I tru Flierl na ol arapela misinari i dai na i go pinis tasol spirit bilong ol na wok bilong ol nau i stap yet. Long Finsafen, PNG na wol, taim yu kolim nem Johann Flierl na Lutaran Sios long PNG, yu no inap lusim tu Finsafen. Finsafen, Flierl na Lutaran Sios oltaim bai stap wantaim.

## Shipping: MV Gejamsao

Long Epril 2, 1997, sampela bilong mipela i bin go raun na lukim Finsafen bihain long 101 yia na tripela mun bilong Evanjelikel Lutheran Sios long PNG. Dispela de em i no de nating. Bikos. Long dispela de tu ELCPNG i laik luksave na givim bikipela rispek i go long Johann Flierl long olgeta

wok bilong em long we bilong opim nupela pasindia bot bilong Lutheran Shipping, MV Gejamsao.

Pastaim long yumi harim liklik moa stori bilong dispela de, yumi glasim tok Gejamsao na watpo Lutaran Sios i givim dispela nem long dispela nupela pasindia sip. Wanem samting em Gejamsao? Gejamsao em i wanpela tok long tokples Yabim na i min olsem "Meri i helpim". Sapos yu tok, Gejamsa em i min olsem "Man i helpim". Ol bod memba bilong bisnis han bilong Lutaran Sios, Kambang Holdings Ltd, i ting olsem dispela nem Gejamsao i gat gutpela mining. Mi askim Bishop bilong ELCPNG, Sir Getake Gam na em i tok: "Namba wan, as tingting bilong kolim dispela sip, MV Gejamsao em i min olsem mipela i laik tokim ol meri insait long Lutheran Sios na long PNG olsem Lutheran Sios long PNG i luksave long planti bikipela wok ol meri i wokim insait long famili, Sios, na kantri i kam inap tude long PNG. Mipela i sapotim tru wok bilong ol meri. Na mipela i laik soim ol meri olsem ol i gat moa wok bilong mekim. Sios i gat spes long ol meri. Ol meri i no samting nating. Ol meri i gat namba. Ol meri i mas go het na mekim planti gutpela wok insait long famili, ples, Sios na kantri bilong yumi. Olsem sip i save karim planti kako na i save kisim ol dispela kako i go long planti hap long gutpela taim na long taim nogut, ol meri tu i mas sanap strong na mekim gut wok bilong ol long gutpela taim na long taim nogut."





■ Tambu man bilong Kanage i dai. Na olgeta famili i go bung na sindaun krai i stap. Kanage i harim nius ya na em mekim save long krai long ples bilong wok yet na i go long haus bilong tambu man.

Kanage sindaun na em krai, "yu tok long bai yu baim 6 peks long neks wik Fraide ya tasol yu no baim na yu dai pinis. Husat bai baim bia bilong mi ya. Taim mi dring bia, bai mi brukim namba wan botol long nem bilong yu. Sapos yu laik dring, orait salim tewel bilong yu i kam bek na stilim olgeta katen bia long stua na mitupela bai dring".

Taim meri bilong Kanage i harim dispela rabis krai bilong Kanage, em bikmaus na hatim Kanage nogut tru. "Yu ting brata bilong em wanpela rabisman ah. Yu ting em bia pes man olsem yu ah, yu tasol sapos yu dai, bai mipela kapsaitim ol katen bia antap long matmat bilong yu".

#### Kanage Spai Madang

□ Kanage i go long lotu. Em sindaun long sait na ai bilong em i slip na em pasim ai na kilim skin long slip. I no longtaim wanpela liklik boi i sindaun wantaim papa bilong em long sait i lukim Kanage. Nau liklik boi ya i bikmaus na tok, "hei olgeta man lukim em, em ting haus bilong em na em slip, nogat bilip bilong em, bai satan i kukim em long paia". Taim olgeta manmeri harim olsem, ol stat long lap isi long ol yet. Na Kanage i harim na em giaman pasim ai olgeta na slip bikos em i pilim bikpela sem tru long bel bilong em.

#### Norman Barnabas Mosbi

■ Meri bilong Kanage i gat bel gen long namba 6 pikinini. Em nau misis Kanage i go long klinik na ol sista i lukim em na ol hatim em. "Ol pikinini bilong yu i no bikpela yet na yu hariap long pulapim nupela bebi gen. Yupela masin o wanem". Misis Kanage harim na go bek long haus long apinun na tokim masta bilong em. Kanage harim dispela toktok na em i no wanbel tru. Na neks moning em i go long haus sik na tokim dispela meri nes, "yu ting mipela em futbol na bai yu referi ah? Yu kam long haus na referi long mipela long nait". Meri nes harim na tok, "mi ntging long gutpela sindaun bilong yupela, olsem na yupela mas bihainim gut famili plening". Kanage bekim, "mi no save planim long gaden nabaut, mi planim long gaden bilong mi stret". Turangu meri nes ya i les tru long toktok moa bikos Kanage i paulim ol toktok i go narakain olgeta.

#### Kanage sist Manus

□ Kanage wantaim poroman bilong em i raun long maket na tupela i lukim wanpela lapunmeri i salim mit bilong trausel. Nau tupela i wokabaut i go klostu na askim em, "bubu, amas long trausel mit bilong yu?". Lapun meri harim na tokim tupela, "i no bikpela mani, 60 toea tasol". Kanage kirap na bekim gen, "lapun tu ya, tok pisin bilong ol i gat mining ya". Lapun meri kirap na tok, "yu nau tasol kamaul long sel bilong yu, na yu no pas yet long tok pisin". Turangu Kanage i sem nogut tru long dispela bikpela toktok bilong lapun meri ya.

John K Goroka

# Pikinini kamap long snek

BIPO BIPO, tru long taim bilong tumbuna i gat tupela marit istap. Tupla i marit na tupela i nogat pikinini na tupela i lapun pinis.

Orait wanpela taim long moning tupela i go wokim gaden long bus. Long apinun tupela i kam bek long ples na lapun meri hia i kisim brum na brumim pipia insait long haus. Orait em i karim pipia igo na i

laik tromi long pipia na em i harim wanpela bepi i krai aninit long pipia. Em i putim pipia long rot na isi tasol em i ron igo tokim man bilong em.

Na tupela igo sanap klostu long pipia na tupela lapun i ting olsem tewel o masalai na tupela i rausim pipia isi man em i karim naispela pikinini man. Na tupela lapun i lukim na amamas tru. Tupela i karim

bebi igo long haus lapun man i ron igo kisim nupela lip banana em i karim igo ronim long paia.

Lip i hot tru na em i putim susa bilong lapun mama em nau susu bilong mumu hia i ron olsem wara. Na bebi i susu nau. Dispela snek i karim pikinini tokples nem bilong em Kuj. Em nau. Tupela lapun i lukatuim na pikinini i bikpela.


Na tupela i baim meri bilong em na em i marit na kamapim planti pikinini na ol pikinini tu i marit na kamapim pikinini. Nau ol disepla manmeri i kamap long snek femili planti istap long Sepik.

Em tasol dispela tumbuna stori i kam long Maprik.

Willam Gawi



Lukluk insait long ken Sprite, sapos yu lukim nem **BALL** yu **WINIM** wanpela Basketball. Sapos yu lukim nem **DRINK** yu **WINIM** wanpela ken **SPRITE**.



Kisim ken drin bilong yu long stoa we yu baim drin. Kisim bal bilong yu long **COCA-COLA** depot klostu long yu.

Olgeta prais mas igo long namel long nau na 27th dai long mun Juno, 1997



ENJOY  
**Sprite**





Bik  
Bro

# REBO



BIKPELA HAI-SOLWARA IKAM NA KAPSAIT ANTAP LONG KANCI...

UMN... KANU I LUK ORAIT LONG MI!

PAPS, WARA IPULAP TRU LONG KANU!



LONG HAPSAIT, LAPUN IKOLEKTIM OL PIS I SILIP NABAUT LONG NAMBIS...

HAH! EM I ISI TRU LONG KISIM PIS... NAU LONG NAIT BAI BIKPELA DINA STRET!



PAPA LUKIM! TUMBUNA KARIM WANEM SAMTING IKAM?




EM YAH... NAU YUMI RICH TRU LONG PIS.. LUKIM!

WOW!! PLANTI PIS TRU, YAH !!



NAU TRIPELA LUSIM AILAN NA SEIL IGO BEK...

PLOP!



OL I KAM KAMAP LONG PLES TAIM SAN IGO DAUN...

Igo moa Neks Wik!!



# SIPAK MAIK



MAIK I SINDAUN LONG HAUS I STAP NA DUA I PAIRAP...

NOK! NOK! NOK!

EM PRET NAU... EM TINGIM BIPO

TAIM OL RASKOL I ROBIM EM...



HARIAP TRU EM KISIM BUSNAIP NA WOKABAUT IGO LONG DUA...



WANTU EM OPIM DUA NA TROMOI NAIP NA SINGAUT WANTAIM...

AARR! YU LAIK SALENS AHZ!!



6\*?!! YUPELA WE?!

ANKOL!



OH, ANKOL?!

MAMA SALIM MI KAM LONG GNIM YU KAI-KAI!



WHEW! KLOSTU MI KATIM YU LONG NAIP, YAH!

Igo moa Neks Wik!!





• Oi Asaro madmen i sindaun amamas long bikpela singsing ol i bin kamapim long Goroka.



• ANTAP: Nupela Risos senta bilong ol meri na yut long Siar. Not kos rot long Madang.

• RAIHAN: Oi Goroka Katolik yut redi long singsing long katolik yut rali long Enga las wik. Poto: Peter Maime.



YUMIFM

# TOP 20

## This Week!

L/W T/W SONG ARTIST

1	1	KEPOKO	TARIKANA
3	2	VUVU	TARIKANA
2	3	MANAM ISLAND	QUAKES
4	4	MANI PENI	REKS
10	5	MELBOURNE CITY	TELEK
7	6	COME HOME NAU	XB1
5	7	TELEPHONE	BARIKE
8	8	KOLWIN	SAGO THORNS
11	9	LAMBADA RAGGAE	DAVID ANDREW
12	10	LILI	QUAKES
6	11	PILISI	HITSY GOLOU
9	12	FAREWELL	BASIL GREG
17	13	KAKAUL	KANAI PINERI
0	14	LULU	QUAKES
18	15	DESI	TELEK
14	16	NUAGI YAVI	SAGO THORNS
19	17	HEISI LALOKAU	JERRY TEMU
15	18	CRAZY	TARIKANA
13	19	YAMBUN-AWI	MANDA WALI
20	20	MANGI BAINING	BARIKE

GFM

YUMIFM



Air Niugini

**MASTER OF BUSINESS ADMINISTRATION MBA**



Southern Cross University

Air Niugini and Southern Cross University wish to advise that the second trimester is due to begin in early May and applications for admission are now sought.

This MBA programme is available to any person (both citizen or non-citizen) who meets the University's admission criteria. The course is designed for graduates and experienced managers and there are currently 30 students studying on the programme.

The MBA requires the completion of 12 units studied by a combination of Distance Learning and Lecture/Tutorials provided in Port Moresby by Southern Cross University and the Air Niugini Training Centre. The programme is structured so that a candidate undertakes two units per Trimester and completes the degree in two years with the flexibility of extending to cater for other commitments.

The Air Niugini/Southern Cross University Master of Business Administration is a full-fee course. Expressions of interest are sought from potential students and organisations considering sponsoring students.

A further information meeting is planned for the afternoon of Sunday 13 April 97.

Please contact the Air Niugini Training Centre telephone 327 3313 or Facsimile 327 3651 to register your interest.

PNG FM PTY LTD  
Trading as  
NAU FM and YUMI FM

P.O.Box 774  
Port Moresby  
Papua New Guinea  
Ph: (675) 320 1996  
Fax: (675) 320 1995



# Bishop Gam blesim MV Gejamsao long Finsafan



• ELC-PNG nesenel bishop Sir Getake Gam i opim nupela pasindia sip MV Gejamsao.

## I kam long pes 12

MV Gejamsao i no karim tasol dispela nem. Taim mipela i go long Finschafen, olaboi, aninit dek bilong MV Gejamsao i pas long ol meri stret. I luk olsem hap bilong ol pasindia bilong sip em ol meri tasol. Dispela i soim tu olsem Lutheran Sios i no toktok tasol. Nogat. Ol i toktok na mekim samting wantaim. Planti ol meri mi askim ol long tingting bilong ol i tok ol i amamas tru long Sios i luksave long wok bilong ol. Wampela maus meri bilong ol meri na Koodineta bilong ol meri insait long ELCPNG, Ms. Gaby Gedisa i tok: "Mipela ol meri bilong ELCPNG i amamas na tenkim ol lida bilong Sios bilong mipela long givim nem Gejamsao long dispela nupela pasindia sip. Longpela taim tru mipela ol meri i bungim het, bel, han na tingting long kirapim, mekim na strongim wok bilong Sios long PNG, tasol planti pipel i no luksave long dispela. Nau planti meri i ken lukim, ritim na harim olsem dispela em i sain olsem Sios i no ai pas. Nogat. Sios i luksave long mipela ol meri."

Mipela i lusim Voko poin samting olsem 9:15 long moning na sel i go long long Finsafan. Long dispela taim, solwara i slip sore, gutpela kolwin i kam, ples i klia gut stret na MV Gejamsao i katim solwara olsem wampela spit bot. Mi tok olsem long wanem, tru tumas mipela i abrusim sampela ol banana bot long si. Taim mi lukluk i go i kam long bikipela solwara, mi inap lukim ol maunten long rait han i go olsem long Popondeta i baibai long mipela na long lep han ol i amamas long kisim mipela. Ol pisin i plai antap na wan wan sel

pis na dolpin i poromanim mipela i go long Finsafan.

Taim mipela i sel i go yet mi stap na tingting. Bipo long taim bilong ol tumbuna mi no inap raun olsem. Tude, mi amamas stret na mi no pret. Mi sel gut long MV Gejamsao. Wanem samting mi laik tokaut nau em i olsem sapos Johann Flierl i no bin kam na autim gutnius, mi no inap raun olsem nau mi raun. Planti taim mipela i save kisim tasol sevis na ol samting, tasol ai bilong mipela i save pas long rot dispela sevis i kam. Planti bilong mipela tu i save komplem o bik maus long wanem mipela i ting olsem samting ol arapela i givim mipela i no inap yet. Mipela sindaun nating long as na singaut na kra i sutim tok i go i kam. Wanem taim bai mipela i stat long wokim wok long mipela yet? Mi mekim dispela tok long wanem, taim mipela i go sua long Buki bris samting olsem 12 kilok na bihain mipela i go long Maneba long 12:30 long abinun wantaim sampela moa pipel bilong Finsafan, pasin ol pipel i soim i tokim mi olsem sampela bilong ol i no amamas yet long sevis Lutheran Sios i givim long ol.

Wampela bikman bilong ples long Finsafan, Mista Balip Yupa i tokaut klia long dispela insait long taim Bisop Sir Getake Gam i opim sip. Em i askim olsem ol Finsafan i laikim husat man i lukautim pasindia haus na maket haus long Finsafan i mas go het na mekim bai ol dispela ples i ken kamap moa gutpela. Dispela tok i sutim lewa bilong mi. Mi ting dispela lida bai i go antap na tenkim Sios long baim gutpela sip i winim olgeta arapela pasindia

sip Lutheran Shipping i gat i kam inap nau, tasol toktok bikman Liba i mekim i givim mi nupela tingting. Mi stap gen na harim Gavana bilong Morobe Provins, Mista Jerry Nalau i bel hat long dispela na i singaut strong long ol pipel bilong em long stap long askim long moa samting olsem ol bebi. Em i salensim ol pipel bilong em long amamas long wanem sevis ol i gat pinis, na lukautim ol dispela sevis. Mista Nalau i opim ai bilong ol pipel bilong em long tingim hat wok Flierl na ol arapela namba wan misinari na wok man bilong Sios i wokim bilong bringim sevis i go long planti hap. Em i tok: "Ol dispela lain i no kra i. Nogat. Ol i karim pen na wokim wok na bringim gutpela sindaun i kam long yumi long dispela taim." Olsem na Mista Nalau i krosim ol lain bilong em long lusim dispela pasin bilong sindaun nating long as na askim yet long planti moa samting.

Tasol, planti lain Finsafan husat i kam bung long amamasim MV Gejamsao i amamas. Ol i bringim ol kainkain stail singsing tumbuna bilong Morobe na mekim save stret. Man ol i singing na skin gras bilong mi i sanap tu. Bihain long singsing, Bishop Sir Gam i prea long sip na i blesim MV Gejamsao. MV Gejamsao nau i ken ron namel long Finsafan na Lae tupela taim long wampela de. MV Gejamsao i ken ron i go long Finschafen na Lae o Lae na Finschafen olsem tupela aua tasol. Ol bod memba bilong Kambang Holdings i no tokaut klia sapos MV Gejamsao i ken ron tu i go long ol arapela provins long PNG.

Kepten husat i ronim MV Gejamsao em Mista Malachi Sijao, krismas bilong em 40 bilong ples Likum long Manus. Kepten Sijao i gat Masta 4 setifiket. Em i marit na i gat foapela pikinini. Ol arapela wokman bilong MV Gejamsao em namba tu kepten, Mista Levi Keleno, krismas bilong em 27 bilong Sialum, wampela mangi Finsafan yet na foapela ol bos kru. Kepten Sijao na Kepten Keleno i no ol nupela man. I luk olsem Kepten Sijao i ronim olgeta sip bilong Lutheran Shipping bipo long ol i makim em long ronim MV Gejamsao. Kepten Keleno tu i ronim MV Nagada, Mamose, Rita na Umboi bipo long ol i makim em bilong kam stap namba tu kepten bilong MV Gejamsao. Wantaim olgeta dispela save dispela tupela kepten i lusim PNG long Mas 28 na i bin go daun long Brisbane, Australia. Tupela i kisim MV Gejamsao i kam sua long PNG long Mas 30, long taim strongpela win Justin i bagarapim tru Australia na planti hap bilong PNG. Kas bilong tupela.

Fainensel Menesa bilong Lutheran Shipping, Mista Don Hodgson i tok, ol i bin baim MV Gejamsao long samting olsem K1.6 milien. Kwinslen sip i bin stat wokim MV Gejamsao long Januari las yia na i kisim olsem 9-pela mun olgeta bilong pinisim dispela sip. Mista Hodgson i tok tu olsem Lutheran Shipping i ting ol inap long kisim bek K1.6 milien bihain long 5-pela yia. Em i tok nau yet i gat liklik hevi i stap long prais bilong fiul long wanem fiul prais i go antap. "Tasol i luk olsem i gat planti pipel bilong Finsafan i painim hat long i kam i go long Lae. Planti taim ol i mas

baim balus na prais bilong balus i dia tumas," Mista Hodgson i tok. Em i tok, "Mipela i hop, MV Gejamsao i stap bilong helpim ol pasindia." Mista Hodgson i tok, MV Gejamsao bai i no inap karim kako.

MV Gejamsao i gat stia long lep han ol i kolim long Pot Kontrol, Senta Kontrol long rait han, Stabot kontrol long wil haus na auto paillet i stap tu long wil haus. Auto paillet em i olsem kepten i ken givim kos long komputa na larim komputa o masin yet i kisim sip i go kamap long wanem hap kepten i laik sip i go. Kepten Sijao i tok tu olsem MV Gejamsao i gat globel posisening sistem we inap tok save long kepten sip i stap long wanem solwara long wol.

MV Gejamsao i gat tu Eko Saun. Dispela em masin we bai i ken toksave long solwara o wara i daun o nogat. I gat tu rada bilong soim ol diwai o wanem samting i stap antap long wara. MV Gejamsao i gat wampela VHF P2V4961 na wampela singel said bend o masin bilong givim signal sapos sip i painim birua long solwara. Wampela bikipela samting tru MV Gejamsao i gat em, tupela enjin na ol dispela enjin i stap long pot stabod. Wampela enjin i gat 940 Hos Pawa (HP). Putim tupela enjin wantaim em bai olsem 1,880 HP. MV Gejamsao i ken ron long spid bilong 1600 Revolusen Pe Minit (RPM) long 25 nots (knots). Sip i gat tu air kondisen we i stap long rum bilong ol bikman ol i kolim long VIP rum, na long bikipela pasindia ples long dek. Sip inap kariam 188 pasindia. I gat ples bilong 136 pasindia long aninit dek, 12pela pasindia long VIP rum i stap antap na 40 pasindia long dek antap autsait long VIP rum. I gat tu kula bilong dring kol wara na video long pasindia dek aninit na long rum bilong ol VIP. Long pasindia dek aninit tu i gat stoa bilong baim kaikai i tan na ol kol dring. Sapos yu man bilong laikim tu musik, noken wari, MV Gejamsao i gat tu musik boks. Sindaun isi, putim ia na salim tingting.

Long 1906, menesa bilong bisnis han bilong misin i askim long wampela liklik sip bilong karim ol pasindia na kisim kako bilong ol wokman bilong misin. Em i rait i go long bod bilong sip long ples bilong ol waitman olsem: "Long 20 yia olgeta mipela i sel i go i kam yusim ol kanu i nogat haus, na i luk olsem nau em i taim mipela i mas kisim sampela gutpela sip." Wampela yia bihain ol i wokim wampela sip na kolim nem bilong em Simbang long tingim namba wan ples Johann Flierl i go sindaun na statim wok misin bilong em.

Tude, LUSHIP wampela divisen bilong Kambang Holdings LTD, bisnis han bilong Lutheran Sios i gat 11pela sip: foapela em ol kago/pasindia sip, tupela sip bilong karim kako long kontena, wampela bas bilong solwara na wampela bas bilong wara, i bin gat tupela pasindia sip na nao MV Gejamsao bai mekim namba tri. Ol sip bilong LUSHIP i save sel na bringim sevis i go i kam namel long samting olsem 26 bris long not kos bilong PNG na i save karim ol kainkain kako long mak bilong tin pis, i go inap long 25-ton kontena na moa long 1000 pasindia. LUSHIP i stat long wampela liklik askim tasol wampela man i mekim samting olsem 90 yia i go pinis.



# Em i tru: Maski long wokim las minit gris

## Dia Edita,

Mi wanpela manki Nuku insait long Sandaun provins. Nau em i namba wan taim tru bilong mi long skelim tingting bilong mi wantaim ol pipel bilong Nuku na long PNG tu.

Yes, nau mi laik sapotim tru pas bilong wantok ya John Noel husat i stap long Kimbe na i raitim. Pas bilong em i bin kamap long Wantok Niuspepa long 19 Septemba 1996.

Pas bilong em i bin tok olsem; "Noken wokim las minit gris", wantok, dispela tok bilong yu em i tru olgeta. I no giaman! So mi tu i laik sapotim na surukim dispela toktok bilong yu i go moa yet long gupela harim na luksave long ol pipel bilong Nuku long ol kain giaman pasin i wok long kamap.

I tru yumi olgeta i save olsem, 1997 ileksen i wok long kam klostu nau. Olsem na ol man nau i wok long painim

sampela kain rot bilong kisim namba o winim dispela ileksen. Ol pipel bilong Nuku, mi askim yupela strong long glasim gut husat man bai trupela lida bilong yupela ol pipel. Na ino long haus bilong em yet long Mosbi o slip baksait tasol long haus palamen. Noken tru long makim kain man olsem; yu save harim nem o lukim pes bilong em tasol long taim bilong kempen. Na taim em i winim dispela sit, em pinis. Yu no inap tru long lukim em o harim liklik nem bilong em moa.

Nau ol pipel bilong Nuku, yupela i mas lukaut! Em i taim nau, we ol kainkain man i gat kain save bai i go insait long ples na sutim bel bilong yupela long ol giaman tok bilong ol. Noken tru long bilipim husat man i go na tokim yu olsem em i laik kirapim sampela kain wok i tok olsem, ol politiksen i wok long paitim toktok wan-

taim ol papagraun bilong Maimai Wanwan Konstituensi long kirapim wanpela Oil Pam Projek. Bai em tok, bulsit bilong em stret ya. Ol pipel noken kirapim nogut na ting olsem em i tru. Em i grisim yupela tasol long bai yupela i votim em gen long 1997 ileksen. Yia i kilim em stret long haus palamen tasol mi no lukim sampela senis i kamap long Nuku na Yankok.

Wanem samting mi lukim i olsem: Nuku na Yankok i wok long surik i go bek gen long ol yia olsem 1920s na 30s. Kain bikpela sevis olsem rot we ol pipel inap long kisim helpim i wok long bagarap olgeta. Ol ka i no moa igo kam long Wewak long kisim kago bilong ol long stua. Ol lain i gat tred stua i wok long yusim balus tasol long kisim kago bilong ol na ol prais bilong samting i go antap tru. Ol pipel bilong Nuku i wok long safa stret ya. Na

wanem kain projek em ol politisen i laik kirapim we nau yet i gat ol bikpela bagarap i stap yet wok kamap long ples. Man! Klostu taim bilong ileksen nau na ol kain wok kamap i laik kamap long ples. Plis, noken wasim het bilong ol tarangau pipel long ples.

Ol pipel, yupela yet i ken lukluk, skelim na wokim disisim. Askim God em bai i ken makim gupela lida bilong yupela. Tingim, wanpela vot bilong yupela, em i bikpela samting long laip bilong yu. Tu i luk olsem nau em i taim we yumi ken katim na rusim olupela kopi na planim nupela we bai inap long karim gupela kaikai. Husat i laik sapotim o egensim em laik tasol.

**Blase Komboni  
St. John's Seminari  
Kairiru Ailan  
Wewak, ESP.**

## Blak maket bikpela long Kimbe

### Dia Edita,

Mi wanpela manki Morobe tasol nau mi istap long Wes Nu Briten provins na mi laik autim liklik wari bilong mi long Wantok Niuspepa insait long Wes Nu Briten mi save lukim wanpela samting i no gupela long ai bilong mi. Em i olsem ol meri save i go long maket na baim ol buai na burus kambang na daka long liklik prais olsem K10 na i go daun na ol i kam long haus bilong ol na ol save skelim gen.

Faivpela buai em K1 na 5-pela brus em K1 o 10-pela buai em K2. Dispela pasin tasol mi lukim na mi no save amamas bilong wanem? 50 toea o K1 ol save stilim mani bilong arapela manmeri.

Dispela mani yumi save hatwok na kisim na buai na daka burus em i gat taim bilong em planim na kisim. Plis yusim het na salim blak maket long haus bilong yu.

Dispela pasin o blak maket em mi save lukim long SBLC. Kampani long Buluna Kompaun.

Sapos yu husat brata o susa yu laik sapotim o egensim mi em orait tasol yu en rait long Wantok Niuspepa na mi lukim. Tenkyu.

**Mista Kundip Hingi  
Bialla**

## Bulolo pipel givim sans long Samson Napo

### Dia Edita,

Mi wanpela manki bilong Morobe provins. Tasol nau em mi stap long Alotau Milen Be provins. Yes, ol pipel bilong Bulolo. Mi laikim yumi mas larim Samson Napo i stap yet long palamen haus inap long 5-pela yia moa bikos mi lukim em kamapim planti samting pinis long Bulolo ilektoret.

Na mi amamas tru long Napo. Na mi laik mekim wanpela tok piksa olsem bipo mi stap bikples bilong mi long Simbuluk. Na mi laik mekim wanpela tok piksa olsem bipo mi stap bikples bilong mi long Simbuluk na mi bin painim wanpela meri long yia 1992 na mi lusim meri bilong mi.

Na mi go long Mosbi na mi go daun gen long Samarai na mi go stap na harim olsem meri bilong mi i kamap hariap tru na i kukim planti kaikai tru. Na mi amamas nogut tru olsem na mi les long painim nupela meri gen olsem na mi les long painim nupela meri gen long yia 1997. Mi bai stap wantaim olupela meri yet i go bikos sapos mi kirapim nogut na painim narapela meri gen em bai i no inap long helpim mi. Em bai i dai hariap olsem na mi laik tok olsem olgeta lain bilong Bulolo ilektoret olsem. Makim Samson Napo gen na stap faiv yia moa. Na noken kirapim nogut long nupela man bikos nupela man em i kam long grisim yu tasol long yu givim vot long em na em bai igo stap long bikpela haus bilong yumi na slip na i dai olgeta na bai ino inap long tingim yumi moa na em tasol wari bilong mi na husat i laik sapot.

**Mikere Stephan  
Alotau**

## Watpo na Bogenvil tasol kamap bikpela?

### Dia Edita,

Mi wanpela hailans manki husat i nao i stap long Bomana CIS Woda na mi laik askim sampela kwestens bilong mi i go long gavman bilong nao.

• Watpo na gavman i no pinisim tabel long Bogenvil?

• Husat i as bilong tabel, gavman o BRA?

• Watpo na gavman i no givim moa pawa long ami?

• Wanem taim tabel bai pinis?

• Watpo na BRA wok yet?

• Husat tru em rong? BRA o gavman?

• Watpo na BRA raun tu long Honiara?

• Husat kantri i sapotim BRA?

• Gavman i gat we long pinis tabel o nogat?

• Watpo na ami i wok long dai yet?

• Wanem kain gavman bai pinisim tabel?

• Watpo na gavman i wok long slek?

• Watpo na gavman i no mekim save long Honiara?

• Watpo na gavman i no i stapim olgeta kea senta?

Mi laikim yumi pablik i mas lukim pas na skelim o kamautim as tru tingting na sapotim gavman long pinisim dispela 8-pela yia trabel long Bogenvil.

**Woda Boi  
Bomana Haus Kalabus**

## Atols pipel i laik stap PNG pipel yet

### Dia Edita,

Mi laik autim wari bilong mi long yupela na bai ol man i ken ritim na skelim. Wari bilong mi, em i go olsem.

Mi no amamas long ol BRA we ol bin tok, ol bai bruk lusim Papua Niugini, Not Solomons em hap bilong Papua Niugini.

Na narapela wari bilong mi gen em, mipela ol Atols, em i tru olsem mipela i stap aninit long Not Solomon provins, tasol mipela i les long bruk lusim Papua Niugini, sapos ol Not Solomons i bruk lusim PNG, mipela ol Atols bai fomim wanpela provins. Bikos mipela i les long bruk lusim PNG, mipela ol Atols em hap bilong PNG, em hia nem bilong ol ailan Atols, Motlok, Nissan Is, Pid, na Taslian. Mipela i les long bruk lusim PNG narapela samting em, ol lain Bogenvil ol laik muvim, haus kalabus i kam long Nissan Is mipela i no laikim dispela, em bai givim hevi gem long mipela em tasol liklik wari bilong mi husat i laik agensim o sapotim em laik tasol.

**Konsen  
Nissan Allan**

## Noken bhainim lo bilong lotu tumas

### Dia Edita,

Yes, mi laik egensim pas bilong brata Gelson Rabo na i bin kamap long Wantok Niuspepa long 12 Septemba, 1996. Na em i bin sapotim pas bilong Cletus Turuka na tupela i egensim pas bilong brata Simon Muanli long pasim bilong Tambuni kaikai olsem buai, bia na smok.

Yes, brata mi laik tokim yu olsem, ating yu bes antap long dispela baibel ves long mak 7:14-23 tasol, we Jisas i tok long samting i stap ausait na go insait, i no inap mekim man i doti, tasol samting i stap insait na kam husat tasol i mekim man i doti.

Tasol brata, i gat sampela baibel veses tu i stap olsem long 2 Korin 7:1 em tok, yumi mas raunim ol samting we bai bagarapim

bodi na spirit bilong yumi, na tu 1 Korin 6:19, Rom 12:1-2 em tok, yumi haus holi bilong God olsem na yumi no ken bagarapim, long sprit em ol samting olsem, tok nogut, giaman, tingting nogut na arapela moa, na bodi em ol samting olsem bia, buai na smok, em God ino mekim em givim save long man no man i makim long tingting bilong em yet.

Olsem na brata yu nid long redim baibel na prea moa na God bai soim planti samting moa long yu. Na noken bhainim doktrin bilong sios tumas. Yu mas daunim bel na kisim baptais long nem bilong Jisas Kraus, Act 2:38.

**Lucas Andreas  
Mosbi**

## Watpo na Enga gavman i no save wok

### Dia Edita,

Mi wanpela manki bilong Laiagam insait long Enga i laik autim na askim sampela kwestens bilong mi i go long nesanel gavman. Long lukluk na sekim Enga provinsel gavman na mi i laik askim sampela kwestens bilong mi:

• Wanem taim bai Enga provinsel gavman bai wok?

• Wanem taim bai developmen i kamap long Enga?

• Watpo na Enga kamapim planti politik?

• Husat tru man bai go pas long Enga?

• Watpo na ol lida stilim mani na mekim bisnis bilong ol?

• Enga Yaka Lasamana o nogat?

• Wanem taim bai politik bilong Enga i pinis?

• Watpo na Enga lidas lus tingting long ol pipel?

• Wanem kain gavman bai ronim Enga?

• Mani bilong Enga gavman i stap we?

• Watpo na Enga i no senis yet?

Dispela em wanpela bikpela samting long kamautim o askim bilong igo long Enga gavman na tu. Enga pipel i mas sapotim dispela pas na tokim Enga gavman long mekim wok.

**Kalai Pima  
Bomana, NCD.**

Sapos yu laik long salim pas i kam, salim long dispela adres.

Edita, Wantok niupepa  
P. O. Box 1982, Boroko,  
National capital District.

• Yu mas trupela nem bilong yu long pas bilong yu.



## Ami mas kisim gret 6 long fos

### Dia Edita,

Mipela tripela manki bilong Sepik, mipela i laik sapotim pas bilong tupela brata ya Mathew Wamahau i bin rait long Wantok Niuspepa long Julai 11, 1996 long dispela yia na narapela em Kuato S. Jook em tu i bin rait long Wantok Niuspepa long 12 Septemba, 1996.

Mathew Wantaim Kuato S. Jook i tok gret 6 mas joinim difens fos na holim raifol gan.

Mipela tripela ya, mipela i lukim olsem nau yet, planti ami i dai pinis long han bilong ol biru oraifol mipela i laik bos bilong ami o gavman mas kisim planti gret6 manki joinim ami mipela i aik tok yet olsem, sapos ami laik kisim nupela rikrut ol i mas ganman tasol na traim long sut na abrusim katres.

Em tasol askim bilong mipela tripela.

**John. O, Petrus. W  
Peter. M, PS kantri, Wewak.**

## Sapotim nem Buresong i go het

### Dia Edita,

Mi wanpela manki Mindik mi i stap long Mosbi i go na kris-mas mi kam i go long ples. Long ples mi i stap long kol ples Mt Hagen, na mi bin baim wanpela Wantok Niuspepa na lukim nem bilong ol tim meits bilong mi long Mosbi Buresong, na mi sori wari stret na salim kol gritings na 21st independense bilong mi i go long ol manki Isik fans ol i bin fomim Buresong long Mosbi seven na mi salim ful sapot bilong mi i kam long yupela i ken lukim na sapotim nem Buresong bai i stap yet.

Tenkyu tru mi bai amamas tru long lukim redim na givim sapot bilong yumi.

**Noi Kumbit  
Mt Hagen, WNP.**



## Sori tru long ol soldia

**Dia Edita,**

Mi wanpela manki Simbu tasol nau nem bilong mi Jacob Kopla. Mi gat bikpela wari tru nau mi laik autim long pablik long Wantok Niuspepa. Long de 13 Septemba 1996 long 1.00 kilok mi istap long 7 mail ples balus na mi lukim 9-pela bodi bilong ol soldia long Bogenvil na ol karim i kam.

Mi lukim na bel bilong mi em krau tru na mi wari nogut tru. Yupela gavman mas tingting gut. Ol dispela soldia em no pikinini bilong pik na dok. Pik dok karim pikinini faiv o siks long wanwan de. Tasol man mama karim yumi wanwan tasol. Yupela tingim gut yupela ol memba na praim minista noken salim soldia go moa long Bagenvil moa. Larim ol BRA stap na ol narapela kantri ol ken kam kisim ol.

Ol soldia laik dai na wok soldia. Nogat. Ol amamas long wok mani na tingting long sindaun bilong ol na wok. Sampela marit na bai ol meri pikinini ol kisim taim tru. Ol gat bikpela wari tru. Husat bai lukautim ol dispela tingting kamap bikpela tru long laip bilong ol.

Em tasol mi gat wari long em mi putim kam long Wantok Niuspepa. Yu husat brata susa laik helpim mi yu rait tasol i go long Wantok nius tasol.

**Jacob Kopla  
Mosbi**

## Ol memba i no givim sevis

**Dia Edita,**

Mi wanpela manki long kol ples lalibu husat i no amamas long ol lida bilong mipela.

Mi wanpela studen bilong Pangia Memoriel Hai Skul, mi save tingting olsem ol dispela lida we yumi save makim, ol i save mekim olsem. Taim mipela ol grasrut i save traim hat long painim ka na laik ol memba i save kam tasol ol i no save kisim mipela long wanem as ol i save mekim olsem.

Olsem na kain pasin bilong ol memba i save mekim na planti trabel i kam. Olsem na long dispela as mi i no amamas long dispela pasin ol memba i mekim.

Taim ol memba i mekim olsem ol sampela bilong ol manmeri i save tingting planti na ol i save bruk autim long dispela vot biang ol.

**Kem Kiai na  
Puka Tau  
6 Mile Saraga, Mosbi**

# Givim independens long Bogenvil

**Dia Edita,**

Mi ting moabeta PNG i mas givim independense long Bogenvil. Na tu rausim ol soldia long ailan, na givim risos i go long ol pipel.

Mi ting ol BRA i bin i gat wari long risos na laip bilong ol pipel bilong ol long wanem taim Bogenvil kopa i pinisim minerol risos em i no i go bek long helpim ol papagraun nogat, risos i go tasol long ples man bilong gavman tasol na tru ol pipel i hatwok

yet long plantim kaikai long gaden.

Olsem wai yumi PNG i wok long flatwok yet! Mi ting olsem yumi i ris tru long risos tasol i luk olsem yumi stap yet long tumbuna taim.

Sori tru long ol wantaim bilong yumi i dai pinis long dispela pait olsem ami na ol BRA.

Mi laik gavman i mas save olsem. "Risos em i laip bilong ol pipel." Na gavman i nogat rait long kisim nating risos bilong ol

pipel. Long wanem, i nogat wanpela taun gavman i bin wokim ol risos na givim ol pipel nogat tru, God wanpela tasol i bin wokim dispela na givim ol man wan wan na i bilong em.

Asua bilong gavman tasol na planti soldia na ol BRA memba i dai. Olsem na Bogenvil i mas kisim independens.

**Burcx Kafe  
PNG man**

## Planti edvetismen long ol gutpela muvi o progrem

**Dia Edita**

WANPELA samting mi no save hamamas long luking long EMTV em aditvesment i save kamap namel long ol programe olem Fizz, movie, mekim music na ol narapela pgorame olsem.

I gutepla sapos EMTV yu putim kamap ol company i sponsor dispela programme, olsem Pepsi long Fizz eria putim long Pepsi tasol na i long olgeta aditvestment olseme Boral gas, Pacific, PNG Motors na ol narapela movie, wastaim taim by ol viewer long lukim ol gutpela olseme Fizz na narapela movie.

Em taso wari bilong mi

**Br Andrew Singu  
HRC**

## Menyamy bus pipel nogat sevis

**Dia Edita,**

Mi wanpela manki Umba long Menyamaya. Mi laik autim bikpela wari bilong mi i go long memba bilong Menyamaya long lukluk bilong mipela ol Savatoka pipel.

Mipela save olsem mipela i no kisim sampela helpim long memba bilong Menyamaya. Olsem na yupela ol papamama long Savatoka. Yupela mas lukim gut man stret bilong Savatoka na makim nau taim bilong politik raun na yumi mas lukluk gut na makim. 1984 i kam inap long 1997. Yumi i no gat helpim bilong mipela ol Savatoka pipel. Olsem na mipela Savatoka pipel i stap maket tasol.

Yupela mas lukim gutman stret bilong Savatoka na yu putim han. Yu wanem memba laik go long Umba. Yu mas save olsem yu i no inap kisim wanpela vot. Memba bilong Menyamaya Thomas Pelika. Em i no save lukluk long ol lain bilong bus em save helpim ol lain bilong em tasol 1997 tingim gut na vot. Yu laik vot lukim gut man bilong God stret.

Yu husat laik egensim o laik skurim em welkam tasol.

**Michael Wosako  
Umba viles  
Lae, Morobe provins.**

### Salim pas i kam long:



**WANTOK NIUSPEPA  
PO BOX 1982 BOROKO**

## Yumi olgeta mas tanim bel baptais na kisim holi spirit

**Dia Edita,**

Mi laik bekim pas bilong brata Camilus Dominic i stap nau long Popondetta taun bin kamap long 13 Februari 1997 long Wantok Niuspepa.

Brata pas bilong yu em mi wanbel long sampela hap tasol i no olgeta hap i laik olsem yu daunim stret rivaivol Sios. Yu tingim yu pointim wanpela pinga bilong yu long ol na ol narapela foapela i poin i go we.

Yu tok tu olsem ol misineri bilong Roman Katolik sios i bringim kamap lait na stopim ol pasin tumbuna olsem sanguma buria na pusim bipo long 1960s.

Hap tok yu tok em i true tasol i no olgeta tok yu toktok long en. OL i stopim bikpela samting tasol olsem sanguma na bikpela samting tasol olsem sanguma na birua. Lo na olda fu i helpim long stopim dispela.

Tasol brata Dominic olsem wanem long kain pasin olsem tingting tumbuna o tewel pis, singsing tumbon, askim ol tumbuna idai bipo long reasim sik

bilong wanpela sikman o meri, durin spak na painim danis behain bel i kirap na holim meri. Dispela ol pasin, ol Roman Katolik i rausim tu o nogat, wantaim sin i nogat mesa. Bikpela o liklik em i sin.

Yu bin bekim pas bilong brata Paul Nagene na tok olsem kristen laip em i no isi. Em i hat na yu mas isi isi long kamap kristen.

Yu noken hait long shedo bilong dispela hap tok na go het long mekim sin o stap olsem na isi, isi long kamap stretpela man. Olsem wanem sapos bikpela i kamap yumi wok long isi, isi yet. Bai yumi go we.

Yumi olgeta mas tanim bel, baptais na kisim holi spirit olsem baibel i toktok long en. (Aposel 2:38).

Sapos yu bel hevi yet long dispela pas, yu i welkam tasol long autim tingting bilong yu.

**Jack Seimoni  
Kavieng**

## Sans long lainim ka

**Dia Edita,**

Mi wanpela manki bilong Poroman insait long SHP tasol nau mi stap long Kimbe, WNB. Mi laik tok save long pablik olsem husat man i no save long ronim ka i gat sans bilong yupela long lainim ka.

I gat tripela bas bilong mipela "Nipa • Route 2. Nem bilong ol dispela ol tripela em Kupin Ekspres, Waru Ekspres na Ruth Ekspres. Tripela nupela bas tasol tasol gia boks i bagarap liklik na ol stap tasol bilong ol man lainim 30 minit K20 wan awa K40 tripela bas ya istap long num ando plentesen mipela sampela manki plentesen i save lainim tasol lek han

save guria guria tumas bikos rot tu i no gutpela ston rot na eksol bilong ka i save hap em daun olsem na man laik traim bes bilong em long lainim ka na kisim laisens welkam tasol. Klostu bai ol salim. Prais mani Waru Ekspres K8. Kupim Ekspres K6 na Ruth Ekspres K7. Man laik baim aut tu em gutpela.

Yu yet go stretim gia boks na ronim sans ya kam lainim ka long plentesen.

**Jack Epe  
Marop Isi  
Haella Plantesen  
Kimbe, WNB.**

## Erap bai blokim vot

**Dia Edita,**

Mi wanpela manki bilong Erap insait long Nawaeb ilektoret long Morobe provins. Mi laik autim dispela bel hevi bilong mi i go aut long ol pipel na ol man husat i redi long resis long kisim dispela Nawaeb Open sit.

Mi laik tokaut klia olsem bihain long 6 o 7-pela nesenel ileksen bilong kantri ol Erap i bin vot i kam, dispela ol man husat ol i bin votim ol, ol i save lukim ol pipel bilong Erap olsem samting nating.

Long dispela vot bilong ol pipel long Erap i givim long ol Nabark na Wain, mi no lukim wanpela lukluk tenis o helpim bilong gavman i go insait long bikpela hap eria bilong Erap nogat na nogat olgeta. Bikpela hap eria bilong Erap i stap yet olsem long taim bilong ol tumbuna. Pasin bilong brukim ol bikpela wara na i go antap i kam daun long ol maunten i stap yet. Klostu long yia 200 na Erap i pilim pen long karim kago yet.

Olsem na mi laik tokim yu husat i tingting long resis long 1997, Erap bai soim yu dispela pilim em i gat long 1997 nesenel ileksen Erap nau istap long bolim vot. Erap nau i luksave long ol rong bilong em. Nau Erap bai blok. Yu bilong haphap tasol bai kam insait Erap bai ino inap goaut.

Sapos yu no save long bikpela wok bilong lukautim ol pipel; mi tokim yu, yu noken sevim het nating. Nao em taim bilong ol pipel long ol yet i luksave long ol gutpela lida na makim ol.

Erap bai ino inap givim sans long yu husat ikam insait na wokim politik nau i no taim bilong wokim politik. Taim bilong skelim ol man na makim gutpela lida tasol. Erap i luksave pinis long husat i trupela lida long lukautim Nawaeb, Morobe provins na kantri olgeta. Olsem na lukluk na makim trupela lida bilong yumi. Yu husat i laik sapotim o egensim yu welkam tasol.

**Kaisa T. Mandon  
Aper Erap, Morobe provins.**

## Amamas long ol gutpela raita

**Dia Edita,**

Mi tupela boi Goilala na Hanuabada. Mi tupela laik tok amamas long Wantok Niuspepa long gutpela nius bilong ol grasrut manmeri bilong PNG.

Na i no yet mipela amamas long ol pas seksen na kolum. Ol save tok stret pilim na hevi samting i kamap. Joe Kau na Eddie Saunders. Plis tok amamas bilong mipela i go long ol. Na long Eddie Saunders mipela i ting ol toktok bilong em i mas bilong lewa na tingting bilong ol pipel.

Eddie i mas rait moa na glasim yet lewa na tingting bilong grasrut. Tenkyu.

**Kem Kiai na Puka Tau  
6 Mile Saraga  
Mosbi**

## Votim ol strongpela lida

**Dia Edita,**

Mi wanpela yangpela bilong Morobe provins na mi i laik bekim pas bilong brata Samuel Lapai i bin kamap long 19 Septemba, 1996 em i bilong Sandaun tasol nau yet em i stap long Lae, Morobe provins.

Brata ya, em i tok long larim Somare i go pas long kantri, "em yes ya!" Mi i sapotim tru dispela pas bilong brata yia. Long tingting bilong mi, mi i laikim papa Somare, Steven Pokawin na Peter Barter, kain man olsem ol i mas lainim kantri long neks yia 1997 na go olsem.

Plis ol man bilong vot long neks yia, tingting gut pastaim na votim man husat ol i ting bai pati bilong ol bai apim ol kain gutpela man na bai wanpela bilong ol i ken kamap praim minista na ronim kantri bilong yumi Papua Niugini gut tru.


Na i noken votim pati bilong man bilong hungre long pawa, biknem na wansait man, kain man olsem bai no inap long ronim gut kantri bilong yumi Papua Niugini.

Em tasol na husat i laik bekim o agensim, em laik tasol.

**J.K. Apmaekam  
Lae, Morobe provins.**



## ADVERTISEMENT



# ELECTORAL COMMISSION

Papua New Guinea

Electoral Commissioner Mr Reuben Kaiulo



## TOKSAVE BILONG NIMINESEN

ILEKTREL Komisin i putim dispela toksave i go long ol kendidet o ol man husat i laik sanap long nesanel ileksens i mas lukim gut.

### NOMINESEN PIRIET

Nominesen bai i op long 4.00 pm - Fonde April 10, 1997  
 Nominesen bai i pas long 4.00pm - Fonde April 17, 1997

### PLES WE NOMINESEN BAI I KAMAP

- Ol nominesen bilong ilektret yu mekim wantaim Ritening Opisa bai i pinis long 4.00 pm Fonde April 17, 1997.
- Ol nominesen bilong ilektret we yu no bin stap long en bipo yu tasol yu putim nem bilong yu long sanap long en i go long Ritening Opisa bai i pas long 4.00 pm Tunde April 15, 1997.

- Ol nominesen bilong ilektret we yu putim wantaim Asisten Ritening Opisa bai i pas long 4.00 pm April 15, 1997.

### NOMINESEN FOM

Ol kendidet i mas pulumapim nominesen Fom N 12 (Nominesne bilong kendidet olsem Memba bilong Nesnel Palamen).

### NOMINESEN FI

Nominesen fi em K1000 we kendidet i mas peim long beng sek o kes. Yu mas peim i go long provinsal tresara (bipo ol i kolim ol long manesa, BMS) o long ilektrel Komisin Tras Akaun bilong Papua Niugini Benking Koporesen. Yu mas kisim risit pepa long provinsal tresara o long han bilong PNGBC beng long ilektret bilong yu na karim i go long Ritening Opisa long taim yu putim nominesen bilong yu.

## RETURNING OFFICERS TELEPHONE NUMBERS

### HIGHLANDS REGION

NAME	PROVINCE	ELECTORATE	T/PHONE No.
Yapino Mango	Southern H/Lands	Southern Highlands	549 4378
Morris Masiboda	Southern H/Lands	Ialibu-Pangia	540 1603
Andrew Ipai	Southern H/Lands	Imbonggu	549 1378
Jacob Una	Southern H/Lands	Kagua-Erave	549 1378
Tol Lol	Southern H/Lands	Komo-Margarima	540 8060
Aiwa Sawa	Southern H/Lands	Koroba-Lake Kopiago	549 1378
Wilfred Arikapu	Southern H/Lands	Mendi	549 1378
Peter Buamera	Southern H/Lands	Nipa-Kutubu	549 1378
Apateta Puri	Southern H/Lands	Tari	540 8072
Jack Karali	Western H/Lands	Western Highlands	542 2349
Joseph N Amban	Western H/Lands	Angalimp-South Wahgi	542 1627
Ogla Makindi	Western H/Lands	Baiyer-Mul	542 1626
Gabriel Kiap	Western H/Lands	Dei	542 1627
Luke Pena	Western H/Lands	Hagen	542 1626
Clement Koiken	Western H/Lands	Jimi	542 1627
Steven Wi	Western H/Lands	North Wahgi	542 1627
Douglas Lingawa	Western H/Lands	Tambul-Nebilyer	542 1627
Edward Konu	Enga	Enga	547 1084
Ben Basewa	Enga	Kandep	547 1084
Kandak Ralik	Enga	Kompam-Ambum	547 1084
Kaddy Lamang	Enga	Lagaip-Porgera	547 3940
Alphonse Kipakapu	Enga	Wabag	547 1078
Maku Kopyala	Enga	Wapenamanda	547 4094
Peter Aba	Chimbu	Chimbu	735 1155/1204
Stephen Yakali	Chimbu	Chuave	735 1155/1204
Daing Kill	Chimbu	Gumine	735 1155/1204
Joe Nopro	Chimbu	Karimui-Nomane	735 1155/1204
Limbia Tiagoba	Chimbu	Kerowagi	735 1155/1204
Robert Uran	Chimbu	Kundiawa	735 1155/1204
Paru Kairi	Chimbu	Sinasina-Yonggamugl	735 1155/1204

### MAMOSE REGION

Ben Beiyao	Eastern H/Lands	Eastern Highlands	732 1151
Leo Kaka	Eastern H/Lands	Daulo	732 1151
Brown Apaise	Eastern H/Lands	Goroka	732 1569
Wesley Ioko	Eastern H/Lands	Henganofi	732 1151
Sengu Siserta	Eastern H/Lands	Kainantu	732 1151
Ipai Haui	Eastern H/Lands	Lufa	732 1151
Gilchrist Tamoitamoi	Eastern H/Lands	Obura-Wonenara	732 1151
John Kumbuk	Eastern H/Lands	Okapa	732 1151
Justus Kiangui	Eastern H/Lands	Unggai-Bena	732 1135
Alwynn Jimmy	East Sepik	East Sepik	856 2090
Thaddeus Ulapapik	East Sepik	Ambunti-Dreikikir	856 5101
Martin Anskar	East Sepik	Angoram	858 3033
Simon Failou	East Sepik	Maprik	858 1207/1212
Alfred Fonn	East Sepik	Wewak	856 5101
Wini Jimbanau	East Sepik	Wosera-Gau	858 1207/1212
Alois Numbuda	East Sepik	Yangoru-Saussia	856 2090
Abraham Wari	Madang	Madang	852 2644
Martin Hanibal	Madang	Bogia	853 4446
George Chapok	Madang	Madang	852 2404
Vei Makam	Madang	Middle Ramu	VHF
Ernest Abel	Madang	Rai Coast	853 1401
Alung Wang	Madang	Sumkar	853 7488/7484
Nigel Mes	Madang	Usino-Bundi	VHF
Kala Rawali	Morobe	Morobe	472 3116
Brian Wambila	Morobe	Bulolo	474 6230
Roy Kamen	Morobe	Finschhafen	474 7007

### MAMOSE REGION (CONT)

Topo Sito	Morobe	Huon Gulf	473 1715
Ilai Kuria	Morobe	Kabwum	VHF
Tarosi Angori	Morobe	Lae	472 3421
David Linonge	Morobe	Markham	474 9366
Carl Baga	Morobe	Menyama	474 0218
Justin Ruaming	Morobe	Nawae	474 9319
Mathias Awagasi	Morobe	Tewai-Siassi	VHF
Peter Tavun	West Sepik	West Sepik	857 1166
Rori Rawah	West Sepik	Aitape-Lumi	857 2122
Bidd Pamaraka	West Sepik	Nuku	857 5 906
Bobby Bigilam	West Sepik	Telefomin	VHF
Max Airo	West Sepik	Vanimo-Green River	857 1 396

### NEW GUINEA ISLANDS REGION


Mathias Pihai	Bougainville	Bougainville	983 9990
Mathew Kusa	Bougainville	Central Bougainville	986 8019
George Manu	Bougainville	North Bougainville	983 9942
Peter Siabake	Bougainville	South Bougainville	983 9990
Aron Maramun	East New Britain	East New Britain	983 7696
Alois Sumunda	East New Britain	Gazelle	983 7696
Maima Sine	East New Britain	Kokopo	983 8639
Louis Tomari	East New Britain	Pomio	982 9311
Jimmy Ravou	East New Britain	Rabaul	983 7696
Joe Hilarai	Manus	Manus	470 9048
Wilson Kuve	Manus	Manus	470 9048
Joap Voivoi	New Ireland	New Ireland	984 2317
Leo Tualir	New Ireland	Kavieng	984 2219/2214/2317
Anthony Drett	New Ireland	Namatanai	984 3030
Simon Sinai	West New Britain	West New Britain	983 5484
Peni Maroro	West New Britain	Kandrian-Gloucestera	981 7901/ 7304
Sam Esakia	West New Britain	Talasea	983 5573

### SOUTHERN REGION

Glen Gabi Gani	Central	Central	321 7482/4770
Gei Raga	Central	Abau	329 2087/2084
Sylvester Bannon	Central	Goilala	325 9772
Chris Oasora	Central	Kairuku-Hiri	321 1966/9215
Kana Wamala	Central	Rigo	329 5085
Poeware Tore	Gulf	Gulf	648 1074
Jim Ufaio	Gulf	Kerema	648 1074
Tolao Putu	Gulf	Kikori	648 1074
Frank Gabi	National Capital	National Capital	325 4252
Kila Egaba	National Capital	Moresby North East	325 4252
Gari Gamoga	National Capital	Moresby North West	325 4252
Dou Babaga	National Capital	Moresby South	325 4252
Miaru Aupika	Northern	Northern	329 7335
Elliot Damuli	Northern	Ijivitari	329 7335
Tom Kiap	Northern	Sohe	329 7167
Gelam Anagogo	Western	Western	645 9161/9174
James Daligi	Western	Middle Fly	VHF
Bibin Fafaeg	Western	North Fly	548 9553
Aruba Gami	Western	South Fly	645 9161/9123
Nimrod Mark	Milne Bay	Milne Bay	641 1229
Kobule Bwaletu	Milne Bay	Alotau	641 1314
Gelenisi Tauliso	Milne Bay	Esa'ala	641 1217
Ebaia Galele	Milne Bay	Kiriwina-Goodenough	641 1510
Genaia Elimo	Milne Bay	Samarai-Murua	643 7426

Issued by: Electoral Commissioner Reuben T. Kaiulo, MBE





# PNG BUSINESS

**PNG BUSINESS** 32 PAGES

ISSUE No. 262 APRIL 1997 501

## PNG IMPORTED 160,000 TONNES RICE IN 1996, PAID OUT K130M

by **FAY DUEGA**

PAPUA New Guinea last year took out a loan worth K50 million from the World Bank at the bank's terms and conditions. Ironically, the country the same year imported 160,000 tonnes of rice, giving away K130 million in the process.

Later this year, the import ban on fresh vegetables is expected to be lifted. This will enable supermarkets to bring in fresh food from overseas, giving away money in the process.

Dr Sergei Bang, the manager/technical support activities at Fresh Produce Development Company (FPDC), Pty Ltd., said that PNG could have easily kept the money in the country if it substituted rice for locally grown crops.

Speaking at last month's market workshop, Dr Bang urged Papua New Guineans to help cut the country's funding deficits by consuming more locally grown food crops in place of those imported. He made the call after presenting the 1990 figures provided by the National Statistical Office, which saw PNG import 87,603 tonnes of wheat flour, sending out a total of K21.8 million, and imported 4,337 tonnes of fruit juice and jam.

Dr Bang said that with the current situation of basic needs which lack a lot of systems, storage facilities etc, the local growers are likely to miss out because they will be competing with overseas growers who have better facilities.

Dr Bang said that PNG can improve the deficit in the balance of payments by either increasing its exports; or by reducing imports through substitution, considering the fact that PNG pays out an estimated K130 million on rice annually.

Dr Bang said that PNG's food production has been estimated to be between K600 to K3,000 million per annum. Most of which remains within the subsistence economy.

He said that about K80-K100 million per annum (60,000 tonnes) enters the 'marketed' food crop sector, most of which are sold in public markets throughout the nation. Last month's market workshop estimated that an annual estimated value for sales through public markets is K60-K80 million (40,000 tonnes).

to page 2

**NEW APPOINTMENTS. p7&8**

**Travel and tourism. p11-14**

**Workers Mutual Fund. p15-18**

**INSERT NEXT MONTH ISLANDER NEWS MONTHLY**

**A wait for their shares...** People of Nipa gather around a mumu pit to wait their share of pork. Pig meat is rare and whenever people have the opportunity they make the most of it. Photo: Joe Kanekane.

**C - 200**  
The small Mercedes has been a star among compact cars; the one for others to follow. With the latest mercedes, we are again setting new standards in compact car engineering

**Mercedes Benz**

**E - 230**  
The Mercedes E230 is a truly exceptional car, with its front and rear aprons and AMG light-alloy wheels, the appearance alone creates a powerful overall impression. Its power output is converted smoothly into dynamic performance by a new, electronically controlled five speed automatic transmission.

**NOW IN STOCK!**

**BOROKO MOTORS**

*The Best Buys*

Keep up to date with the latest happenings in the business and investment sector of Papua New Guinea by reading your copy of PNG BUSINESS.

Published at the end of each month, PNG BUSINESS is distributed direct to its target market, the decision makers and looks to comment on such items as new product releases, new company openings, any new initiatives which may influence local trade, changes to key management etc...

## ENSURE YOU STAY INFORMED WITH PNG BUSINESS

PROUDLY PUBLISHED BY WORD PUBLISHING COMPANY PTY. LTD. P.O. BOX 1982, BOROKO, NCD, PHONE: 325 2500 FAX: 325 2579.






• Antap long Lephau: Susa bilong Telikom i pulim bal abrusim turangu bilong Medics. Telikom win 2-0.

• Antap raithan: Pot Mosbi Skul Bois soka resis bilong anda 10 long las wiken namel long Ela Beach na Pom Intanesenal skul.

• Lephau: Mame Kasalau bilong Pom United rausim bal long Brian Tani bilong Blue Kumuls insait long maija nok aut pilai las wiken long Mosbi. Pom United i bin win 4-1. Poto: Ivan Bayagau.

# Ol spot eksen long las wiken

*Ol poto: Harry Kombega*



• Waghi Magani ragbi lig tim husat i resie long Westen Hailens. Poto: Peter Maima.



• Mosbi Skul Bois soka salens i kirap gen na i save pala laif long Sir John Guise Stadium.



# Bikpela Guria katim telepon waia

## Telikom lusim LFA na joinim Lahi

### FRANCO NEBAS i raitim

OLPELA sampion tim bilong Lae Futbol Asosesen (LFA), Telikom i bin hangamap long net bilong Guria long nambawan pilai bilong ol insait Lahi soka kompetisen las wiken. Guria i bin dastim ol 4-1.

Ol manki Telikom i Lusim LFA tupela wik i go pinis na joinim Lahi soka asosesen bihain long wanpela kros pait namel long ol pilaia na sapota bilong Goro na Telikom. Long dispela pait, ol sapota bilong Goro i bin ran i go insait long pilai graun na paitim ol pilaia bilong Telikom nogut tru. Long dispela as tasol na ol boi Telikom i bin

lusim LFA na joinim Lahi soka asosesen. Dispela em nambawan taim tru bilong Telikom long lusim LFA bihain long 9-pela yia ol bin pilai wantaim ol.

Telikom i gat nem long kamapim sampela gutpela pilaia long Papua Niugini. Sampela bilong ol biknem pilaia olsem; olpela midfilda bilong PNG, Raymond Nasa na liklik brata bilong em, Gidix Nasa, husat nau i pilaia olsem swipa bilong PNG skwat. Sampela yangpela manki olsem, Abia Abia, Nabo Ameo,

Richard Kaizam, Ruben Kanga na planti moa husat i save kisim pes bilong LFA na pilai insait long bikpela tonamen olsem, nesinel sempiosip, Momase sempionsip na ol klap sempionsip.

Tasol sori tru. Las wik ol i bin pilim pen bilong lus long wanpela strongpela tim insait long Lahi soka resis. Guria i bin skoa pas long 15 minits insait long fes hap bilong pilai. Straika, Lui Harry i bin brukim kiau, taim winga Leo Bule i bin salim wanpela bal flai i kam na pundaun gut antap long lek

bilong em. Dispela wanpela gol i stap inap pinis bilong fes hap.

Long seken hap, stail bilong pilai i bin sanis olgeta. Ol fulbek na ol defenda bilong Telikom i no bin was gut long maus bilong gol mak. Ol i bin mekim planti paul pilai. Dispela i helpim ol Guria long apim skoa bilong ol i go antap moa long foa pions. Ol liklik longlong pilai i givim Guria bikpela sans tru long skoa. Yakam Kipu i pairapim tupela gol na Harry skoarim namba tu gol bilong em long dispela apinun.

Ol straiika, Gidix Nasa na Ruben Yanga i bin traim kain kain rot long skoa tasol ol i bin go pas long brik wol bilong ol Guria defendas. Fulbeks bilong Guria i bin was gut tru na rausim bal hariap long lek bilong Nasa na Yanga i go inap long pinis bilong pilai. Long las minit stret, yangpela Puy i bin brukim kiau. Telikom i bin lus wan sait tru, tasol resev gret bilong ol i bin nekim Guria 1-0 na anda 19 i bin dro wantaim ol Bugandi.

Long arapela primia gem; Rapatona i bin fofitim Gee Athorn, Dazzle Morobe United nekim Sikam 3-0, Sobou rausim trausis bilong Asiawe 6-4 na Shell Unitech sutim daun Elcom 3-0.

## Ol meri Mosbi kisim bek sofbal taitel long han bilong Lae

AI WARA i bin kapsait long ai bilong planti yangpela pilaia bilong Lae tasol em leit pinis. Ol meri Mosbi i stapim ol long karim sil i go bek long wopa kantri, bihain long wanpela strongpela gren fainel las wik Sande long 22rd nesinel sofbal sempionsip hia long Pot Mosbi.

Lae i bin pilai semi fainel wantaim Maut Hagen na dastim ol meri Hagen 7-3 long go insait long fainel. Bihain tasol long wan aua malolo, ol meri Wopa kantri i go bek long defendim taitel bilong ol long gren fainel wantaim Pot Mosbi tim 1. Tasol sori tru, ol meri Mosbi i no laik larim sil i go bek long Morobe Provins. Olsem na ol pilai gut tru long holim sil i stap long kapitel siti.

Long stat bilong pilai, win i bin trip tasol antap long spes. Tupela tim wantaim i bin pilai strong tru na i no laik larim arapela tim i skoa. Long pinis bilong seken ining, Wendy Katusele i bin siksti i kam hom long nambawan ran bilong ol meri Mosbi. Tasol ol meri Wopa kantri i no laik larim ol meri biktaun skurim skoa bilong ol i go moa. Ol yusim kain kain stail na teknik long stapim ol meri Mosbi.

Long stat bilong namba tri ining, Antonia Tatai, taksi i kam hom long levolim skoa bilong Mosbi. Taim ol meri Mosbi i go insait long namba tri ining bilong ol, ol meri Lae i bin autim tripela pilaia long wanpela taim tasol long stapim ol meri Pom. Tasol wan kain pasin ol meri Mosbi i bin givim long Lae long olgeta inings bilong ol.


Long namba foa ining, Jenny Pilak i bin tekov long seken beis i kam hom long bringim rans i go antap 2-1. Tupela tim wantaim i bin strongim sait bilong tupela i go na long namba siks ining, Jenny Pilak i mekim narapela ran bilong em long skurim skoa lain i go antap long 2 pions.

Lae i bin mekim planti naispela rans na pairapim bal i go longwe tru, tasol ol meri Mosbi i bin min bisnis tru olsem na ol i no bin ran ol i go moa.

"Ol lain bilong mi i bin mekim planti rans moa long ol meri Mosbi. Tasol mipela i no bin pinisim gut dispela ol rans," kosa Noah Warkia i bin tok. "Tasol planti pilaia bilong mipela em ol yangpela tumas. Kain meri olsem Beverly Pasen, Antonia Tatai na planti moa," em i bin tok moa.

Long narapela sait, kosa bilong ol meri Mosbi, Penial Eliab i bin amamas tru long tim bilong em i bin rausim dispela taitel long han bilong Lae na tenkim ol bikman bilong Pot Mosbi Sofbal Asosesen long makim em kosim dispela wining tim.

Long gren fainel bilong ol man, Pot Mosbi tim 1 i bin rausim tiket bilong Pot Mosbi tim 2, 10-7 long kamap sampion bilong sofbal long Papua Niugini.



• Wanpela pilaia bilong Lae abrusim bal na pundaun krangki tru tasol Lae i bin winim Pom2, 7-3 na lus long gren fainel 3-2 long Pom1. Foto: Ivan Bayagau.

## Volibal tonamen soim rekot long Finsafen

WAREO Spot Asosiesen insait long Finsafen eria i bin holim namba wan volibal tonamen bilong ol long Wareo stesin long lsta wiken. Rothmans Kampani i bin sponsorim dispela tonamen wantaim wanpela volibal net, foapela mutrus tropi, tupela bilong man na tupela bilong meri.

Rothmans Kampani yet i bin mekim olgeta wok long olgeta yia long lsta wiken. Siaman bilong Wareo Spot Asosiesen, Basokanu Matiawe i bin tokaut olsem, dispela gem i nupela insait long Wareo na dispela tonamen i bin kamap gut tru.

"Basketbal na soka i bin kamapim hevi na birua pinis na ating dispela gem em gutpela na bai luk olsem bai mipela mas

holim dispela gem tasol," siaman i bin tokaut.

Long dispela tonamen, 6-pela tim bilong man na 4-pela tim bilong ol meri i bin stap insait. Tim bilong man em: Hilleo, Derazi, Wanza, B.T.F, Monggeng na Mutrus.

Tim bilong ol meri em: Mutrus, C.G.V.N, B.T.F na Gera. Gem i bin kamap tait tru namel long ol man. Foapela tim i bin i go insait long fainel em Wanza, Monggeng, Hilleo na Mutrus

Heilleo i go pilai wantaim Monggeng na rausim Monggens long tupela sets. Hilleo i go long gren fainel pilai wantaim Wanza. Wanza i bin pilai gut na rausim Hilleo long tupela sets.

Wanza kam pes na kisim prais mani wantaim Mutrus trophi,

Hilleo kam namba tu na kisim prais mani wantaim tropi, Monggeng kam namba tri na kisim prais mani na Mutrus kamap foa na kisim prais mani tasol. B.T.F kam na gerazi i bin kisim amamas mani tasol bihain long tupela i bin kamap namba 5 na 6 ples.

Long ol meri, foapela tims i bin i go insait long fainel. C.G.V.N i bin pilai wantaim B.T.F na C.G.V.N i bin rausim B.T.F long tupela sets na i go stenbai long gren fainel.

Mutrus i bin pilai wantaim Qerazi na rausim Qerazi long tupela sets. Mutrus i bin go pilai wantaim BTF na BTF isi tasol rausim ol long tupela sets.

BTF isi tasol rausim ol long tupela sets. BTF ibin i go insait

long gren fainel pilai wantaim C.G.V.N na rausim C.G.V.N long tupela sets. BTF meri kam pes kisim prais moni wantaim trophi, C.G.V.N kam namba tu na kisim prais mani wantaim trophi, Mutrus meri kamap namba tri na kisim prais mani tasol. Qerazi meri kamap foa na kisim prais mani tasol.

Komyuniti developmen asisten bilong Kotte Lokal gavman eria, Mista Ricky Seske Mutingkec i bin tokaut olsem, dispela tonamen i bin kamap gut. Ol pilaia long wanwan tim i bin pilai gut na luk olsem namel long dispela yia yet bai i gat wanpela bikpela volibal tonament kamap.

Dispela tonament i bin i stap long lukaut bilong siaman Basokanu na CDA Ricky Seskeli.



**LAHI SOCCER ASSOCIATION**

1997 WEEK TWO DRAW

**Sik Stadium**

Saturday April 12

8.00 U/19 Sunstriders vs Bugandi  
 9.15 W1 Asiawe vs Gaziga  
 10.30 W2 Waliya vs Sunstriders  
 12.00 D1 Crew Stars vs Muna  
 2.00 Prem 1 /sikambu vs Gaziga  
 4.00 Prem 1 Asiawe vs Rapatona

Sunday April 13

8.00 U/19 Morobe Utd vs Rapatona  
 9.15 W1 Rapatona vs Morobe Utd  
 10.30 W1 University vs Sobou  
 12.00 Prem 1 Telekom vs Elcom  
 2.00 Prem 1 Guria vs Unitech  
 4.00 Prem 1 Sobou vs Morobe Utd

**University 1**

Saturday April 12

11.00 W2  
 12.15 W2 Lae Biscuits vs Sikambu  
 1.30 Prem 2 Telekom vs Elcom  
 2.45 Prem 2 Sobou vs Unitch  
 4.00 Prem 2 Sobou vs Morobe Utd

Sunday April 13

11.00 Prem 2 Sikambu vs Gaziga  
 12.15 Prem 2 Asiawe vs Rapatona  
 1.30 W2 North West vs Eastern Stars  
 2.45 D2 Bugandi vs Eastern Stars  
 4.00 D2 Lae Biscuits vs Kurti Andra

**University 2**

Saturday April 12

11.00 W1 Elcom vs Guria  
 12.30 D2 Dal Labu vs Kuac  
 2.00 D1 Lae Biscuits vs Wullet  
 4.00 D1 Milne Bay Utd vs Late Funzun

Sunday April 13

11.00 D2 Notnas vs Alosip  
 12.30 D2 Suten Blues vs Sunstriders  
 2.00 D1 North West vs Gee Otton  
 4.00 D1 Defence vs Sunstriders

**University 3**

Saturday April 12

10.00 U/19 Sobou vs Asiawe  
 11.15 U/19 Elcom vs Milne Bay Utd  
 12.30 U/19 Unitech vs Telekom  
 1.45 U/19 Lae Biscuits vs Defence  
 2.30 U/19 Gee Otton vs  
 10.00 U/19 Guria vs Gaziga

Sunday April 13

11.15 U/19 Crew Stars vs Eastern Stars  
 12.30 U/19 Late Funzun vs Sikambu  
 1.45 W2  
 2.30 W2

**PORT MORESBY SCHOOL SOCCER ASSOCIATION**

1997 LEAGUE LADDER (After Week 3)

TEAM	P	W	L	D	FF	NR	F	A	Pt
<b>UNDER 7</b>									
Pom Int'l	3	3	0	0	0	0	8	4	9
Ela Beach	3	2	1	0	0	0	10	10	6
S/Joseph's	3	2	1	0	0	0	9	6	6
Murray	3	1	2	0	0	0	11	13	3
Gordons	3	1	2	0	1	0	6	8	3
Korobosea	3	0	3	0	0	0	2	5	0
<b>UNDER 8</b>									
Pom Int'l	3	3	0	0	0	0	6	0	9
S/Joseph's	3	3	0	0	0	0	4	0	9
E/Beach A	3	1	2	0	0	0	4	3	3
Murray	3	1	2	0	0	0	2	5	3
Korobosea	3	1	2	0	0	0	1	5	3
Gordons	3	1	2	0	1	0	1	2	3
E/Beach B	3	1	1	0	1	0	1	2	3
Vacant	3	0	2	0	3	0	0	2	0
<b>UNDER 9</b>									
S/ Joseph's	3	3	0	0	0	0	3	0	9
Ela Beach	3	2	0	0	0	1	6	0	6
P Aravure	3	2	1	0	1	0	3	1	6
WS Demo	3	1	2	0	2	0	1	2	3
Korobosea A	3	1	0	0	0	0	2	1	0
3									
Pom Int'l	3	0	1	0	0	2	0	5	0
Gor/Koro B	3	0	3	0	2	0	0	4	0
Murray	3	0	2	0	1	1	0	2	0
<b>UNDER 10</b>									
Korobosea	3	2	1	0	0	0	3	2	6
Ela Beach	3	2	0	0	0	1	3	0	6
S/Joseph's	3	2	0	0	0	1	2	0	6
Gordons	3	2	0	0	0	1	2	0	6
Pom Int'l	3	1	2	0	0	0	1	2	3
Murray	3	0	2	0	0	1	0	3	0
Ted Diro	3	0	2	0	3	0	0	2	0
De La Salle	3	0	2	0	3	0	0	2	0
<b>UNDER 11 A</b>									
S/Joseph's	3	3	0	0	0	0	0	1	9
E/Beach A	3	2	0	1	0	0	9	6	7
Gordons A	3	2	1	0	0	0	6	6	6
Korobosea	3	1	0	2	0	0	7	4	5
Murray	3	1	2	0	0	0	4	7	3
Pom Int'l	3	0	2	1	1	0	3	6	1
S/ Heart	3	0	2	0	2	0	0	5	0
Vacant	3	0	2	0	3	0	0	2	0
<b>UNDER 11 B</b>									
Korobosea	3	2	0	1	0	0	5	1	7
Gordons B	3	2	0	1	0	0	3	1	7
St. Peters	3	2	1	0	0	0	7	6	6
WS Demo	3	1	2	0	1	0	3	4	3
E/Beach B	3	0	1	2	0	0	1	4	2
P/Aravure	3	0	3	0	3	0	0	3	0
<b>UNDER 12 A</b>									
Korobosea	3	3	0	0	0	0	9	0	9
Pom Int'l	3	2	0	1	0	0	4	1	7
S/ Joseph's	3	0	2	1	1	0	1	4	1
Gordons	3	0	1	2	0	0	1	5	2
Murray	3	0	2	0	1	1	0	5	0
Ela Beach	3	0	0	2	0	1	1	1	2
<b>UNDER 12 B</b>									
St. Peters	3	3	0	0	1	0	7	1	9
Korobosea	3	1	1	0	1	0	2	5	3
Kila Prim.	3	0	2	0	3	0	0	2	0
Ted Diro	3	0	1	0	2	1	0	1	0
P/Aravure	3	0	0	0	1	2	0	0	0
<b>UNDER 13</b>									
S/Joseph's	3	3	0	0	0	0	13	4	9
Gordons	3	2	0	1	0	0	11	6	7
Ela Beach	3	2	1	0	0	0	8	8	8
St. Peters	3	1	0	2	0	0	6	4	5
P/Aravure	3	1	1	1	0	0	8	8	4
Pom Int'l	3	1	2	0	0	0	3	0	3
S/Heart	3	0	3	0	0	0	2	9	0
P/Grammar	3	0	3	0	1	0	2	8	0
<b>UNDER 14 A</b>									
Pom Int'l	3	3	0	0	0	0	19	2	9
Philip Aravure	3	3	0	0	0	0	13	3	9
9									
St. Peters	3	1	1	1	0	0	5	6	4

**PORT MORESBY SCHOOL SOCCER ASSOCIATION**

9th/04/97 DRAWS

**Under 7**

8.00 8.40 Murray vs Korobosea 3 1  
 8.40 9.20 Pom Int'l vs Ela Beach 3 1  
 9.20 10.00 St. Joseph's vs Gordons 3 1

**Under 8**

8.00 8.40 Korobosea vs Vacant 8 1  
 8.40 9.20 Pom Int'l vs Gordons 8  
 9.20 10.00 Ela Beach A vs St. Joseph's 8 1  
 10.00 10.40 Murray vs Ela Beach B 8 1

**Under 9**

8.00 8.40 Pom Int'l vs WS Demo 5 1  
 8.40 9.20 Korobosea A vs Gordons/Koro B 5 1  
 9.20 10.00 Murray vs St. Joseph's 5 1  
 10.00 10.40 Ela Beach vs Philip Aravure 5 1

**Under 10**

8.00 8.50 Ela Beach vs De La Salle 10 1  
 8.50 9.40 Korobosea vs Gordons 10 1  
 9.40 10.30 Pom Int'l vs St. Joseph's 10 1  
 10.30 11.20 Murray vs Ted Diro 10 1

**Under 11 A**

8.00 8.50 Pom Int'l vs Vacant 11 1  
 8.50 9.40 Murray vs Gordons A 11 1  
 9.40 10.30 Ela Beach A vs St. Joseph's 11 1  
 10.30 11.20 Korobosea A vs Sacred Heart 11 1

**Under 11 B**

8.00 8.50 Ela Beach B vs Philip Aravure 2/1 1  
 8.50 9.40 Gordons B vs St. Peters 2/1 1  
 9.40 10.30 Korobosea B vs WS Demo 2/1 1

**Under 12 A**

8.00 8.50 Pom Int'l vs Korobosea A 2/2 1  
 8.50 9.40 St. Joseph's vs Ela Beach 2/2 1  
 9.40 10.30 Murray vs Gordons 2/2 1

**Under 12 B**

10.30 11.20 St. Peters vs WS Demo 2/2 1  
 11.20 12.10 Philip Aravure vs Korobosea B 2/2 1  
 10.30 11.20 Kila Kila Prim. vs Ted Diro 2/1 1

**Under 13**

8.00 9.00 Pom Int'l vs St. Peters 6 1  
 9.00 10.00 St. Joseph's vs Sacred Heart 6 1  
 10.00 11.00 Ela Beach vs Philip Aravure 6 1  
 11.00 12.00 Pom Grammar vs Gordons 6 1

**Under 14 A**

8.00 9.00 WS Demo vs Bavaroko A 7 1  
 9.00 10.00 Korobosea vs St. Peters 7 1  
 10.00 11.00 Pom Int'l vs Philip Aravure 7 1

**Under 14 B**

11.00 12.00 Kila Kila Prim. vs Bavaroko B 7 1  
 12.00 1.00 Pom Grammar vs Holy Rosary 7 1  
 12.00 1.00 Ted Diro vs De La Salle 6 1

**Under 15 A**

8.00 9.00 De La Salle vs Gerehu High 1 1  
 9.00 10.00 Sacred Heart vs Holy Rosary 1 1  
 10.00 11.00 Don Bosco vs Coronation 1 1  
 11.00 12.00 Hohola Youth vs Ted Diro A 1 1

**Under 15 B**

12.00 1.00 St. Theresa vs Kila Kila High 1 1  
 12.10 1.10 WS Demo vs Ted Diro B 2 1  
 1.10 2.10 Pom Grammar vs Bavaroko 2 1

**Under 16 A**

8.00 9.00 De La Salle A vs Bavaroko I/S 1  
 9.00 10.00 Pom Int'l vs St. Theresa I/S 1  
 10.00 11.00 Don Bosco vs Maino Heduru I/S 1  
 11.00 12.00 Sacred Heart vs Kila Kila High I/S 1

**Under 16 B**


12.00 1.00 Hohola Youth vs Maino Heduru I/S 1  
 1.00 2.00 Coronation vs De La Salle B I/S 1  
 1.00 2.00 St. Peters vs Pom Grammar 7 1

**Under 17 A**

1.00 2.00 Don Bosco vs Maino Heduru 1 1  
 2.00 3.00 BV Center vs De Lae Salle 1 1  
 2.10 3.10 Hohola Youth vs Gerehu High A 2 1




**Under 17B**

11.20 12.20 Coronation vs Gerehu High B MS 1  
 1.00 2.00 Pom Int'l vs Kila Kila High 6 1  
 12.20 1.20 Pom Grammar vs Badihagwa High MS 1





# WANTOK SPOT



**Klia long em** • Kepten bilong Arabica Goroka Nokondi, Kuta Uriseo i train long abruaim Philip Waliya bilong Vipers Tim 2 long las wik Sands. Nokondi i bin win 28-22. Lukim stori long Ragbi Lig Nius.

## Coca Cola sapatim PMSA pri sisen fainel

WATSON GABANA i raitim

BISINI soka graun bai paia long dispela wiken taim 8-pela tim bilong man na 4-pela tim bilong meri kik insait long PMSA Coca Cola pri sisen fainel.

Coca Cola, husat i namba wan spona bilong dispela pri sisen fainel bai givim foapela tropi na ol arapela liklik prais i go long ol tim husat i kamap na go insait long fainel bilong dispela pri sisen.

Long las wiken, University, GFC, POM City United, Mormase, Hoods, Babaka, Defence na Tarangau i bin pilai gut tru na winim ol nokaut gem bilong ol long stap insait long semi fainels long dispela wik Sarere. Long tim bilong ol meri, University, Telikom, TST Stars na Wanzesi bai brukim bun insait long fainel bilong ol tu long dispela wiken.

Presiden bilong PMSA, Mark Kelep i bin tok olsem, bihain long fainel neks wik, bai ol i go het wantaim propa sisen long narapela wiken. Long dispela wiken, Coca Cola bai kamap mein spona bilong pri sisen fainels. Menasa bilong Coca Cola hia long Mosbi, Charlie Wanma i bin tok olsem, dispela sposasip em stat tasol bilong bikpela samting Coca Cola i laik mekim wantaim soka hia long PMSA.

"Sapos ol bikman bilong PMSA i mekim gut long dispela liklik helpim mipela bai givim ol, bai Coca Cola lukluk long bikpela samting long bihain taim," Mista Wanma i bin tok.

• Presiden bilong PMSA i bin sapatim tingting bilong PNGFA long stapim Anda 17 tim i go pilai long Nu Silan. Em i bin tok olsem, yumi i no redi gut na i no gutpela long yumi westim mari long salim tim nating i go pilai long ol bikpela pilai olsem.

"Yumi mas gat gutpela kosa na redim tim gut pastaim na yumi ken go pilai ovasis. I no gutpela long yumi salim wanpela tim nating. Iaim yumi no redi gut. Sapos ol i no pilai gut o lus na kam bek long PNG, yumi bai kirap gen na sutim tok i go i kam, we i no gutpela," Kelep i bin tok.

• Long trening kem bilong PNG skwat long neks wik, Kelep i bin tok olsem, PMSA bai amamas tasol long lukautim ol PNG pilai bilong yumi. Tasol nau yet, PMSA bai i no inap painim haus bilong ol pilai. Em bai wok bilong PNGFA long stretim ol dispela samting.

Ol bikman bilong soka long Mosbi i kamap pinis wantaim wanpela komiti long painim rot bilong ranim dispela wol soka kwalitai gem wantaim Fiji na Nu Silan long mun Jun. Ol memba bilong dispela komiti em: Jos Turia, Cost Baku Wai, Goma Awa, Justine Tkatchenko na sampela arapela bikman bilong gavman na ol pravei kampani. Dispela komiti bai lukluk long rot bilong hostim dispela bikpela pilai. Pilai bai stap long Sir Hubert Murray Stadium.

INSAIT

Guria daunim  
Telikom  
- pes 22

Ol spot  
poto  
- pes 21

8-pes  
Ragbi Lig  
Nius

Ol spot  
dro  
- pes 23

# Telikom lusim LFA

TELIKOM Soka Klap long Lae i bruk lusim Lae Futbol Asosiesen (LFA) pinis long dispela yia tasol bihain long lsta pri sisen salens. Na i no westim taim, Lahi Soka Asosiesen (LSA) i kisim Telikom i go joinim asosiesen pinis.

Telikom i bin bungim hevi taim ol sapota bilong Goro i bin lusim sait lain na i go insait paitim ol pilai bilong Telikom. Tasol Telikom opisel i skelim dispela i bikpela birua bikos planti taim ol pilai bilong em i bin bungim dispela hevi i kam.

Wanpela mausman bilong Telikom i tokaut olsem long dispela wik yet bai LFA i kisim pas bilong Telikom long toksave olsem ol i bruk lusim LFA.

...Waliya na Bugandi tu i tekov na brukim strong bilong LFA

YAKAM KELO i raitim

Insait long wanpela pas Telikom i raitim i go long Lahi i askim Lahi long kisim em i go joinim asosiesen bilong ol. Mipela i putim narapela pas long salim i go long LFA long tokaut long mipela i bruk lusim LFA na tu mipela bai kisim bek 1997 afiliesen fi. Afiliesen fi em K240 we Telikom i baim pinis.

Insait long pas ol i tok, mipela olgeta i bin wanbel long bruk lusim LFA soka resis bihain long wanpela bung mipela i holim aste bikos long wanpela birua i bin kamap

long fil long primia lig salens.

Mipela i pilim olsem LFA Eksekutyutiv i no sanap strong long was gut long olgeta pilai long pilai graun long strongim lo na eksen long mekimsave long ol klap i brukim lo. Dispela em rot nogut na inap kamapim piksa nogut na inap bagarapim soka resis olgeta. I nogat tu wok bung wantaim long ol eksekutyutiv na i gat sain bilong LFA i no ronim gut asosiesen.

Mipela i no laik joinim yet o afili-et yet long asosiesen we i no gat klia plen bilong developim soka bihainim na i no inap lukautim na was gut long ol pilai bilong em, ripot bilong klap i tok.

Telikom Soka Klap i gat nem long Morobe provins long kamap olsem primia klap, sempion klap na i gat nem long makim Lae long kik insait long ol nesenei klap sempionsip bilong PNGFA. Na tu Telikom klap i save kamapim ol gutpela pilai husat i kamap na makim PNG skwat long sinia na junia level.

Telikom Soka Klap i bin stat long 1989 na i save holim nem bilong Lae tu long ol strongpela soka salens we i mekim stended na strong bilong soka i strong inap nau.

Dispela leta bilong Telikom Soka Klap i go long Lahi Soka Asosiesen

i kisim wanbel bilong Lahi Eksekutyutiv pinis Epril 1 1997.

Telikom i namba tri tim bilong LFA long joinim Lahi bihain long ol meri Waliya i bin bruk na joinim Lahi long dispela yia na tu Bugandi Soka Klap tu i wanpela bilong ol i kam long LFA na i stap long Lahi primia 2 divisen.

Wantok i nogat rot long toktok wantaim wanpela eksekutyutiv bilong LFA olsem na stori i go long pepa na nogat bekim bilong LFA long dispela.

Tasol LFA bai kisim pas bilong Telikom long dispela wik.





## Tumbe, Crushers o Mioks bai i gat sans long SP Inta Siti

*...Sapos Madang i putim tim, ol tim antap bai nogat sans*

MADANG i no bin gat wanpela tim insait long Salens Kap kompetisen bikos ol i no bin mekim baset bilong ol long pilai insait long dispela resis. Tasol ol bai i go het long makim wanpela tim long pilai insait long SP Inta Siti salens stat long Mei 4.


Namba tu presiden bilong Madang ragbi lig, Noki Kopi i bin tokim Ragbi Lig Nius olsem, long wanpela miting namel long ol bikman bilong Madang Globe Trotters na Madang ragbi lig long asde Trinde, ol i bin tok olsem MRL bai kik ov wantaim 9's tonamen bilong em long dispela wiken na long neks wik bai ol statim propa sisen.

"Mipela bai stap yet insait long SP Inta siti salens. Husat tok bai mipela i no inap i pilai," Mista Kopi i bin tok strong tru olsem. "Mipela i no inap giamanil ol sapota na sponsa bilong mipela hia long Madang. Olsem na long dispela yia, bai mipela traim long kamap wantaim wanpela strongpela tim long makim Madang," em i bin tok moa.

Namba tu presiden i bin tok olsem, sampela ol kampani husat i bin sponsorim Trotters long las yia i lusim pinis. Ol dispela kampani, Mista Kopi i no bin laik long tokaut i bin rausim sponsasip bilong ol bikos, ol pilim olsem ol i no inap go het long givim moni dispela yia. Narapela samting, watpo na ol kampani i no laik sponsorim Trotters, em bikos Madang ragbi lig i no bin stat hariap, olsem na ol kampani i bin ting olsem MRL bai i no inap stap olsem na ol i bin rausim sponsasip bilong ol.

Em bin tok tu olsem, Madang i no bin makim wanpela tim bilong em long pilai insait long Salens Kap bikos em i no stap long plen na baset bilong Madang Ragbi Lig. Tasol long kamap wantaim wanpela tim long pilai insait long SP Inta Siti kompetisen, namba tu presiden i bin tok strong tru olsem ol bai i gat tim yet.

Em i bin tok tu olsem, James Barnes bai sponsorim Madang



• **Dispela piksa i soim wanpela strongpela pilai namel long Arabica Goroka Nokondis na Pot Mosbi Vipers tim2. Nokondis i bin winim dispela gem 28-22. Lukim Moa Ragbi lig eksen poto long pes 6.**

Trotters yet long dispela yia. Na tu sampela ol praiwet kampani long Madang i soim laik pinis long sponsorim Trotters long pilai insait long dispela yia salens. Narapela samting Mista Kopi i bin tok tu em; MRL bai givim wok i go long wan wan klap presiden na opisel long kamap wantaim ol gutpela pilai na givim nem bilong ol i go long menesemen bilong Globe Trotters.

Long dispela rot, bai ol pilaia i ken givim planti taim bilong ol long trening na impruvim stail bilong pilai bilong ol.

"Olsem siaman bilong seleksen komiti, mipela i kisim nem bilong 40-pela pilaia pinis long kisim pes bilong Madang na pilai insait long dispela yia SP Inta siti resis," Mista Noki Kopi i bin tok.

Vais presiden i bin tok tu olsem, olgeta klap i afiliat pinis long MRL, olsem na pilai bai stat long dispela wiken. Wanpela samting mekim na ol i bin stat hariap em bikos, olgeta klaps i no bin baim afiliasen na pilaia rejistresen fi bilong ol. Tasol nau yet, olgeta klap i pinisim pinis olgeta dispela fi bilong ol na redi tasol long kik ov wantaim ragbi 9's long

wiken na propa sisen long neks wiken.

Tasol ol bikman bilong PNGRFL i bin tokaut olsem, sapos Madang i no kamap wantaim wanpela tim bai wanpela bilong ol tripela tim husat nau i wok long pilai insait long Salens kap bai kisim ples bilong Trotters.

Long wanpela pres pas i kam long siaman bilong PNGRFL i soim olsem, James Barnes wanpela i no inap sponsorim Trotters long dispela yia. Nau yet, tok i paul yet, bai Madang i gat tim long SP Inta siti salens o nogat.

### INSAIT

• Ol manki Jiwaka winim Goroka Lahanis.

P2

• Arabica bagarapim sindaun bilong Viper2.

P3

• Sidni lig nius.

P4/5

• Ragbi lig poto.

P6

• Ragbi lig dro.

p7





# Ol manki Jiwaka rausim trausis bilong Goroka Lahanis

WATSON GABANA i raitim

*...long namba tri raun bilong salens kap*

MANMERI long Mid-Wahgi o Jiwaka i bin wokabaut i go long wanwan ples bilong ol wantaim bikpela amamas bihain long tim bilong ol Waghi Tumbe bin nekim Goroka Lahanis 17-12 long namba tri raun bilong Salens Kap las wik Sande long Banz.

Klostu long 3,000 manmeri i bin pulap long Banz pilai graun long lukim na sapotim tim bilong ol pilai wantaim Goroka Lahanis. Sampela moa handret manmeri i bin sanap autsait long ol mauten klostu long pilai graun long singaut na sapotim Tumbe long winim dispela pilai. Nambawan pilai i bin stap namel long Wamp Nga/Cambridge Maut Hagen Eagles na Spear Kundiawa Warriors. Tupela tim wantaim i bin pilai strong tru taim wisel i bin pairap. Ol fowads bilong

tupela tim wantaim i bin mekim sampela strongpela ran na traim long brukim defens bilong ol birua tasol, defens bilong tupela sait wantaim i bin strongim tru.

Pret long lusim dispela pilai, ol Warriors i bin strongim sait bilong ol long skoa pas. Tasol ol kange i no laik larim ol long skoa liklik. Ol manki bilong namba tri siti i kaikaim tit na brukim bun i go na winim ol manki stonhet bilong Kundiawa 18-8.

Tupela tim wantaim i bin i gat planti nupela pilaia. Tasol ol i bin pilai gut tru na soim planti gutpela stail. Warriors i bin rikrutim Vicky Moses bilong Capital City Cowboys long wanem em i gat gutpela stail bilong tilim bal namel long ol pilaia bilong em. Vicky i gat gutpela teknik bilong sait step na ran i go



• SP Inta Siti pri sisen pilai namel long Goroka Lahanis na Kundiawa Warriors las wiken.

insait long spes tasol long dispela salens, ol Eagles i no bin givim em liklik spes. Ol Warriors i bin mekim kain kain ol paul pilai na pundaunim planti bal long dispela gem. Long dispela as na ol Eagles i bin kisim sans long dispela na wiliwilim ol wan sait.

Ol trai bilong Eagles i bin kam long han bilong Rex Ray, Max Tiri, Billy Noi Jr. na Micheal Kitsh na Mogil Dul wantaim Bill Justin i bin putim tupela trai bilong ol Warriors.

Long mein gem long apinum, ol asples manki, Waghi Tumbe i bin putim nambawan win bilong ol, taim ol katim nek bilong Goroka Lahanis 17-12. Ol Cambridge Waghi Tumbe i bin lus long Ramu Crushers na Wabag Mioks long las tupela pilai bilog ol. Tasol long


Sande las wik, i bin narapela stori. Ol i bin bagarapim tru sindaun bilong Goroka Lahanis wan sait tru. Wantaim bikpela, sapot i kam long ol wanlain bilong ol, ol pilaia bilong Tumbe i larim bal i ron i go inap long pinis bilong pilai. Planti manmari i bin kisim prais bilong moni bilong ol taim Tumbe i bin winim dispela pilai.

Ol Lahanis i no bin pilai olsem ol i save pilai. Ol i bin mekim planti paul pilai na dropim planti bal. Dispela i bin givim rum long ol manki Jiwaka long putim pes tu poins bilong ol antap long tebel bilong Salens Kap. Tasol trangu Goroka i wet yet long painim tu poins bilong ol.

Long narapela pilai bilong salens kap, Muruks i bin rausim lip tanget bilong Mioks 14-10 long Wabag.

Stori i bin kamap olsem, Muruks i bin putim tupela trai long fes faiv minits. Bihain long dispela, Wabag i bin lokim ol gut i go inap pinis bilong fes hap. Long seken hap, Wabag putim tupela trai tasol, Muruks i putim laspela trai bilong ol klostu long pinis bilong seken hap long winim ol Mioks. Long pilai namel long Ramu Crushers na Lae Bombers, Lae i bin winim ol Crushers 14-10.

Long dispela wiken, bai Minj i kamap papa long tripela bikpela salens kap gems. Ol biknem tim olsem Muruks, Lahanis, Warriors, Cowboys, Eagles na nupela tim, Tumbe bai bungim pes long Minj lig oval. Crushers, Mioks, Guria na Bombers bai soim stail bilong ol long ol sapota long Lae siti.



• Wapela pilaia bilong Kundiawa Warriors taitim bun bilong em long brukim banis bilong ol Goroka Lahanis. Warriors i bin winim dispela pilaia 32-26

## Mendi kamapim komiti long lukluk long hevi bilong Warriors na Muruks

SIAMAN bilong Mendi Ragbi lig, Robert Posu i tokaut olsem ol i kamap pinis wantaim wapela komiti long painim sampela rot bilong stretim dispela hevi namel long Kundiawa Warriors na Mendi Muruks long las yia.

Em i bin tok olsem, nau i gat sampela gutpela sain olsem tupela tim wantaim i wok bung i stap long kamapim wanbel namel long pilaia, sapota na folowa bilong Mendi na Kundiawa ragbi lig asosesin. Mista Posu i bin tokaut tu olsem, ol bikman bilong Kundiawa i bin salim tok long bung na pilai wantaim olsem pinisim dispela hevi. Tasol em i bin tok olsem dispela em wok bilong ol opisel bilong Warriors long painim sampela taim na singautim dispela pilai.

Mista Posu askim PNGRL long go pas na bringim dispela hevi kam long arere bilong em. Long dispela rot, tupela tim wantaim bai wanbel long planti samting. Em tok sapos ol lusim ol Warriors na Muruks long mekim olgeta samting long ting ting na save bilong ol yet, bai ol bungim sampela hevi.

Siaman i bin tokaut tu olsem, nau yet, ol Mendi Muruks i no pilai long mak ol i save pilai bipo, bikos ol i no amamas long dispela hevi bilong las yia i stap yet. Tasol bihain long Challenge kap, bai Muruks i go insait long ful swing wantaim ol trening bilong ol.



Wapela Nokondis pilaia i laik long brukim banis bilong ol Vipers tasol ol manki bilong Vipers i pasim rot bilong em.





• ANTAP: Ol sapota bilong Arabica Goroka Nokondis i bin singaut na ron i go insait long fil na karim wanwan pilaia i kam autsait taim Nokondis i bin winim Vipers tim2 28-22.

• ANINIT: Vipers tim 2 pilaia laik takelim wanpela fowat bilong Nokondis taim em i laik salim bal i go long poroman bilong em. Foto: Ivan Bayagau.

## Arabica Goroka Nokondis i bagarapim sindaun bilong ol Vipers

### WATSON GABANA i raitim

LONG ai bilong moa long 500 sapota, Arabica Goroka Nokondis i bin bagarapim tru sindaun bilong ol Vipers tim 2, 28-22 long wanpela pilai bilong nesinel ragbi lig salens long Sande hia long Lyold Robson ragbi fil.

"Mipela i kam hia, long soim olsem, Goroka i gat sampela gutpela pilaia husat i ken helpim Vipers long Channel 9 kap salen. Mipela i no westim mani long kamdaun hia long pilai mabel, mipela i laik skurim ol Vipers long pilai ragbi," presiden bilong Arabica Goroka Nokondis, Alfred Gotaha i bin tok. Em i bin tok tu olsem, bihain long pilai, em laik bai moa manki bilong em i ken stap insait long Vipers tim.

Stat long kik ov, ol manki Nokondis i bin paia lait i go inap pinis bilong pilai. Ol i bin mekim ol stail bal wok na strongpela ran i go insait long kompaun bilong ol Vipers 2 i go na putim nambawan trai bihain tasol long 12 minit bilong fes hap. Dispela trai i bin kamap, taim prop, Kuta

Uriso i bin karim tripela pilai bilong Vipers na pundaun antap long trai lain.

Ol sapota bilong Nokondis i bin go wail, taim winga, John Nihute i bin sait step na abrusim ol pilaia bilong Vipers na skoarim namba tu trai bilong ol. Tasol dispela i no bin stapim ol Vipers. OL hatwok i go na long 30 minit insait long pes hap yet, Ivan Turia i siksti abrusim olgeta pilaia bilong Nokondis na putim nambawan trai bilong ol. Vipers i bin strong yet na Lohia Ben-Moide i bin putim seken trai bilong ol Vipers.

Tasol klostu long pinis bilong fes hap, referi i sin binim Wein Mori i go aut long pilai graun bihain long em i bin kros Wantaim referi na tromoi bal i go aut long fil. Nokondis i kisim dispela sans na salim Jackson Leko long namba tri trai bilong ol. Long arere bilong fes hap, Nokondis i bin i go pas wantaim 4 points (14-10).

Seken hap i bin narakain tru. Bihain tasol long ol i kam bek long fil, Elvis Aaron i bin pinisim gut wanpela nasipela bal wok bilong ol wan pilaia bilong em long putim narapela trai bilong Nokondis. Tasol i no longtaim, Geriga Gala bilong Vipers i bin

intaseptim bal bilong faiv-eit Konni Sari na pundaun aninit long trai lain long apim skoa i go antap long 16 points. Long namel bilong seken hap, Wein Mori i bin kam bek long fil bihain long sin bin na skoarim narapela trai gen bilong Vipers na apim skoa i go antap long 22 points. Dispela i bin laspela taim, Vipers i bin lukim trai lain bilong Nokondis. Bihain long dispela, olgeta taim i bin bilong Nokondis tasol. Ol sapota i bin singaut na sampela i bin ran i go long fil taim, John Oliver i bin putim wanpela trai bilong Nokondis bihain long wanpela klasik bal wok. Nick Aizuwe i bin pasim haus wantaim laspela trai bilong dispela apinun.

Taim laspela wisel, ol manki kol ples Goroka i no bin i gat sans long sikan wantaim ol Vipers pilaia. Ol sapota i bin siksti i go insait long pilai graun na karim wanwan pilaia i kam autsait.

"Dispela win bilong mipela nau bai sanis tingting bilong planti pilaia bilong Goroka ragbi lig," presiden Gohute i bin tok. "Mi bilip, bai ol lusim Danny Leahy Ovel na i go antap long Meniga fil long Kabiufa," em tok moa.

### Lae Bombers winim Ramu Crushers long salens kap resis

FAINEL skoa bilong Lae Bombers wantaim Ramu Crushers long las wiken Salens kap gem i bin 14-8, skoa i bin stap olsem Bombers 10 na Ramu 8 long wanpela hap taim insait long gem tasol bihain Bombers i putim las minit trai long winim dispela gem.

Long fes 18 minit i bin nogat skoa, tasol long 24 minit bihain Bombers i kisim wanpela penalti bihain long Kawage Dau bilong Ramu Crushers i bin stilim bal insait long teritori bilong Crushers. Dispela i givim sans long Bombers na ol i kisim 2 points long penalti kik.

I no long taim long kik ov bilong seken hap, Wesley Utne bilong Crushers i dropim bal. Dispela i givim

arapela sans gen long Bombers. Bihain long skram ol Bombers i bin skoarim narapela trai. Bihainim wanpela drop kik ol salim bal i go long beklain we biknem pilai Simon Kundi i bruken difens bilong Crushers long salim senta bilong Bombers, Eddie Mark i go pundaun antap long trai lain long bringim skoa i go antap long 4 points Klostu long hap taim nupela rikrut bilong Bombers, Hagen Eagles biknem Andrew Norman i trikim beklain bilong Crushers na setim winga Andrew Pora long skoa gen. Dispela i bringim skoa i go antap long 10 na Crushers nil long haf taim.

Bihain long haf taim tupela tim wantaim i bin pilai strong tru. Insait

long 15 minit bilong seken haf Wesley Utne bilong crushers i salim wanpela gutpela bol i go long Robert Sio we em setim Solomon Ragoi long skoa, dispela i bringim sko i go 4 na Bombers 10.

Dispela trai mekim na ol Crushers pilai hat tru. In longtaim huka bilong Crushers Kelly Gende i trik long pasim bal na daiv antap long trai lain, bringim sko i go antap long 8 na Bombers 10. Pilai i go strong tru tasol long las mint Bombers i salim bal i go long beklain we senta bilong Bombers Eddie Mark go skoa long winim dispela gen. Fultaim skoa em Bombers 14 na Crushers 8.





## STORI BILONG PILAIA

### ROBBIE McCORMACK Hunter Mariners

**Posisen:** Huka

**D.O.B:** Oktoba 14, 1964

**Wok:** Kapenta

**Niknem:** "Moth". Stori bilong sampela bia mi save kisim long biknait, na save i go hait long kabot.

**Feveret muvi:** The Blues Brothers.  
**Feveret kai kai:** Kai kai meri bilong mi save kukim.

**Feveret sing sing:** Copper Head Road, sing sing bilong Steve Earl.

**Yu ting ting long go we taim yu kisim holide?** Afika. Mi laik lukim ol golila na ol arapela abus bilong bus bipo ol i dai na pinis olgeta.

Wanem em long long samting stret yu bin mekim long laip bilong yu?

Wanpela moning, mi bin kalap long palasut bihain tasol long wanpela nait aut. Dispela em bin wanpela krangki pasin tru.

**Inap yu stori long wanpela samting yu bin mekim i no gutpela olsem kapenta?** Mi bin sanap antap long kapa 30 mita hai na rausim ol ain nil. Mi no bin welim wanpela sefti klos.

**Wanem samting yu ken tingim yet taim yu bin lik lik manki yet?**

Papa bilong mi bin raunim mi wantaim wanpela hos bilong wara long paitim mi taim mi no bin kukim kai kai bilong em long moning. Mi bin ran 5-pela blok pinis na mi bin luk save olsem em i bin giamanim mi tasol.

**Feveret ragbi pilaia:** Kevin Hastings.

**Stori long mipela long taim yu bin pilai bes ragbi lig bilong yu:** Taim mi bin ran i go aut long pilai stat ov orijin long NSW sait na 40,000 manmeri i bin singaut long mi.

**Yu bin pilai olsem hap-bek taim yu stat pilai ragbi. Wanem taim tru yu bin sanisim posisen bilong yu i go long huka?** Mi mov i go long huka long 1992, bikos David Waite (kosa bilong Newcastle) i bin ting olsem mi bai strongim tim long dispela posisen.


**Yu bin stat pilai wantaim**

**Newcastle. Yu bin pilim wanem taim yu bin lusim Newcastle?** Mi bin stat wantaim ol long de wan, em i bin hat tru long mi lusim ol. Tasol mi mas go.

**Olpela tim meit bilong yu long Newcastle i save tok olsem yu wanpela fada man bilong sef antap long solwara. Yu ting wanem long dispela?** Mi wanpela man bilong sef long taim solwara i bruk klostu tasol long nambis o taim solwara i no bikpela na tu taim planti manmeri i stap arere long nambis.

**Yu lukim sampela sain bilong soa long Newcastle, taim tok tok bilong Supa Lig i stat long drai o nogat?** Planti man i save kam na tokim mi long dispela samting. Tasol mi wisim Newcastle gut lak long dispela sisen.

**Pilaia ol narapela klap was mas long em:** Faiv-eit Scott Hill em wanpela yanpela manki na i gat planti stail pilai i hait i stap insait long em. Hait nau, tasol bai kamap wanpela biknem pilaia bihain.





# TRENING ANTAP LONG WESAN, KAMAPIM BIKPELA HET-PEN

TAIM yu harim nem, Adelaide, bai yu ken tingim kain ples olsem, Ela Beach o wanpela waitpela wesana, yu bin lukim long laip bilong yu, we planti manmeri i save pulap long en. Adelaide em pulap long naispela waitpela wesana we planti yanpela man na meri i save go waswas, pilai na swim long en.

Tasol long sem taim, wanpela nupela tim insait long supa lig resis long Australia, ol kolim ol yet Adelaide Rams i save trening tu long dispela ol waitpela nambis. Ol pilaia bilong Adelaide Rams i no nupela long dispela ol nambis. Taim ol lik lik yet, ol i bin pilai pilai long dispela ol nambis na gro bikpela. Nau taim ol i go bek gen na ran i go kam long dispela ol wesana, ol i save salim ting ting i go bek long taim ol i bin lik lik ol manki yet. Tasol wanpela man, nupela long dispela ples em, kumul kepten, Elias Payo.

Sapos yu wanpela Ram, moa taim yu spendim antap long wesana, yu bai luk save olsem planti taim bai yu winim. Rekot bilong Rams i soim olsem, taim ol manki i go olgeta taim long nambis na pilai antap long wesana, ol i save winim ol pilai bilong ol. Ol i bin dikim wesana i go daun tru na ol yangpela pilaia i save trening long en. Taim ol kamap fit, kosa i save slukim ol i go antap long A-gret.

Long dispela sisen, Adelaide Rams i no bin gat resev gret. Ol

i gat anda 19 na A-gret tasol. Olsem na taim ol i laik kisim ol A-gret pilaia, ol pilaia i mas pruvim ol yet olsem ol i fit. Wanpela hap ol sekta i save luk luk, taim ol mekim seleksen em long taim ol trening long wesana bilong Adelaide. long arapela klap, taim ol pilaia i no pilai gut, ol i save dropim ol i kam daun long risev gret. Tasol wantaim Adelaide Rams, em narapela stori. Taim yu no pilai gut long primia, kosa bai salim yu go long wesana bilong Adelaide. Long hap, yu bai sanap insait long wanpela baret, ol i bin digim insait long wesana na takelim 12-pela pilaia husat bai ran i kam long yu.


Lukluk i go bek long histri bilong dispela kain stail, ol anda 20 tim bilong Adelaide i bin winim Saut Australia tim more long 20 points, bihain long ol i bin trening long wesana bilong Adelaide. Ol Brisbane Broncos tu i save yusim dispela kain stail long taim bilong trening. Long sampela yia i go pinis Steve Walters i no bin gutpela long defens. Olsem na taim em i bin mekim dispela kain trening long wesana, em i bin

kamap wanpela top man bilong pilai.

Kosa bilong Adelaide Rams, Rod Reddy i bin tok: "Dispela kain trening i save putim ol pilaia bilong em long mak bilong dai. Tasol taim i go long pilai graun, ol i no save les long takel."

Wanpela experiens pilaia bilong Rams, Rod Maybon i bin tok tu olsem, taim ol i save i go baret wesana long trening, ol i no save kai kai, taim ol i pinis trening. Olsem na em ol arapela askim long ol kosa i mas lusim dispela kain trening. Nogut em bai bagarapim ol pilaia. Maybon i bin tok aut tu olsem, taim ol manki Rams i trening long hap i go na taim ol i go pilai long sampela liklik kompetisen, ol i save bagarapim ol pilaia long hap. Olsem na em askim bai Supa Lig i tambuim dispela kain we bilong trening long Australia.

Yumi no save, bai Elais Payo i kam na tok wanem long dispela kain trening em wok long kisim long Adelaide i stap. Bai yu wet tasol long harim gut long maus bilong Payo, taim em kam na lukim yumi long PNG.




• Long dispela wesana... Adelaide pilaia Stven Stone (antap) and Kerrod Walters i soim strong bilong ol long wesana.

## LAIN AP BILONG NSW SUPA LIG TIM... bai ol pilai tumoro nait



NSW i makim pinis fes tim bilong ol long pilai insait long Tri-series gem wantaim Kwinslen long supa lig salens long tumoro Fraide. Pilai bai i stap long Sydney Futbol Stadium. Nem bilong ol pilaia em:

David Peachey (Cronulla), Ken Nagas (Canberra), Andrew Ettinghausen (Cronulla), Ryan Girdler (Penrith), Matt Ryan (Canterbury), Laurie Daley (Canberra - capt.), Greg Alexander (Penrith), Brad Clyde (Canberra), David Furner (Canberra), Sean Ryan (Cronulla), Rdney Howe (Perth), Craig Gower (Penrith), Glenn Lazarus (Brisbane).


**Resev:** Noel Goldthorpe (Hunter), Robbie Ross (Hunter), Matt Adamson (Penrith) na Solomon Haumono (Canterbury).







**NESENEL RAGBI LIG SALENS  
 NAMEL LONG ARABICA GOROKA  
 NOKONDIS NA MOSBI VIPERS  
 TIM 2 LAS WIKEN.  
 NOKONDIS WINIM VIPERS 2, 28-22**



**SUPA LIG SALENS KAP PILAI NAMEL  
 LONG KUNDIAWA WARRIORS NA  
 GOROKA LAHANIS LONG ISTA WIKEN.  
 KUNDIAWA WARRIORS WINIM LAHANIS 32-26.  
 POTO: SAPE METTA**





• Wanpela pilaia bilong Goroka Lahanis i wokim wanpela strogela takel long wanpela pilaia bilong Kundiawa Warriors.

**ARL na Super league points ladder**

Tables Team	W	D	L	F	A	PTS
Manly	5	-	-	114	72	10
Newcastle	4	-	1	132	66	8
Illawarra	3	1	1	108	64	7
Sydney City	3	-	2	100	80	6
St George	3	-	2	92	53	6
Nth Sydney	2	1	2	88	76	5
Gold Coast	2	-	3	94	86	4
Balmain	2	-	3	76	74	4
Sth Sydney	2	-	3	73	130	4
Western Subs	1	-	4	55	101	2
Parramatta	1	-	4	42	93	2
Sth Queensland	1	-	4	55	134	2

TABLE Team	W	D	L	F	A	PTS
Brisbane	6	-	-	148	66	12
Penrith	5	-	1	170	102	10
Cronulla	4	-	2	115	82	8
Canterbury	3	-	3	124	127	6
Perth	3	-	3	116	118	6
Auckland	2	-	3	56	92	4
Adelaide	2	-	4	92	124	4
Nth Queensland	2	-	4	98	151	4
Hunter	1	-	5	112	112	2
Canberra	1	-	4	76	133	2

TABLE Team	W	D	L	F	A	PTS
Collingwood	2	-	-	329	143	8
Essendon	2	-	-	199	159	8
Richmond	2	-	-	232	195	8
Fremantle	2	-	-	167	149	8
Brisbane	1	1	-	250	189	4
West Coast	1	1	-	150	115	4
Adelaide	1	1	-	232	224	4
Wtrn Bulldogs	1	1	-	166	163	4
Geelong	1	1	-	173	176	4
Hawthorn	1	1	-	150	158	4
Melbourne	-	1	-	126	218	4
Carlton	-	1	-	90	106	-
North Melbourne	-	1	-	55	70	-
Sydney	-	2	-	120	168	-
Port Adelaide	-	2	-	147	259	-
St Kilda	-	2	-	123	231	-

**LAE RUGBY LEAGUE SP CUP**

**Round 2**  
(Round 1 matches for juniors is deferred to be played at a later date)  
Saturday April 12, 1997.

**Outside Ground**

9.00am	U19	Fairdeal Magani	v	KT Morobe Tigers
10.00am	U19	Brothers	v	MDC Royals
11.00am	U19	Tarangau	v	Panthers
12.00noon	U19	Lae Bisket Spiders	v	Defence

**Inside Ground**

9.00am	B	Tarangau	v	Panthers
10.20am	B	Lae Bisket Spiders	v	Defence
11.40noon	B	Fairdeal Magani	v	KT Morobe Tigers
1.00pm	B	Brothers	v	MDC Royals
2.30pm	A	Fairdeal Magani	v	KT Morobe Tigers
4.00pm	A	Brothers	v	MDC Royals

**Sunday April 13, 1997.**

**Outside Ground**

9.00am	U17	Fairdeal Magani	v	KT Morobe Tigers
10.00am	U17	Brothers	v	MDC Royals

**Inside Ground**

9.00am	U17	Tarangau	v	Panthers
10.00am	U17	Lae Bisket Spiders	v	Defence
11.00am	A	Tarangau	v	Panthers
12.30pm	A	Lae Bisket Spiders	v	Defence
2.30pm	I/C	Wabag Mioks	v	Ramu Crushers
4.00pm	I/C	Lae Bombers	v	Rabaul Gurias

**Gate Fees**  
Adults K5  
Kids K2

**SP INTER CITY DRAW & RESULT**

Bombers	14	def	Ramu Crushers	8
Mt Hagen Eagles	18	def	Kundiawa Warriors	8
Waghi Tumbe	7	def	Spear Goroka Lahanis	12
Mendi Muruks	14	def	Wabag Mioks	10


**Sunday April 13, 1997.**

1.00	Eagles	vs	Cowboys - (Minj)
2.30	Muruks	vs	Lahanis - (Minj)
4.00	Tumbe	vs	Warriors - (Mjni)
2.30	Crushers	vs	Mioks - (Lae)
4.00	Bombers	vs	Gurias - (Lae)

**KOIARI RUGBY LEAGUE  
PRE-SEASON DRAW  
ROUND TWO**

**Sunday April 13, 1997**

11.00	Sogeri Choice vs Sirinumu Owls
12.00	Ice Panthers vs Vakasu Souths
1.00	15 Mile vs Sirinumu Sharks
2.00	Hooks Tigers vs Crystal Lakers




• Tupela pilaia bilong Goroka lahanis i pasin we bilong Kundiawa Warriors pilaia. Kundiawa Warriors i bin winim dispela gem 32-26.





• Laurie Daley  
Captain

# Supa lig origin



• Allan Langer  
Captain



• Andrew Ettinghausen

## Nu Saut Wels vs Kwinslen

SUPA lig tim bilong New South Wales na Kwinslen bai pilai long nambawan Tri-Series gem bilong ol tumoro Fraide, 11 Epril long Sydney Futbol Stadium. Planti biknem pilaia bilong Australia i wok long putim ai long Kwinslen tim long rausim tiket bilong NSW.

Long tim bilong Kwinslen sait i gat 10-pela pilaia bilong Brisbane Broncos i stap insait long em. Bikos planti pilaia i save long ol yet gut, i luk olsem Kwinslen bai winim dispela pilai. Na tu long Kwinslen sait, planti ol pilaia i gat experiens long pilai long dispela kain bikpela gem. Kepten, Allan Langer, Steve Walters, Steve Renouf, Wendell Sailor na Julian O'Neill bai traim long yusim ol stail teknik na experiens bilong ol long helpim Kwinslen kamap wina long Fraide nait.

Tasol long New South Wales sait, nambawan samting we i ken helpim ol long kam aut wina em

ol sapota. Asples tu na i luk olsem, NSW tim bai kisim bikpela sapot i kam long olgeta manmeri. Kosa Tim Sheen i no inap larim dispela pilai i lus long han bilong NSW isi. Bai em putim olgeta save bilong em i go insait long tingting bilong ol manki NSW long winim dispela gem. Narapela samting tu i ken helpim ol NSW long win em, experiens bilong kepten Laurie Daley, Greg Alexander, longtaim pilaia, Andrew Ethinghausen, Bradley Clyde na Glenn Lazarus.

Hia em nem bilong ol pilaia husat bai pilai long nambawan gem bilong Tri-Series Supa Lig long tumoro Fride.

### NEW SOUTH WALES:

David Peachey (Cronulla), Ken Nagas (Canberra), Andrew Ethinghausen (Cronulla), Ryn Girdler (Penrith), Matt Ryan (Canterbury), Laurie Daley (Canberra-capt.), Greg Alexander

(Penrith), Bradley Clyde (Canberra), David Furner (Canberra), Sean Ryan (Cronulla), Rodney Howe (Perth), Craig Gower (Penrith), Glenn Lazarus (Brisbane).

**Resev:** Noel Goldthorpe (Hunter), Robbie Ross (Hunter), Matt Adamson (Penrith) na Solomon Haumono (Canterbury).

### QUEENSLAND:

Julian O'Neill (Perth), Wendell Sailor (Brisbane), Steve Renouf (Brisbanne), Geoff Bell (Cronulla), Mat Rogers (Cronulla), Kevin Walters (Brisbane), Allan Langer (Brisbane-capt.), Gorden Tallis (Brisbane), Owen Cunningham (North Queensland), Andrew Gee (Brisbane), Darren Smith (Brisbane)

**Resevs:** Paul Green (Cronulla), Chris McKenna (Cronulla), Peter Ryan (Brisbane), Shane Webcke (Brisbane).




• Kevin Walters



• Greg Alexander




• Glenn Lazarus



• David Peachey



• Matt Rogers



• Gordon Tallis





# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.